



الهيئة العامة لقصور الثقافة  
إقليم القناة وسيناء الثقافى

# • جحا فى المزار • حكاية دعبيل

«مسرحيتان»

عبد الفتاح البيه

مطبوعات  
إقليم القناة وسيناء الثقافى

١٠

بسم الله الرحمن الرحيم





## ”جحا“ و”دعبل“ سياق إبداعى معاصر

إذا كان المسرح هو الأب الشرعى لكل الفنون. فلا شك أنه أيضا لسان حال الجماهير التى تفقد صوتها أحيانا وإبصاريا!  
من هنا كان العثور على نص مسرحى جيد: هو العثور على لغة إنسانية تصرخ وتغنى وتعلم.

لهذا كانت سعادتنا بهذين النصين المسرحيين : ”جحا فى المزداد - حكاية دعبل“ اللذين يستمدان مرجعيتهما الفكرية والجمالية من التراث. فـ ”جحا“ هو الرمز الأكبر من رموز الإبداع الشعبى بكل سخريته ودهائه وإسقاطاته الأسيرة. و”دعبل“ بماله من رصيد فى الذاكرة الشعبية لأهالى بورسعيد. وهكذا يتجاوز الاثنان معاً : جحا ودعبل. فى سياق إبداعى معاصر أجاد بناء الكاتب المبدع : عبد الفتاح الببیه. لنقدمه ضمن خطة اقليم القناة وسيناء الثقافى للاهتمام بمبدعينا عامة. ومبدعى الكتابة المسرحية خاصة. بالنظر إلى ندرة نصوص هذه الكتابة الهامة. واعدین بمواصلة إصدار مطبوعاتنا الإبداعية والتى نحاول أن تكون متميزة شكلاً ومضموناً. روحاً ودلالة.

عبد الرحمن نور الدين  
رئيس اقليم القناة وسيناء الثقافى



إهداء

إلى معبودتى.. بور سعيد

إلى أحبائى

وكل المطاردين فى الزمن الصعب



# جحا فى المزاد



## الشخصيات

### أولا : جماعة جحا :

- ١- جحا : أبو الفصن دجين ابن ثابت جحا الفيلسوف والحكيم العربى.
- ٢- طارق : طارق ابن المهلهل شاب يجمع تراث عمه جحا
- ٣- وردة : فتاة خطفها النحاس المراهب «موسى» وسماها سكه .
- ٤- التاجر صفوان : شيخ التجار وصديق جحا
- ٥- الخادم سعدون : عربى يخدم عند موسى النحاس

### ثانيا : جماعة موسى :

- ١- موسى : نحاس ومراهب عجوز ويسمى نفسه أبو العينين
- ٢- أم ستة : زوجة موسى عجوز داهية
- ٣- شمس : من عائلة موسى
- ٤- نارى : من عائلة موسى
- ٥- كوك : من عائلة موسى
- ٦- شعله : من عائلة موسى
- ٧- دليلة : فتاة من أتباع موسى

### ثالثا : جماعة الوالى :

- ١- الوالى : والى عثمانى
- ٢- أبو زالف : قائد حرس الوالى
- ٣- ندمان : وزير الوالى
- ٤- عسس ١ :
- ٥- عسس ٢ :
- ٦- عسس ٣ :
- ٧ : منادى :

**ملحوظة :** جميع الممثلون يقومون بأداء أدوار الباعة والحرس وناس السوق والمحلقيين حول الفرجة..

المكان : أى حيز يسمح للقاء الممثلون بالناس.. يصلح لتقديم هذه الفرجة..

الزمان : يمكن أن يكون الزمن الماضى..

الديكور : ايمائى وغالبا ما يصنع الممثلون من أجسامهم تكوينات الديكور.. إلى جانب بعض الاكسسوارات المساعدة.

**الممثلون :** مساء الخير يا أهل بلدى.. ياورد بلدى يأهل الموده والمحبه والسلام..

**ممث :** مساء الفل على أهل المفهوميه والجدهنه.. عمال وموظفين. صنايعيه وأصحاب حرف.. علما وفنانين

**ممث :** مساء الخير على أهل المروءة.. والنخوة ساسه وعساكر.. أفنديه وطلبه..

**الممثلون :** لكل ناسنا الطيبين أجدع مسا.

**ممث :** يعنى محدش رد المسا

**الممثلين :** مش سامعين ..

**الجمهور :** مساء النور..

**الممثلون :** مسا النور عليكوا يامنورين مسرحنا بحضوركم

**ممث :** وعشان مسرحنا شعبى.. هانخلى البساط أحمدى..

**ممث :** يعنى حانلعب علمكشوف.. وأهم حاجة فى اللعبه ناقصه «صمت» محدش سألنى هى إيه..

«الجمهور» اللي عارفها يقرب من الميكرفون بكل شجاعة ولاد البلد بكل شجاعه أدبيه يطلع يقولها.. «فاصل ارتجالى هو هذا الموضوع...»

**ممث :** ونى ما الأخ الجمهور قال.. الفرجه والتسلية والجمال والفكر والترفيه.. كل ده جميل..

**ممث :** ولازم وعشان تكمل اللعبه جمهورنا يشاركنا لعبنا..

**ممث :** الجمهور جمهور والممثل ممث!..

**ممث :** الجمهور أعظم ممث فى الحياه.. يعنى الأستاذ ده «مشيرا لأحد المتفرجين الذين صعدوا إلى الميكرفون.. «ممثلا هایل.. بس فى البيت.. ممث قدام زوجته ممث قدام ولاده ممث قدام مديره..

**ممث :** وكل واحد من جمهورنا الحبيب يمثل دور فى الحياه وأحيانا يساهم فى إخراجه..

**ممث :** ودائما الظروف تخرج باقى الدور

**ممث :** والليله وكل ليله حانقدم ليكوا لعبه كبيره جواها ألاعب أظرف الظرفاء..

**ممث :** الفيلسوف الحكيم.. الأديب الساخر..

«يتقدم الممثل الذى يشخص دور جحا.. ويرتدى بعض ملايسه واكسسواره»

**ممث دور :** الشخصيه اللى هامثلها.. الناس فاكرينها شخصيه خياليه.. من كتر الأصباغ والألوان والمساحيق اللى رسمها على وشه.

**ممث :** وناس تقول انه عاش بدمه ولحمه.. ودب برجليه فى الأرض العربيه وصارع الحياه بقوه وسخرية..

**ممث جحا :** كانت شهرته مضرب الأمثال فى الحكمة والنوادر والمقالب واللاعيب.. تبقى الشخصيه مين..



الجمهور : .....

ممثّل جحا : أنا عمكوا أبو الغصن دجين ابن ثابت جحا ..

ممثّل : عمنا العظيم ممثّل و جوف ومخرج فى التراث العربى ..

ممثّل جحا : وعدوى اللود أول صفاته الأثانية وعشق الذات لدرجة الجنون ..

«يتقدم ممثّل هذا الدور ويرتدى أمام الجمهور بعض ملابس وأكسسواره»

ممثّل : أبخل البخلاء فى التاريخ .. مره تاجر ومره نخاس ومره لص ومحتال ..

ممثّله : سفاح ومرابى نولى

ممثّل الدور : الشخصية اللى هاملها تعبان. وألعبان وزعيم عصابه. وعلى كل لون يتلون

ممثّل : يبقى مين ..؟ «للجمهور» ..

الجمهور : .....

ممثّل دور : رغم انى باكره لكن هامل دور .. أنا أبو العينين موسى ابن شولح ..

ممثّل : وهانرجع لزمان .. بس مش زمان قوى

ممثّل جحا : هانقلب صفحات كتابها ابن اخويا الشاب طارق بن المهلهل ..

«يتقدم ممثّل دور طارق ويرتدى ملابس وأكسسوار الدور الخاص به»

الممثّلة : نفتح صفحات أيام الخرساني الجبار ..

ممثّل : الباطش الجرى ..

الممثّلة : فى الزمن ده قابلت ابن المهلهل .. (ترتدى الممثّلة ملابسها) ..

ممثّل : قابت ورده بنت الأصول وساعدتنى فى تسجيل مذكرات عمى جحا ابن قبيلة بنى فزاره

وردة : جحا العربى .. عاش اللى فى الكوفه ..

«ومى لا تزال ترتدى باقى الأكسسوار أمام الجمهور» ..

طارق : وأصبح فى كل مدينة وقرية عربيه شخصيته حيه على لسان الناس ..

الممثلون : والليله حانحكى .. حكاية شعبيه ..

ممثّل : حلوه مسليه ..

ممثّل : أول أحداثها فى سوق المدينة ..

ممثّل جحا : والدنيا سوق .. تلاهى .. ده بايع وده شارى وبين البايع والشارى ..

الممثلون : يعلم الله ..

«يقدم الممثلون مشهدا استعراضى عن سوق المدينة»

«مع انتهاء الغناء يتحول الممثلون إلى عمل صندوق وخيمة العرض بأجسادهم فى محاولة

لمساعدة جحا ومساعديه. ويمكن أن يقدم بعضهم ضمن من يقوموا بأدوار داخل لعبة

الصندوق إلى جانب دورهم كمشاهدين ويمكن أيضا أن يؤدوا أصوات ١، ٢، ٣، وحسب

تعليمات مخرج العرض...

**جھا : وضبطت الستاره..**

**طارق : وجهزت العرايس..**

**جحا : وهندمت الملابس..**

**طارق : وهندمت الملايس**

**جما : طب کله فی مکانه**

**طارق : وسلطان زمانه.. حكايه وعبر..**

**جحا : الباطش الجريء.. كان قاطم طريق.. والنبي لأوريكا.. يا تنوع البلوتسكا..**

**طارق : دق المزيكا..**

«أغنية السلطان» والديانة ظل الخيال..»

صوت : کان یاما کان.. کان فیہ سلطان.. ظالم طاغی.. وحش و مش انسان..

**صوت : يموت فى البنيان.. صبور ورا صور قصور وقصور..**

**صوت : يتمرغ فى النعيم.. وشعبه اليتيم على لحم بطنه.. شد الحزام فوق العظام..**

صوت : والتغلب فات فات.. وفي قصر البهتان ياللى تصلوا على النبي العدنان كان اللى كان..

«تظهر عرائس العصي تكمل المشهد».

**السلطان : تفضلوا أفندم.. سموا باسم الرحمن..**

**لوزير: أدام الله فضل السلطان..**

**لسلطان : فلد ندمان هش المكان..**

**لوزير :** فيه دبانہ بتعاکس مولانہ..

تسمع صوت الذبابه خلف الكرفان.. ثم تظهر فى حجم مبالغ فيه»

**لوزير : هـش يا دبانه يا ضعفانه .. يا قليلة الحيا..**

**لسلطان : ذبايات حقيرات حول مائدة حضرتنا امان ربى.. ذبايات حاسوسات..**

**لوزير :** الدبانه وقفت على طبق السلطان وقرزت بوزها في خروفه..

سلطان : امسك فلدا.. خلق فلدا.. اقبض حرس اضبط عسس.. اقل شياكات.. سنكر بوابات..

**الوزير :** أوعى تهرب الديانة، لحسن نروح في خير كانا..

**لسلطان : ذبايات خرسیسات.. تتجراً وتدخل قصر حضرتنا..**

**الذبايه : دانا غلبانه وجعانا يا مولانا..**

اسلطان : كلام يوك.. لازم اقبض أفندم على كل فلد خطط مؤامرات دنيئات مفعوعات من شان

دخول ذبايات قصر السلطان سلاطين اماره لاشي..

**الذبابه :** ززززززززززززززززز «وتقترب من وجه السلطان».

السلطان : تمردت.. لصوصيات.. نفذ جناب وزير أوامر حظرتنا.. ذبابات إعدامات..  
الوزير : أوامر جناب السلطان.. أوعو تخرج من القصر أى دبانه..  
السلطان : كمان فرمان.. قررنا نحن حبس دبانات جعانات جوه برطمانات.. ومعاها حيات  
ثعبانات.. تحركوا حظرات نفذوا أوامر حظرتنا..  
الذبابه : ززززززززز.. (تهاجم السلطان)..  
السلطان : اقبط أفندم حظرتنا عايز افترج على ذبابات ملعونات وهى مسجونة مع حيات شو  
تسوى أفندم..  
الوزير : عفوا يا مولانه.. الدبانه هاتعيش ويا الحيه والثعبان..  
السلطان : يعنى أفندم مزجات يوك.. اعدامات يوك.. ايه حل جناب وزير ندمان..؟  
الوزير : بسيطة يا جناب السلطان نخطها فى البرطمان..  
السلطان : وبعدين جناب فهمان؟؟  
الوزير : ومعاها ضفدعه..  
السلطان : عشان تلعب معاها فلده.. انت بتضحك على مولاك..  
الوزير : صبرك يا مولانا.. الضفدعه تاكل الدبانه والثعبان ياكل الضفدعه..  
السلطان : والحيه تاكل الثعبان.. شى جوال أفندم كده فرحات مرحات.. قلب حظرتنا بيقى فيه  
مسرات.. وتبقى ذبابات عبرات.. هاها.. هاها..  
(يخرج الجميع من خلف الكرفان وكلا منهم يحمل دميته ويواجهون جمهور الفرجه  
والمحلقيين على المسرح..)  
جحا : قلة قيمه.. حتى الفرجه على اللى نياكلوا جريمه... ولسه ياما فى الجراب ياوش الغراب يا  
باطشن يا ابن الحلال.. وراك وراك..  
معلق ١ : أما براوه عليك يا جحا.. أنا عازمك عندى..  
جحا : على إيه يا جميل..؟  
معلق ١ : على خروف  
جحا : وتجيسنى فى إزازة..  
معلق ١ : لا والله دانا أدبج لك عيل من عيالى..  
معلق ٢ : عليا النعمة من نعمة ربنا اللى انت بتقوله صح ويوجع أخينا أبو راس تخينا  
طارق : يالا ننصب فى حته تانيه.. أنا شامم ريحه البصاصين والعسس هاله..  
جحا : لموا العده يا ولاد..  
المحلقيين : نمره تانيه والنبي يا عم جحا الله يخليك..  
جحا : سبيونا نفوت يا ولاد.. لحسن ولاد الايه وصلوا.. وتبقى دى آخر نمره..

فتاة : وصلوا فعلا ياعمى.. اسبقوا انتوا وأنا ويا الناس هالهيهم بخمسه بلدى  
جحا : نتقابل فى سوق التلات يابنتى.. يالا يا طارق شيل معايا شيل..  
« اخفتاء مفاجيء مع ظهور العسس.. الذى لا يرى جحا الذى أخفاه جمهور المحلقين  
وتصبح الفتاة فى مواجهة العسس».  
العسس ١ : اسمعى يا حلوة.. شوفتيش.. ال..  
فتاة : «مقاطعه فى ليونه» شوفت يا خويا.. وعرفت مسخره وقلة قيمه.. وكنت عايزه أتفرج لكن  
الدلعدى جوزى منعنى..  
العسس ٢ : منعك من إيه .. يا جميل..  
فتاة : منعنى أتفرج عليهم انهارد هما لسه مانصبوش اللعبه..  
العسس ٣ : وإحنا داخلين وسامعين صوته.. أوعى كده خلينا ندور عليه..  
فتاة : ياخويا ما تدور عليه براحتك..  
معلق ١ : الظاهر الأخ عايز يتفرج على سلطانه  
معلق ٢ : سلطانه فى السلطنه  
معلق ٣ : والسلطنه ليه نيه  
عسس ١ : لم نفسك يا مواطن.. يا .. يا حر..  
معلق : روحوا دوروا عليه فى مولد سيدى طناش يمكن ربنا يلقك فيه  
عسس ٢ : كل من شارك فى الفرجه.. مجرم.. ومتستتر على المجرم المارق الذنديق الهارب جحا  
أبو الغصن ثابت واللى معاه..  
فتاة : ربنا يكفينا الشر.. بالأذن يا حاضرة المقدم..  
«تتنصرف.. وينصرف خلفها أحد العسس فيسحبه صديقه من ملابسه..  
عسس ٣ : كل واحد يروح لحاله.. يا بلد.. مش ناقصين قلق ووجع قلب «لأحد المحلقين» متتح كده  
ليه يا جدع انت..  
معلق : خلاص بح.. احنا مش موجودين. بالسلامة انتوا بقى.. «يختفى العسس باعطاء ظهورهم  
للجمهور.. ويتقدم باقى الممثلون لتسجيل هذه الواقعة»..  
طارق : وقعت الحادثه دى فى الدوله المباركه الامويه أيام الحاكم الباطش الجرى..  
فتاة : رغم بطشه ماخفش جحا... لكنه أصبح طريد.. شر الطريق..  
ممثل ١ : مطلوب لكل الولاه والسلطين وأصحاب المعالي..  
ممثل ٢ : أصبح عمنا جحا ضمير الناس.. وصوتهم الحى.. يكشف عورات النظام.. ويعبرى  
أساليب الطغيان..  
ممثل : وأصبحت شهرة جحا معروفه لأعدائه قبل أصدقائه..

طارق : وفى يوم من الأيام ياللى تصلوا على محمد خير الأنام..  
ممثّل : أصدر الوالى كالعاده فرمان بالقبض على عمنا جحا..  
فتاة : وعلى أعوانه وكل اللى بيساعدوه ويكافئه شىء..  
ممثّل : ولأنه ضمير الناس.. فتحو له قلوبهم ويوتهم..  
ممثّل : أصدر السلطان كمان فرمان.. يعاقب اللى يساعد عمنا جحا.. حتى ولو بالفرجه عليه..  
وأصبح اللى ينطق باسمه مجرم..  
ممثّل : ويعدّين ياللى تصلوا على النّبى الزين.. ساب جحا المدينة ونزل على بلد تانيه.. ومعاه ابن  
أخوه طارق المهلهل..  
ممثّل : قاصدين مدينة الأحلام.. يصحوا النيام.. فى حلم كان وكان  
المعثلون : ومن بين الناس.. دخل جحا واللى معا.. عايزين تشوفوه بصوا حوليكم تلاقوه..  
«استعراض حركى/ غنائى يعبر عن الكساد التجارى فى هذه المدينة)..  
١٧

«مع انتهاء الغناء والاستعراض يتحول المشهد للاداء الحركى الصامت، ونسمع على أثره صوت جحا وابن أخيه قادم من بين الجمهور».

**جحا :** ويعدين يا طارق يابنى، الحال ده مش عاجبني، كل ما نقدم خطوه ونبنى ينهدم من تانى الأساس، احنا ناس ولا مش ناس ببول ناس ولا.. والبلاد دى بلادنا ولا بدا العدا..؟! **طارق :** البلد دى أحسن من غيرها.. ندخل وأمرنا لله.

**جحا :** كل الطرق متاريس، والرزق فى المحابيس نص الدرك عسس، وحاميتها!!!.. وناس بوشوش غريبه من كل مله ولون..

**طارق :** كله يهون ماحدش هاعرفنا واحنامتخفين ياله خش على السوق ولا لسه خايف..

**جحا :** الخوف مش من ناسنا، الخوف من الغريبه.. اللي داهسين البلد وكاشفين عورتها وعروقتها.. فاهم..

**طارق :** فاهم وشايف وعارف ومش خايف، أجمد إنت خليك شديد، انت هاتكسكس ولا إيه بقى جحا المتين فى آخر أيامه يهتز وسط ناسه..

**جحا :** وطي صوتك.. أنا مش جحا.. أنا ضحا.. وانت طارق ابن السعيد ابن (طارق مقاطعا عمه جحا ومحاوره ارتجاليه بينهم ويمكن أن يشترك فيها الجمهور على تسمية جحا وابن أخيه كما يمكن محاكاة أى نادره معروفه لجحا فى هذا الإطار)

**طارق :** قدام الناس أنا سعيد وانت ضحا..

**جحا :** يالله نخش على السوق، نشوف لنا حبة ميه تروى عطشنا ولقمه ترد جوعنا، وبعدها يحلها من لا ينام ولا يغفل..

«يقتربا من حيز التشخيص.. بجوار محل الرجل الضرير الذى يرتدى نظاره سوداء.. ويكتب على حانوته «الصنف جاهز» يقف بجوار الرجل الضرير رجل طويل القامة».

**الرجل الطويل :** يا معلم فيه زباين داخلين علينا..

**الرجل الضرير :** هينتهم إيه يا ولد؟

**الرجل الطويل :** بقولك داخلين علينا أهم..

**الرجل الضرير :** لايسين ايه.. شكلهم ايه.. سامعنى ياطرش؟

**الرجل الطويل :** دول راجل ومعاه راجل تانى.

**جحا :** «وقد وصل أمامهم مباشرة» السلام عليكم..

**الرجل الضرير :** وعليكوا السلام.. أهلا.. انتوا مين.. غربا..

**طارق :** «يتقدم ناحية الرجل الضرير.. بينما الرجل الطويل بيتسم فى هدوء» ده عمى ضحا ابن الرشيد وأنا ابن أخوه السعيد..

**جحا :** احنا من عاصمة المعز «بصوت واهن» احنا أهل فن وعز..

الرجل الضرير : صوتك واطى ليه..؟.. عليه شوية.. «للرجل الطويل» سامع حاجه يا عبد السميع..؟

جحا : «بصوت مرتفع قليلا» أنا ضحا فنان وأدباتى وصاحب حرف «للرجل الضرير» واسم الكريم أيه؟

الرجل الضرير : أبو العينين أبو العينين..

جحا : أبو العينين أبو البصاير..!

أبو العينين : طلباتكم أيه.. الصنف جاهز؟

جحا : «بسخرية» طالبين ايد بنت الوالى للمحروس ابن أخويا!!

أبو العينين : صوتك ونبرتك وتهكمك.. مش غريب على ودانى.. ادينى ايد كده؟

جحا : «يقدم له جحا قدمه» خد !!

أبو العينين : انت.. عندما يلمس القدم يعرف شخصية جحا «أنتوا مين..؟»

طارق : احنا يا عمى من القسطاط... وعمى عالم لغه ومن أهل الطرب وجايين نعرض فنونا فى المدينة دى..

أبو العينين : أهلا.. «بصوت وإيماءة لها مغزى» أهلا وسهلا «ينادى بصوت مرتفع» ياسعدون.. أنت يا سعدون «يمسك بعضا بجواره ويبحث بها عن سعدون الذى يقف خلفه تماما ولا يسمعه..!!» ياسعدون.. خلاص قفلت السماعات.. يا سمكة.. انت يا بنت يا سمكة..

صوت سمكة من الداخل : أيوا يايا عايز أيه؟

أبو العينين : هاتلنا قلة ميه.. ووضبى مائدة للزبائن.. وخلي سعدون يدخلهم

جحا : احنا ضيوفك يا معلم مش زباين..!!

أبو العينين : عشا للضيوف الزباين يا سمكة!!

طارق : بارك الله فيك يا عمى.. يا أبو البصاير!

جحا : يا كريم الخصايل.. يا أصيل المعانى!! يا صاحب الفضائل.. «يحاول جحا أن يغنى فيصدر أصواتا مزعجة يضيق بها أبو العينين.. وبيتسم لها الرجل الطويل»

أبو العينين : «صارخا» الطعام يا سمكة.. قوام يا بنتى..

طارق : «لجحا» باين عليه راجل طيب «يشير بإيماءة معاكسه للمعنى» طيب جدا.. بس ضمنا العشا والنومه.. وهذا الصوت الجميل اللى جاى من جوه..

سعدون الخادم : «يشير باليد علامات سخط وتذمر من أبو العينين ويبدى حركات ترحاب وسرور بجحا وضيغه دون أن يراه أبو العينين تستمر احياءه وتعبيراته الحركية طوال فترة الحديث»

أبو العينين : الهمس واللمز.. عادة مزمومة.. نفسك فى كلمة قولها واتوكل على الله..

طارق : احنا يا عمنا بنشكر الظروف اللي قابلتنا فيك..  
أبو العينين : وده كلام يتهمس ياسعيد الحظ.. ويعدين كل شيء بحسابه وكلنا واقفين على بابه..  
ويا بخت من كان له فى الطيب نصيب..  
جحا : عداك العيب يا أبو لسان أديب وفعلك كريم..  
أبو العينين : أظن أن الرجل خفت من السوق.. مش كده برضه؟  
جحا : برضه..  
أبو العينين : وبقينا لوحدنا؟  
جحا : لوحدنا خالص.. «تظهر سمكه هذه الأثناء وتتنظر إلى طارق فى ود»  
أبو العينين : نكشف ورقنا ونتكلم فى النور.. ولا أيه يا عم جحا يا ابن غصن..  
جحا : وطى صوتك يخرب بيتك.. انت مين يا أبو العينين؟  
أبو العينين : أنا الجزار.. اللي بيدبح من غير ما ينزل دم الضحية..  
طارق : بتاع الفطيس!..  
أبو العينين : بياع وشارى ويتاجر فى اللحم الأبيض المتوسط.. واللحم الأسمر.. واللحم الزفر  
ياجحا..  
جحا : عرفتك يا نخاس السو.. صحيح عدت عليه ازاي ما انت كاتب على محلك الصنف جاهز..  
أه يا قليل الدين يا عدم المروءة.. طبعك ولا هاتشترية..  
أبو العينين : تيجى تصيده يصيدك.. الميه يا سمكه.. اشرب يا حكيم لسانك الفالت كشفك يا  
فصيح.. مقدرتش تخفى نفسك من الضرير..  
جحا : تستر علينا بكام؟  
أبو العينين : أشتري روحك  
جحا : روحى فى لسانك..  
أبو العينين : أضمن منين؟  
جحا : زورك اللي عايز حشه.. لو زعق هايلم علينا أمة لا إله إلا الله.. ونروح فيها..  
أبو العينين : وأنا هاكسب من ده أيه؟  
جحا : عاقل طول عمرك.. أه يا تغلب يا ابن النمس..  
أبو العينين : أضمن حقى يا حكيم! قولت أيه؟  
جحا : مع انى غيرت صوتى وهيئتى.. عرفتنى ازاي يا موسى يا ابليس..  
موسى : شميت ريحتك هالة عليه قبل ما تشرف، وسمعت صوتك. فركبت الصوت والريحة  
طارق : الحمد لله تعالى وقعنا فى واحد معرفتك! ولا كنا روحنا فى داهية!  
موسى : شوف يا ضحا.. حلوة دى.. يا ابن الرشيد.. حلو الكلام



طارق : شامم ريحة معاودة..  
 موسى : المنادى مشط السوق هو والعسس وعسكر الوالى.. وحيلتك خالت عليهم لما جيت معاك  
 المحروس ابن اخوك  
 جحا : تاويينا الليلة عندك.. واللى تطلبه احنا تحت أمرك  
 موسى : دانا بستتناك على أحر من الجمر يا معلم ضحا  
 جحا : طب عايزين ندخل قبل ما ننكشف ويخدونا على ملى وشنا  
 طارق : ما تعطينا يا عم موسى زاد وزواد ونرحل من دلوقتي.  
 موسى : وضبي العشا يا سمكه.. الضيوف باين عليهم جعائين ومستعجلين قوى!  
 طارق : (لجحا هامسا) أنا مش مطمئن للراجل ده.  
 جحا : (بصوت مسموع) ما تخافش منه أنا عارف هو ناوى على أيه.. قدرك يا ابني (فى هذه  
 الاثنا يدخل قائد الشرطة والعسكر وبعض العسس يبحثون فى أرجاء المكان.. ويتجهون  
 ناحية دكان النحاس)  
 عسكرى : سمعت المنادى يا أبو سمكه؟  
 موسى : أيوه .. اتفضلوا يا عرب.. دا حتى اخويا أبو طوق بلغونى بأن المنادى وصل شرق النهر..  
 اتفضلوا ذنجيل..  
 قائد الشرطة : وأخوك واقف بره ليه ؟  
 موسى : (فى ذكاء وسرعه) ناوى يقابل سيدنا الوالى علشان يعرض عليه فنونه.. ويرفه عنه..  
 علشان الظروف اللى انت عارفها.. قومت أنا قولت له أن مولانا سهرته بتبدأ وخرى..  
 قاصدى واخرى شويه. قولنا نساير فى الهوا شويه على بال ما ييجى الميعاد.  
 قائد الشرطة : (يقترّب من جحا ويتفحص وجهه) أهلا يا أبو طوق (لطارق) انت بقى أبنة طوق  
 طارق : أنا طارق ابن السعيد.  
 قائد الشرطة : (مقاطعا) ابن شولح (لجحا) لو شوفت راجل سحنه غبرة ولسانه قالت..  
 جحا : (مكملا) واسمه جحا أبو الفصن.. أطبق فى زمارة رقابه ونلم عليه خلق الله ونسلمه ليك  
 على طول..  
 قائد الشرطة : عفارم عليك يا أبو طوق.. (وهو يهم بالانصراف) سلام بقى (يتقدم عدة خطوات ثم  
 يعود مسرعا فى اتجاه الشاب طارق مباغته) قولت لى اسمك إيه؟  
 طارق : طارق ابن السعيد ابن..  
 قائد الشرطة : (مكملا فى فرح طفولى) ابن شولح.. (يضحك وينصرف وخلفه العسكر..  
 موسى : (بصوت مرتفع) مع السلامة يا عيوننا السهرانه.. (لجحا) أكل قلب ديب ولبيب واروب  
 والله..

جحا : كان لازم تدبسننا بحكاية مقابلة الوالى..  
 موسى : انت غشيم ولا حكيم؟ الهجوم أسلم طريقه للدفاع  
 طارق : ربنا يستر  
 موسى : العشا يا سمكة يا بنتى  
 صوت سمكة : خلاص هو.. السكة فاضية؟  
 طارق : ما فيش حد معنا غريب  
 موسى : هات الأكل يا سعدون  
 (تدخل سمكة وهى تحمل صينية عليها طعام وماء وخلفها الخادم سعدون)  
 موسى : اتفضلوا يا.....عرب  
 جحا : هاكل معاك انفى عنك صفة البخل  
 موسى : (وهو يلقي فى حلقه زيتونه) لا اعدمنى الله هذه الصفة.. لو قالوا عليه بخيل فا ده دليل  
 إنى صاحب مال.. ادينى مال وقول عليه أى اسم مش مهم.  
 جحا : برضه لو قالوا سخي فاده معناه الغنى والمال.. ويكده تجمع بين الحمد والمال أما البخل  
 فيجمع بين المال والزم.  
 موسى : وانا اخترت اخسهم وأوضعهم.. اسقيني يا سمكة.. لو قالوا عليه بخيل معناه إن المال  
 تحت يدى.. ملكى.. ولو قالوا سخي يبقى المال خرج من ايدى وانا المال عندى أعز من  
 روحى وولدى.. اسقيني يا سمكة يا بنتى  
 جحا : ها تقبض كام على حس توصلنا للوالى  
 موسى : نفع واستنفع.. رقبتك والا مالك؟  
 طارق : أهى ليلة وبعدها نرحل وحلال عليك أجزتنا من الوالى  
 موسى : اسقى الحبايب يا سمكة.. (ينادى) يا سعدون انت روح فين يا ولد  
 طارق : اسقيني يا حلوه  
 سمكة : (لطارق) عطشان..؟ (ينظر لهما الرجل الصامت فى ود بالغ)  
 طارق : اروينى الميه من ايدك زمزم.. بارك الله فى جمالك.. يا بنت الأمره..  
 موسى : انت هاتاكل ولا هاتغازل يا حديق..  
 طارق : (وهو لا يزل ينظر إلى سمكة) العيش لذىذ بالزيت والزيتون.. وطعم والميه يا عمى من  
 حوض فى رياض الجنه.. ومن ايد حور عين.  
 موسى : عيئك يا ولد.. ان شبعوا غنوا.. شيل.. شيل يا سعدون الصنيه؛ الجماعه شبعوا سمعنى  
 يا بجم (ينظر لجحا فى سعادة)  
 جحا : (لطارق) ده ممكن يبيع روحه فى سبيل المال

موسى : سمعتك يا لثيم.. ممكن أبيع.. مضطر .. لوليه (طارق) عيون ذى عيونك اللى يندب فيها  
سهم.. (ولجحا) ولا عليه عافيتك يا حكيم ومفلس.. آه.. يا صبر ايوب عليكم.. يا سمكه  
الجماعه شبعوا شيلى الصنية.. (يقف ويقف بعده جحا وطارق.. بينما سعدون وسمكه  
وطارق يتبادلون النظرات)

طارق : ما أجمل القدر السعيد اللى حدفنى على جنتك

جحا : (متبرما) جينا للهلاك برجلينا.

طارق : أجمل هلاك

موسى : الدار داركم

جحا : (برياء) ونعم الدار!

موسى : فى حدود استطاعتى.. وعلى رأى المثل.. جود من الموجود

جحا : يا جواد يا كريم..

موسى : عامل ليكوا تخفيض هایل.. الليلة بخمسين فلس..

جحا : أهلا بالجواد

موسى : فى اتنين.. يبقى ميه وخمسين فلس.. والعشا ميتين.. على اتنين

جحا : كريم من عنصر كريم

موسى : وتنين وتامنين فى الميه خدمه.. يبقى المجموع عشرين دينار..

جحا : ونعم الكرم وحسن الضيافة.. طب خذ سجل (يناوله طرطوره)

موسى : أيوه.. طب امضى هنا على الصك ده.. (ويخرج له ورقة من صدره)

جحا : بكره.. بكره تقبض لما ناخذ فلوس من الوالى.

موسى : كل اللى هاتخذه من نصيبى.. والا.. (تسمع صوت ضحك طارق وسمكه وسعدون) يا  
سمكه انتى لسه هنا.

جحا : ايه يا موسى.. هانام بره ولا أيه؟

موسى : وبيات ليله يبقى المجموع ثلاثين دينار

جحا : الطبع غلاب. هنام واقفين فى الشارع.. ولا فى السجن؟

موسى : السجن.. دارى.. دارى فى آخرها جنينة شرحة وبرحه ترد الروح.. وتقضى من الحبايب

ألف (ينادى) يا سعدون وري الحبايب المنامة.. أصل دارى كلها غرفة واحدة وما يصحش

ناس غريبه يناموا وسط الحريم..

طارق : (وهو يدخل خلف سمكه) عداك العيب يا عم موسى.. يالا يا عمى

موسى : دليلهم يا سمكه. معاهم يا سعدون.. زى ما قولتلك

جحا : واهى ليلة تقوت ولا حد يموت.. (يدخلون جميعهم إلى الداخل وفى هذه الاثناء يدخل

العسس.. متلصصين يسترقون السمع. ويقتربون من جدار دار موسى)

عسس ١ : خلى بالك انت وهو لازم ترجع بيهم قبل الفجر..

عسس ٢ : زمانهم نايمين وبياكلوا رز ولبن مع الملائكة..

عسس ٣ : اطمنوا الكلام أبو زالف قائد شرطتنا الذكى .

عسس ١ : هاينشرح قلب الوالى لما نجيب له جحا.. ومش بعيد نحصل على هبة ويخلع علينا.

عسس ٢ : (يضع أذنيه على جدار موسى النحاس ويسترق السمع.. ويشير لهم بالصمت..)

هس.. هس..

عسس ٢ : سامع حاجة (ويصوت هامس) سامع حاجة جوة؟

عسس : سامع شخير.. وهمس حريمى (يقترب الباقون بجوار الجدار)

عسس ٣ : (ينتصب واقفا فى غضب) ما فيش صوت.. لابن الجنية.. الظاهر والله أعلم النحاس قبض منهم وهريهم..

عسس ١ : نهجم عليهم مرة واحدة.. ده أحسن وقت للهجوم.. الكلام ممكن يخذنا ونرجع بخفى حنين.

عسس ١ : ده ملعوب من ملاعيب جحا

عسس : أية رأيكم نبليج الوالى من ورا دهر أبو زالف.. ونلهف المكافأة.. ونحصل على رضا الوالى.

عسس ٣ : محناش قد قائد الشرطة.. ده يا خونا ممكن يخذونا أو يسجنونا ونروح فيها.

عسس ٢ : طب أنا هادخل متسلل من الجنينة واسحب.. واقبض عليه دا راجل عجوز نجره على قصر الوالى.

عسس ١ : انت لوحك مش كفايه.. انت ناسى ان معاه شاب.

عسس ٣ : التعليمات اللى عندى صريحة.. تأمين المكان ومنع جحا من الهروب.. وأنا هانفذ كل التعليمات وبس.. واللى ها يخالف الأوامر أنا هاقبض عليه مفهوم الكلام.

(اثنا حديثهم يدخل من الجانب الآخر رجلان فى ملابس الدراويش ولا يراهم العسس فى البداية)

الرجل الأول : يا مولاي أنا شرفته.. جحا بلحمه ودمه ولسانه. لوما.. أخذه يا مولاي الزفر.

الوالى : اسمعى قائد شرطات حضرتنا.. لوما كانش فلدا جحا داخل حجرات.. انتى عارفه تصرفات حضرتنا.

قائد الحرس : رقبتي قصادة يا افندينا.

الوالى : رقبات مش كفاية.. فيه خوزقات.. فيه إعدامات.. فيه خراب بيوتات قائد شرطات.

قائد الحرس : فاهم جانب الوالى.. بس وطى زور حضرتكم أحسن فيه ناس جانبينا يكشوفونا.

**الوالى :** جناب والى مش يوطى صوته قلد.. جناب والى مش يخاف أبو تالف.  
 (يكتشف العسس وجودهم.. فيقبض عليهم على أنهم جحا وابن أخوة)  
**عسس ١ :** ضبطك يا جحا يا ابن اللثيم.. مسكتك يا ابن الجنية (يمسك فى تلايبب الوالى..)  
**عسس ٢ :** (وهو يمسك قائد الحرس) تعالى يا ابن جحا فكرنا نايمين ولا إيه.. دا احنا عيون الشعب السهرانة.  
 (يحاولان الهرب والتخلص من العسس)  
**عسس ٣ :** ولا حركة المكان محاصر.. مفيش داعى للمقاومة  
**عسس ١ :** كشفناك.. كشفنا حيلتك يا جحا.. عايزين تهربوا واحنا ناخذ بنمبه  
**عسس ٣ :** (موجها) حديثه لعسس ٢) كنت عايزينا نخش الدار.. ويفلتوا من ايدينا .. يا فالح  
**عسس ١ :** احنا فيها يا جماعة ناخدمهم ونسلمهم للوالى.. وندى أبو زالف الغبى بمبه  
**عسس ٢ :** فكرك الوالى عايز جحا ليه؟ اقولك .. الوالى شايل الهم من بعد مراته الأميرة ما هريت مع العبد الصالح.. وعمك جحا داير يحكى الحكاية لطوب الأرض .  
**عسس ١ :** لا يا أبو العريف.. الحكاية وما فيها عمك الوالى عايز عمك جحا يسليه بالتريقه على خلق الله من ولاد البلد.. وبعدين لما يخلص جواديته يخوزقه..  
**عسس ٣ :** الأوامر واضحه ناخدمهم على السجن طوالى.  
**عسس ٢ :** نقبض بالمرّة على النخاس موسى وبنته.. ما هما متسترين عليهم وهربوهم.  
**عسس ١ :** نقبض على موسى ولا بنته؟  
**عسس ٢ :** المطلوب البغل ده (مشيرا للوالى) والجحش ده (مشيرا لقائد الحرس) إيه يا جحا ساكت ليه ما اسكت الله لك حس.. فين لسانك الفرقلة.. وانت يا جحش البرك.. طولت ليه؟ ورينى وشك العكر.. مكسوف يا عين أمك؟  
**عسس ٢ :** أنا هاكسر أم الأوامر ويخبط دماغه فى الحيط.  
**عسس ٣ :** هو مين اللى يخبط؟  
**عسس ٢ :** أبو تالف.. أنا هاجيب موسى وبنته.. وكفايه عليه من الغنائم السنيورة وانتوا معاكم الجمل بما حمل.  
**عسس ١ :** (للوالى وقائد الشرطة) انتوا نزل عليكموا سهم الله.. اتخرستوا ولا أيه؟ يا اعداء الوطن والدين.. فين لأعيبك يا جحا؟  
**عسس ٣ :** احنا معانا جحا وابنه.. وده المطلوب .. يلابينا على السجن والصباح رياح ياخدمهم أبو زالف وهو حر فيهم. إن شالله يديهم فرسين ويهربهم ، مفهوم؟ (للأول) يا لا بلاش لكاعه..  
 (لثانى) مدائ وشك ليه مكسوف .. يا أبو وش مكشوف.  
**صوت موسى من الداخل :** يا حرس يا عسس.. يا ناس يا هوه.. يا خرب بيتك يا موسى.

عسس ٣ : ما تخافش يا نخاس.. احنا قبضنا عليهم.. قبل ما يهربوا  
 (يظهر موسى وخلفه سعدون الذى ينظر لهم فى شماته وتشفى)  
 موسى : قبضتوا على مين يا اخويا؟  
 عسس ٢ : جحا وابنه.. كانوا عايزين يهربوا. متخفين فى هدم الدراويش..  
 موسى : طب وسمكه بنتى وياهم؟  
 عسس ٢ : هى سمكه كانت معاهم؟  
 عسس ٣ : دول بس اللى قبضنا عليهم  
 موسى : بنتى سمكه (ينظر تجاه سعدون) دانا رابطهم بأديا دول.  
 عسس ١ : يمكن سمكه هى اللى هربتكم وهربت معاهم؟  
 موسى : ازاي دانا حاطط ليهم بأيدي عشرة جرام منوم فى الشاى. قبل ما يناموا عشرة جرام  
 يهدوا جبل.. والهلل ده كان حرسهم  
 عسس ١ : وضح كلامك يا راجل يا خرفان انت؟  
 موسى : (يقترب من الوالى) ازيك يا جحا.. هما فين.. صحين ولا نايمين (لسعدون) هاربوا منك يا  
 قالح.  
 عسس ٣ : الظاهر هما لسه نايمين بفعل المخدر.. ما نطقوش ولا كلمة من ساعة ما مسكتاهم..  
 موسى : انت فين يا جحا.. (لطارق) خطفتها يا دهل.. سحبته بلسانك الساحر ميلت دمغها..  
 عايز تاخذها بلوشى.  
 عسس ٣ : خطف البنات الحرائر جريمة جديدة يا جحا  
 موسى : (يمسك فى تلايب الوالى) هاكل من لحمك بسنانى.. ودبت سمكة فين؟  
 عسس ٢ : ودبت فين وأنا أجيبها ونخفف عنك الحكم؟  
 عسس ١ : دول ما ينفعش معاهم غير ده (مشيرا إلى كبراج يطرقع به عدة مرات)  
 عسس ٢ : الخذوق منتظرهم.. وهايترفوا بكل شىء  
 موسى : أنا عايز بنتى لحمى.. وفلوسى اللى صرفتها عليهم مية وخمسين دينار من حر مالى  
 (يهجم عليهم ويكشف وجوههم أمام مفاجأة الجميع) سكتوا ليه بتتآمروا عليه معاهم...  
 انتوا بتكرهونى ليه.. يا ولى العدل.. يا قائد الحرس.. يا ناس يا هوه..  
 الوالى : جرسات.. تغفلت.. حظرتكم يقبض على حظرتنا ونسمع اهانات.. ونبقى ملطشات..  
 موسى : يامولاي؟!  
 الوالى : كلام يوك  
 قائد الشرطة : (للعسس) عايز تدينى بمبه يا عسوس يا خاين.. طيب؟  
 الوالى : (لقائد الشرطة) سوس فلد.. انتى سبب مصيبات.. كرتات.. بلوات مسيحات.

**موسى :** أنا يا مولاي كنت منومهم وربطهم. عشان أسلمهم لجنايبك واخذ المكافأة..  
**قائد الشرطة :** يعنى عارف من البداية أنه جحا وأخفيته.. دى جريمة تستر هاتتعاقب عليها.  
**الوالى :** فرمانات سلطانيات.. تبدأ هجمات شرسات على منزل فلد نخاس. تقبض على فلد جحا وينت سنيورة. نفذ قائد شرطات فى الحال.. بسرعة فلد قبل فلد جحا ما يصحى فلد.  
**عسس ٢ :** مش قولتكم من الأول نهجم (يتجه قائد الشرطة والعسس للدخول فى منزل النخاس حتى اختفاهم)  
**موسى :** العفو والسماح يا مولاي الوالى.. أنا نيتى كانت خير واللهم كنت ناوى أجيبهم لحد عندك من غير ما تكلف رجلك الشريفة عناء المشوار.. لكن لما سمعت الهيصة والدوشة. افكرت أنهم هربوا ومقبوض عليهم. والى حصل غصب عنى.  
**الوالى :** نخاس خرسيس غلباوى وقح.. صرصار كلام.. تعرف فلد جحا مش موجدات .  
**موسى :** موجود بإذن الله يا مولاي. اطمئن كده وخلي فى قلب حظرتكم بطيخة صيفى.. دول يا مولاي عشرة جرام منوم يهدوا فيل.. هانقبض عليهم بإذن الله بس ساعتها ماتنساش عبيدك الفقير.. ومكافأتى عليهم وفلوسى اللى صرفتها عليهم مية وسبعين دينار.. ذائد تمنين فى الميه خدمة.  
**الوالى :** اسمعى نخاسة خبيثة.. انتى عندك سنيورة سمكة.  
**موسى :** خدمتك وجريتك وعابدة إحسانك.. تخدم تحت رجليك يا سيد ياوالى.. ده شرف ليه ولأهلى من بعدى.  
**الوالى :** شى جوزال افندم.. قبلنا هديات حظرتكم..  
**موسى :** يا جنايب الوالى.. ده خرب بيوت دا أنا دافع فيها رأسمالى.. د غير الأدب والرقص.. و..  
**الوالى :** سنيورات رقصات.. تعرف تعزف مزيكات.  
**موسى :** دى يا مولانا تحفة عصرها وأوانها.. جمال أيه.. وعلم زيه.. متكلفة كتير يا سيدى الوالى.  
**الوالى :** موسى نخاسه.. انتى مش اقدر تغير من طبع حظرتكم. كرم يوك.. انتى واهلك عبيد أموال حظرتنا..  
**موسى :** احنا عبيد رحمتك وعطفك يا مولاي.. خدمينك ومحبيتك (يخرج هذه اللحظة قائد العسس والحرس منكسى الرأس)  
**الوالى :** فى فلد جحا.. مضحكاتي مصهللاتى.. قرداتى.. قراقوز.. وفين سنيورات أمورات تعزف نغمات؟  
**عسس ١ :** مفيش  
**موسى :** راحو فىن هربوا يا أبو زالف

قائد الشرطة : فص ملح وداب.. الأرض انشقت وبلعتهم  
الوالى : فتش شقوق أرض فلد.. وهات سنيوره فنانة قلب حظرتنا اتعلق بيها فلد سرور يوك  
موسى : بنتى.. فلوسى.. شقى عمرى (لسعدون الذى يبتسم فى مرح طفولى) هربوا منك يا فالح  
وانت نايم على صرصور ودائك.  
الوالى : اسمعى أبو تالف.. انتى مسئولة أمام حظرتنا.. قبل أن يطلع فجر صباحات جديدا  
يكون فلد جحا.. وسنيورة فى قصر حظرتنا.  
عسس ٢ : أنا كنت عايز أنوط.. على السور من الأول قبل ما يفلسعوا  
أبو زالف : (للعسس) قدامى يا عرة خلقه انت وهوه.. اتفضل يا جناب الوالى (يتحركون فى  
اتجاهات مختلفة وسط المحلقين ويلفون ظهورهم.. ويهيا الآخرون المكان للتعليق على  
الواقعة والتمهيد للمشهد القادم.. مع ستار جسدى).



طارق : وفى اليوم السادس والعشرون من ربيع..  
وردة : قدر معنا جحا يهرب هو وابن أخوه بمساعدة الخادم الطيب سعدون.  
ممثل : ولولا سمكه صاحب الحيلة الذكية التى بدلت ازازة المنوم بإزازة مية الورد مكشتم الهروب..  
سعدون : كنت عايز أهرم عاهم لكنهم أخذوا سمكه معاهم وسابونى.. لحكمه يعلمها جحا.  
طارق : وكان يا سادة يا أخبار ياللى تصلوا على المختار للتاجر المرابى موسى علاقات مشبوهة وأعاون فى القصر السلطانى وديوان الوالى..  
ممثل : ودايما القصور مليانة تعاين.. وسرايب.. وألاعب..  
وردة : وبالمكر والحيلة قدر موسى يسيطر على الراس الكبيرة المدبرة للحكم فى ديوان الوالى القلبان.  
ممثل : أمثال الوزير ندمان الأروب الألعبان..  
طارق : وباقى المؤثرين فى الحكم استطاع يغريهم بالمال والحريم والديون..  
ممثل : واللى ما يقدرش عليه ينصب له الخية  
سعدون : واللى يقع تحت ايده مايرحموش.. يفضل زليله لغرض فى نفس يعقوب..  
طارق : وفى الليلة السادسة والعشرون من ربيع..  
وردة : كانت خيوط مؤامرة دنيئة بينسج خيوطها موسى النحاس والوزير ندمان..  
ممثل : صفقة مصالح «تقدم ممثل ليشخص دور الوزير ندمان ويرتدى أمام الجمهور بعض ملابس وقطع اكسسواره بما يوحى بالشخصية)  
ممثل : والوزير ندمان ياللى يتصلوا على النبى اعدنان.. غرقان لودانه فى مسلسل الخيانة.  
ممثل : طمعان فى عرش مولانا..  
وردة : والآن يا سادة يا كرام.. هانشفوف قوام.. ما جرى بين أم سته.. «تتقدم من بين الممثلين شخصية أم سته لأداء الدور» والوزير الخاين.  
الممثلون : الصفقة المشبوهة «يشكل الممثلون بأجسادهم مشهد الخيانة وبها موسى والحرس».  
أم سته : لولاك كان زمانى فى السجن ياندمان!!  
ندمان : المصلحة واحدة يا أم سته.. ووجود جحا بيهددنى.. الخطر عليك وعليها.. وجوده يباخر القصد والمطلوب..  
أم سته : قلت من ايدى المرة دى .. لكن همتك يا كبير. عايزينك تخلصنا منه قبل ما يعطل المشروع.. واحنا علينا باقى أتباعه..  
مع انتهاء الغناء يتحول الممثلون إلى عمل صندوق وخيمة العرض بأجسادهم فى محاولة لمساعدة جحا ومساعديه.. ويمكن أن يقوم بعضهم ضمن من يقوم بأدوار داخل لعبة

الصندوق إلى جانب دورهم كمشاهدين ويمكن أيضا أن يؤدوا أصوات ٣.٢.١، وحسب تعليمات مخرج العرض».

(أغنية جلا)

جلا جلا.. جلا جلا  
قرب وشوف      شوف يا ولاه  
جوه الجراب      عامل حجاب  
للى غاوى      البهدله  
جلا جلا.. جلا جلا  
جوه الجراب      هاكشف أصول المسائله  
عايزين نشوف      ساعة الحساب  
ازاي تكون الأسئله  
جلا جلا.. جلا جلا  
الظلم والى      والموالى متنبله  
والحق عالى      والمعانى سنبله  
جلا جلا.. جلا جلا  
تعالى شوف المرجله      إحنا بتوع المرجله  
عندى حكايه      من البدايه منيله  
جلا جلا.. جلا جلا  
سلطان زمانه      كانت عيونه مفتحله  
جنيت جنانه      بالفنون والمشكله  
جلا جلا.. جلا جلا  
بيسد بابيه      ويطلق كلابه  
عامل حسابيه      واحنا القضييه المعضله  
جلا جلا.. جلا جلا

ندمان : أم ستة بعثت المطلوب ليلة امبارح.. وكانت منزعة أما سمعت اسم جحا..  
موسى : لو كانت فى البيت.. كان زمانا مخلصين عليه..  
ندمان : بس نتلم عليه بدرى.. قبل ما الناس تتعلق بيه وتسمع له.. حكايته ها تكشفنا ياموسى..  
موسى : الناس بتساعده على الهروب بتخفيه.. لازم نعمل حاجة وبسرعة..  
ندمان : عايز أهدى رأسه هدية متواضعة لأم ستة..  
موسى : وأنت الكرسي يليق بيك.. يا كبير.. أنا هاوصيها عليك. وأهديك الجارية سمكه.. حلال عليك..  
ندمان : وأبو زالف هاتنسيبه بيرطع.. راسه ناشفه وييلعب على الحبلين..  
موسى : ديتة معروفه. صبرك عليه شويه.. أنا هاشده لصراع تانى هايلييه فى مشاكل ما يعرفش يخلص منها.. وهايصفا لنا الجو..  
ندمان : موسى - البنت الجارية تعرف أسراركم؟  
موسى : الخيبة انها تعرف كثير.. بس دى أمرها سهل..  
ندمان : لولاها كان زمان جحا فى خبر كان..  
موسى : السلطان غرقان فى ملذاته وساييلك دقة الأمور وأنا بعث لاصدقائى يحضروا له مفاجأة عمره..  
ندمان : الوقت سرقتنا واحنا ورانا مهمة ثقيلة أنى هامشى من الطريق ده.. وانت اخلع من هنا..  
«ويختفيا فى اتجاهان مختلفان مع ظهور جحا وطارق وورده»  
جحا : وضبت العدة..  
طارق : بقى لنا مدة..  
جحا : حفظتى دورك يا وردة  
وردة : ودى عايزة شطارة.. حكاية الكلاب الصديقة  
جحا : كذب مساوى ولا صدق مفركش.. طلع الشيك بيكا..  
ممث : أصل الحكاية..  
ممث : كان فيه مدينة.. باكملها مدينة..  
ممث : وفيها ناس بدينه من أكل حقوق البشر..  
طارق : وفى المدينة سماوى كلاب.. يسم الكلاب واللى يسمه يقطع ديله..  
وردة : ويقبض على كل ديل دينار من الباب العالى..  
جحا : وفى يوم يا سادة يا أخيار ياللى توحدوا الواحد القهار خلصت كلاب البلد..  
طارق : إلا كلب..  
ممث : كلب أرمنى دماغه وألف سيف يعض الوالى..

جحا : حير كلبنا أفكار السماوى.. كل يوم ينبج..  
«يتحول الممثلون بأجسادهم إلى صندوق الدنيا الذى تخرج منه عرائس التشخيص .. مع  
سماع نباح الكلب.. «هو هو هو هووووه  
وردة : كل يوم ينبج عند الفجر..  
ص النباح : هو هو هو هووووه.. «يسمع هذا الصوت من داخل الصندوق»  
طارق : «من داخل الصندوق فى خيال الظل» تنبح كلاب المدينة الصديقة ع الوالى.. يصحى  
صاحبنا مرعوب حزين ويستدعى وزيره.  
«تظهر دمية الوالى يستغيث مع صوت نباح الكلب..»  
دمية الوالى : الحقنى وزير.. الحقنى غفير «تظهر دمية الوزير» فينك وزيرى ندمان..  
دمية الوزير : خير جناب الوالى.. أدام الله عمره.. خير يا مولانا..  
دمية الوالى : سامع نباح فلد.. كلاب سعراة أفندم..  
دمية الوزير : دى نباح الكلاب الصديقة ما تخافش يا مولانا..  
دمية الوالى : أوامر حظرتنا مش تنفذ ولد وزير.. هات سماوى كلاب حقير.. واقطع له رقبات من  
شان هو ساب كلاب تنبح فلد..  
دمية الوزير : السماوى شايف شغله يا مولانا والكلاب السعراة على الحدود.. كل كلابنا معدومة  
يا مولانا!!  
دمية الوالى : لازم تسكت هو هوات.. حظرتنا من أقدر ينام فلد..  
دمية الوزير : يا مولانا هو كلب واحد مش قادرين عليه.. هو يهو هو ترد عليه كلاب المدينه  
الصديقة..  
دمية الوالى : كلب خلبوص.. اقطع له رقاب من شان يبطل فلد.. هو يقول عايز أعض والى  
أفندم..  
دمية الوزير : أمرك يا جناب الوالى.. هى مسألة وقت ونقضى عليه وعلى اللى بيحرضوه جنابك!!  
«يسمع من الداخل نباح الكلب»  
ص . نباح كلب : هو هو هو هووووه..  
دمية الوالى : أمان ربى أمان كلب سعراة فى قصر والى.. أمان ربى أمان..  
دمية الوزير : يا حراس.. يا قائد الشرطة أقبض على الكلب الإرهابى المجرم فى الحال واضرب  
فى المليان..  
ص . نباح كلب : «يقترّب أكثر» هو هو هووووه  
دمية الوالى : الحق فلد.. الحق مولانا ندمان.. الكلب عايز يعض حظرتنا.. حظرتنا خايف فلد..  
(تتحول العرائس إلى فريقين - جماعة جحا وجماعة موسى)

أصوات الكلاب : هو.. هو .. هاو..  
 كلب بلدى : هو هو هو .. أمشوووووا  
 كلب غريب : هو هو هو .. امشوا انتوا ووا  
 كلب بلدى : دى م ش بلدكوا  
 كلب غريب : ولا بلدكوا  
 كلب بلدى : هو هو هو .. الأرض أرض أبونا  
 والغرب يطردونا .. فارقونا .. اتهوووووا  
 كلب غريب : هو هو هو .. احنا اللى دخلنا سلطانكوا  
 كلب بلدى : هو هو هو .. سلطان واحد من ديولكوا  
 كلب غريب : هو هو هو .. قاعدين على قلبكوا ..  
 (يظهر الديب الكبير مصدرا عواء..)  
 الديب : أووووا .. فى حضوري منوع الكلام الكل تعظيم سلام.. أنا النظام .. اللعب ده مش تمام..  
 كل كلب يلم ديله ويختشى  
 ك . بلدى : (معارضاً) هو هو هو ها ها  
 الديب : أنت يا كلب بتعترض .. هانشوا عليه – أدبوه خلوه قطه  
 ك . بلدى : (يعترض) هو هو .. ها ها .. (تهجم عليه الكلاب الغريبة)  
 الديب : هاتبقى عبره لمن يعتبر .. لموا الصوان .. فضوا المكان .. خلصت اللعبة الغيبة .. احنا الارادة  
 القوية .. احنا الدراع المفترية .. واللى يهوهو من غير إذن مننا .. نقطع خيوطه .. ويبقى  
 موته .. بأمر صادر مننا .. اليو بتاعنا .. لعب نو .. والجد نو والأس .. يعنى استسلموا  
 تسلموا والرايه .. فنش .. يعنى فينتوا .. فهمتوا .. يا كلاب قصرنا ... فركش بقى .. نيام..  
 نيام .. (يختفى الديب) بينما الكلاب البلدى تنسحب وتجلس منهارة)  
 الكلاب البلدى : «تعدد» شقع يقع يارب تقع .. شقع يقع .. يارب تقع .. شقع يقع .. يارب تقع..  
 طارق : (يخلع القناع) وكان ياما كان  
 جحا : (يخلع القناع) اصل الحكاية..  
 دمية الوزير : ما تخافش يا مولانا .. حالا هانقبض عليه..  
 دمية الوالى : بسرعة فلد..  
 ص. نباح كلب : «يقترّب أكثر فأكثر من داخل الصندوق بينما باقى المحلفون يجلسون فى حيز  
 الفرجة .. «هو هو هووووه»..  
 «يظهر فى خيال الظل أو مع العرائس دمية الكلب فى يد قائد الحرس»..

قائد الحرس : اطمن يا مولاي قبضنا على المجرم الارهابي.. أهوه يا مولاي.. الخاين عدو السلام..

دمية الوزير : خيبك الله يا قائد الحرس..

دمية الوالي : تشكرات أفندم تشكرات.. كلب خاين اعدامات..

دمية الوزير : حاسب يا قائد الحرس.. ده مش الكلب السعران..

دمية الوالي : أمال دي كلب مين فاد..

الوزير : ده كلب الدولة الصديقة.. جبناه يا كل الكلب.. الكلب السعران

دمية الوزير : أمان ربي أمان.. وبعدين وزير مين ياكل كلب دولة صديقة ندمان.. «يخرج من

الصندوق جحا ووردة ومساغدين وفي يد كل منهم دمية التشخيص»..

جحا : الكلب الصديق لما كلاب البلد الصديقة وملوا البلد كلاب صديقة..

طارق : وكان ياما كان كان فيه سلطان..

معلق ١ : الله ينور عليك يا عم جحا.. أدى الحكايات اللي هيه.. فاهمين الفولة يا جميل..

جحا : والفولة من عند الغولة..

معلق ٢ : والفولة عايز الشاطر حسن

جحا : العبرة عايز قدرة.. والقدرة عايزه مهره.. والمهره عايزه الساييس..

طارق : والساييس لا يصح حاييس..

جحا : مطمئن للحواديت..

معلق ٣ : الحواديت عايزه النباييت.

معلق ٤ : والنباييت تطرح زرنينخ

معلق ٥ : والزرنينخ يسم الكلاب الغريبه

معلق ٦ : نقطع داربهم..

معلق ١ : ونسلخ وابرههم..

معلق ٢ : يخفى أثرهم..

معلق ٣ : «مع ظهور عسس الوالي».. أدى كلاب الوالي وصلوا!!

جحا : عليهم بقى.. خلينا نشوف سكتتنا..

وردة : ياللا من الطريق ده..

طارق : سكة أبوزيد كلها مسالك..

جحا : والطريق مليان مهالك..

معلق ٤ : طريق السلامة يا عم ياعمنا..

جحا : سمى وعدى.. ربنا يستر علينا كلنا..

«اختفاء تدريجى لجحا والبطانة مع ظهور العسس على هيئة كلاب تتشمم المحلقين بحثا عن جحا.. وأتباعه.. بينما يختفون خلف الستار الجسدى عدا من يقوم بالتعليق من وراء الحدوتة»

طارق : وفى اليوم السادس والعشرين من جمادى الثانى..  
ممثـل : «فى انفعال مصطنع» اسمعوا يا جماعة ما تيجوا نغير سير الحكاية ونحكى حاجة عن الواقع المعاصر..

ممثـل : الواقع.. واقع.. والمعاصر معاصر.. والمعاصر مجازر..

وردة : احنا فوق الواقع..

طارق : احنا قصاده بس مش مرايا.. احنا عدسه ومش حكايا.. احنا بنقرب البعيد..

ممثـل : ونور عاللى جى.. من بكره الحى.. ونغذيه يطرح مرايا..

ممثـل : والحكاية سهرايا.. بتجمع الأحباب وتناجى أولى الألباب..

جحا : وبعض الحكاوى تقاوى.. ومش شرط طبيب مداوى..

وردة : نور ونار.. حكاياتك يا عمى..

طارق : كالنار فى الحطب.. شبت حكايتك..

ممثـل : بقت على كل لسان

ممثـل : أما الوالى والسلطان..

ممثـل : أصبح غضبهم بركان.. وسريه كابوس..

طارق : وضاق الخناق على عمنا جحا المشتاق..

وردة : اختفى فى بيوت الناس.. يعرض فنه بلقمته..

ممثـل : وتهمته حكمته..

ممثـل ٢ : والسلطان والوالى.. محاصرين خطوته..

جحا : ورغم كل ده جحا.. ما فقدش قدرته.. ولا كلت همته.. وفى الشدة تظهر فطنته..

وردة : كانت فى جمعبته حيله ذكيه.. جريئة وطريفة..

طارق : عرضها عيني عينك فى سوق المدينة..

المعتلون : تعالوا معانا نشوف ما جرى وصار.. ونتابع الأخبار..

## اللوحة الثانية الجزء الثانى

«يظهر جحا وطارق ووردة فى جانب من المسرح»

**جحا :** اسمعيني كويس يا سمكة يابنتى.. اللى انت عمليته معانا يدل على نبل أصل.. وحكمه ما بتتفكش مع أبوكى موسى..  
**سمكه :** أنا مش سمكه.. أنا ورده.. وكمان أنا مش بنت موسى. أنا بنت ناس طيبين..  
**طارق :** ورده حكى لى يا عمى.. عن حياتها... وعن البيت اللى كانا فيه.. وازاى أتباع موسى خطفوها وهى طفلة.. وسرقوا البيت وطردها أهلها..  
**وردة :** كل حته فى البيت حته منى.. رفضت أسبيه. واستحملت أعيش تحت رحمة النحاس..  
**جحا :** ما انت سبتى له الجمل بما حمل..  
**طارق :** مين اللى قال كده..  
**ورده :** أنا خرجت المره دى علشان بقيت أقوى بيك ويطارق.. وعارفه إنى راجعه لدارى ومعايا أهلى.. أنتم!  
**جحا :** خد وطالب.. شبر أرض ولا عشرة على الشجر!!  
**وردة :** كل ده حلم.. حلم جميل ويعيد.. لكن شايفها قدامى.. وشمه ريحة البرتقان.. وقلبى بيدق مع كل معصرة زيتون..  
**طارق :** أدى إيديا أهيه خيال ومهرتى سمرة..  
**وردة :** معاك هانفتح الأبواب..  
**طارق :** عدينا البحر.. ولسه الجبل.. هانت يا ورده  
**جحا :** نفس أصلى هناك.. إن بكره لى عايزه قريب..  
**وردة :** أنا أول ما شوفتك حسيت أنك السندباد اللى ها يخطفنى وينقذنى من إيدين الغول موسى!  
**طارق :** جمال روحك.. وصفاء عيونك.. أسرو روحى..  
**جحا :** يا روحى يا روحى.. أنا هاقع من روحى.. مش وقت غراميات يا ولاد.. ورانا حاجات كتير صعبة وخطيرة.. الحصار كده بيضيق علينا.. زمانهم بيفتشوا علينا فى كل حته..  
**طارق :** هانفضل طول عمرنا مطاريد.. مع أننا وهينا روحنا للدفاع عن الناس..  
**جحا :** ما هو اللى الناس تحبه يخشاه السلطان.. اسمعوا يا ولاد أنا مش هاعدم الحيله.. أنا قلبت خطه فى دماغى.. أنا هادهنكم!!



طارق وردة : تدهنا!!

جحا : اربط لسانك حبه.. واسمع كلامى.. احنا جايين منين..؟

طارق : (ينظر لجحا فى عجب ثم يفهم) من هناك.. من الكوفة..

جحا : لا من الحبشه.. وأنا أيه!

وردة : عم جحا الحكيم..

جحا : لا أنا النحاس رزملو.. وانتوا عبيد وأنا هابيعكم..

وردة : تانى عبيد وجوارى..

طارق : الفكره دى مضرويه يا عم جحا..

جحا : امسك لسانك وشغل كوز المهلبيه «يشير إلى رأس طارق».. اسمع يا ولد.. وانت يابنت.. أنا

هابيعكم مع بعض.. وبعدين أبيع نفسى وأنا اللي ها حدد المشتري..

طارق : مش ناقصين فوازير يا عمنا.. فسر خطتك ونور علينا اللهى رب السما ينورها عليك.

جحا : أنت وردة هايشترىكم تاجر صديقى اسمه صفوان.. وهاتقضوا عنده شهر العسل.. حلو

الكلام..

طارق : ازاي؟

جحا : عايز اتحرك ومحدث يشدنى لورى.. دوركم لسه مجاشى..

وردة : ومين هايشترىك يا عمى؟

جحا : موسى النحاس..

طارق : مش فاهم حاجه خالص!

جحا : مش مهم تفهم دلوقتى.. المهم كل اللي أقوله تنفذه بحذاقيره..

طارق : (متعجباً) تنفذه ازاي من غير فهم.. إيه الحكمة!!

جحا : حكمتى فى لعبتى.. ونهايتنا خير.. مقتنع ولا لا..

طارق : أنا مملوكش غير الموافقه..

جحا : دلوقتى أنا هادهنك أسود غطيس.. وانت تدهنى..

طارق : وأنا أدهن وردة!!

جحا : معاكوا كام كيس يا ولاد؟

وردة : معايا كيس..

طارق : وأنا معايا كيسين

جحا : على كيس منى نشترى لزوم ما يلزم.. وحالا على أول جامع نخطف لنا ساعتين نوم قبل

الفجر.. ونصلى سوا ونطلع على السوق بوغرى.. يالا يا ولاد..

«يوافقون على مضض.. وينطلقوا خارجين.. ويصبح المكان خالى تماماً».

### اللوحة الثالثة «مشهد السوق»

«سوق المدينة.. من حركة الناس يتضح أن هناك حالة كساد.. يظهر المنادى من أقصى الشمال ينادى»

**المنادى :** يا أهل بلدنا المحروسة.. ببيان سلطاني.. بأمر والى البلاد.. حاكم مدينة قالويح.. قرننا ما هو آتى.. بخصوص المدعو جحا المكنى بأبو الغصن.. وتابعه طارق ابن أبيه.. والجارية المملوكة للمدعو موسى قرار.. تقرر القبض عليهم لأنهم خرقوا قانون الإمارة وجعلوا نفوسهم الاماره تسوقهم إلى فعل الرزايل والمنكر من الأعمال.. ومن يقبض عليهم يسلمهم فى الحال .. وقد أعذر من أُنذر..

**جحا :** «يقرع جرس كبير فى السوق وينادى على بضاعته» يا عباد الله فتح المزايد بعون الله.. مين يشتري غزال أسمر كحيل العين.. على زنده فارس معمدانى.. كللي كتفه شال الفرس والحرس والويل على ظهره بينوا الهرم.. على صبره يحكوا الصبايا ليلى يا عين.. على حلمه سبق يوسف فى التين.. مين يشتري ولدى.. مين يشتري قلبى.. مين يشتري مين؟  
«يتجمع الكثير من التجار والناس.. حول منصة البيع يقرع الجرس عدة مرات.. ويدور الشاب يعرض نفسه أمام الناس.. يظهر رجل كبير ويهمس فى أذن جحا.. بيتسم ابتسامة لها مغزى.. ويكمل نداه على أدبه يختشى الحياء منه.. على فنه يحكى الزمان. عنه ماهر وشاطر وشاعر وفارس.. سابق كل شباب عصره..» يدق الجرس.. يحضر بعض العسس وخلفهم موسى وبعض من شيعاته»..

**التاجر صفوان :** أصله منين يا معلم؟

**جحا :** حبشى موحد.. يبلغ من العمر حاجه وعشرين..

**التاجر :** فتحت بكام..؟

**جحا :** من فتح المزايد .. اللهى رب السما يفتحها عليه..

**التاجر :** عشرين كيس..

**جحا :** والصك جاهز..

**التاجر :** وشرطك أيه يا عم يا نخاس؟

**جحا :** تصونه ولاد الناس..

**صفوان :** ده مش شرط ده واجب.. فين الشروط..

**جحا :** الولد مع السنيوره..

التاجر صفوان : وضع كلامك..

جحا : تشيل البنت والولد..

صفوان : مش نعاين البضاعة أول..

جحا : «يعرض الفتاة وردة أمام الجمهور» سنيورة أمورة.. البشرة مسك وعنبر.. وقوامها أجمل

صورة.. وسنانها فتاقت سكر.. علمها خفة دما.. وفنها على الوتر قسم.. وجسمها سبحان

من قسم.. رقصها غزال برى.. وأديها هزل وجد..

صفوان : وصفها بيزود حسننها تطلب كام..؟

جحا : ما بين الخيرين حساب.. أجراها ملكها.. الأصيل لما يتمن مسكت لسان النحاس..

(فى ركن من الحيز)

وردة : طول عمرنا متباعين

طارق : مره من الحكام الاجلاف.. ومرة لحساب الأحلاف..

وردة : فى البداية وعود مشاومة

طارق : وفى النهاية معاهدات مسمومة

وردة : وديما التاجر هو اللى كسبان

طارق : واحنا حصان الرهان

وردة : والدم لسه مانشفش

طارق : والعمر الجميل ينسرق منينا.. ويفضل الباقي من عمرنا على باب الانتظار

وردة : نستنى بايع جديد

طارق : ونبارك للشارى اللى شال

جحا : بارك الله لك فيهم وجعلهم قدم سعد..

«تتحرك وردة وطارق مع التاجر الذى يحدثهم فى ركن من الحيز.. بينما يصعد جحا إلى

منصة النخاسة.. ويعرض نفسه للبيع» مين يشتري الحكمة بلقمه.. مين يشتري وأنا أبيع..

مين يشتري البسمه بهدمه.. مين يشتري الكلمه بضله.. مين يشتري قلبى الوسيح.. مين

يشتري وأنا أبيع.. ارقص واحاكى وأغنى.. مين يشتري فنى.. مين يشتري لسانى

الأديب.. يسقف يأوى برد الغريب.. أعجن وأطبخ وارعى الغنم.. وآخر الليل أصب النغم..

أنا النديم أنا الحكيم..

رجل ١ : راجل عجوز.. رجله والقبر.. لو كان فيه خير ما كان رماه الطير..

موسى : سوق النخاسة أصبح مداسه..

رجل ٥ : راجل ظريف دمه خفيف.. فكرنا بجحا.. لكنه عبد أسود..

موسى : (لجحا) تعجن وتطبخ.. وتعزف نغم..؟

جحا : وأطيب وأسامر.. وارعى الغنم..  
 موسى : أنا هاشترك.. وفى دار هأويك..  
 جحا : لكن بشرط..  
 موسى : أشرط يا عبدى..  
 جحا : العقد اللي بينا لمدة سنة  
 موسى : هو أنا خسران حاجة لمدة سنة  
 جحا : وشرطى الاكيد.. اللي يزهدق من التانى وحب يرجع البيعة.. نسلخ وشه..  
 موسى : مش فاهم..  
 جحا : يعنى مثلا لو أنا زهدقت وحببت أسبيك تسليخ من جلد وشى لغاية صابع رجلى شريط من اللحم.. موافق..  
 موسى : موافق.. موافق.. وتفضل زليلى.. فىن الوثيقة..  
 جحا : امضى المعاهدة..  
 موسى : فىن الشهود..  
 جحا : الناس دى..  
 موسى : اسمك..  
 جحا : رزملو.. كيللوا..  
 (المحلقيـن - الرواه)  
 زكى : والله يا عم جحا انت حيرتنا معاك.. تبيع عيالك وبعدين تبيع نفسك وشويه تندار علينا وتبعنا.  
 جابر : ده يا جاهل لعب.. خديعه.. حيله من مفكر عبقرى زى جحا الحويط.  
 سالم : الكلام ده ما يخشش العقل.. دى لعبه عامله دى لعب الأيام دى..  
 جيهان : والغريبة أن اللي اتباعوا ما بيرفضوش..  
 سيد : والشارى فرحان بغنيمته  
 سماح : والتاجر كسبان من بيعته.  
 جابر : ماله التاجر.. ده حقد امبريالى.. رأسمالى.. فوضوى.. الراجل الكريم اشتراهم عشان يجوزهم.. وعانينهم عنده لحين ميسره.  
 زكى : (للجمهور) ما حدش فيكم يكسب فيه صواب.. يشترينى ويجوزنى.  
 سيد : عيب يا زكى ما تخرجش عن دورك المرسوم..الى قولته عيب وخروج عن النص..  
 سالم : والله الواحد ما عاد عارف العيب من مين.. وإيه اللي بره النص وإيه اللي جواه..  
 جيهان : العيب ياسادة فى السيد المؤلف.. اللي عايزهم يتباعوا

جابر : غلط.. العيب فى المخرج اللى وافق المؤلف  
زكى : العيب الجوهرى كامن فى شخص السيد جحا وطريقة تفكيره الانتهازية السلبية  
سالم : العيب فى الوالى.. اللى لا يباهش ولا بينش..  
سيد : الاشكالية متمركزة فى الشاب طارق اللى ما دقش ساعة العمل الثورى.  
جابر : ده افتراض موضوعى يخلى وردة كما فيها عيب لأنها سابت دارها واتقل مقدارها..  
ودارت ورا الواد الحليوه.. وسرحت ورا الحوى جحا.  
جيهان : العيب فى موسى وأهله.. والهاشيه الخائنه.  
زكى : غلب حمارى  
الجميع : غلب حمارنا من فضلكم.. زار عزكم.. تفكروا ولما توصلوا فى نهاية الليلة.. نسمع رأيكم  
دام فضلكم.

### (ساحة السوق)

طارق وورده ومعهما عدة العرائس

طارق : هايقدر جحا على موسى وأتباعه

وردة : لوحده ما يقدرش

طارق : خلاص نعمل حاجة. هانفضل مرهونين كده عند التاجر صفوان.

وردة : شهر العسل عدى بسرعة

طارق : نخرج نلقط عيشنا.. ونكمل مشوار عمنا جحا

وردة : انت بتقرا أفكارى.

طارق : الناس بتنسى بسرعه.. ياللا نفكرها ونحضرها

ورده : عندك إيه جاهز

طارق : لعبه الناييم على صرصور وده

وردة : إصداك المارد

طارق : المارد اللي نايم من زمان مستنى حد يحك الفانوس

وردة : يالله تجهز الفرجه ونلم الناس

طارق : (بغناء موقع)

شيكّا بيكا.. تعالى يا ويكا

وأنا أورىكا.. شغل البلوتىكا

واكشف اعادىكا.. دقى يا مزىكا

وردة : قرب يا ظريف.. شوف الصديق.. وشوف الزيف

(من خلف الستار.. يخرج طارق على هيئة مارد أمام وردة )

طارق : شبىك لبيك.. عبدك بين إيدك

وردة : انت طلعت منين؟

طارق : خرجت من القمقم اشم شوية هوا.. أغير جو..

وردة : من غير ما أحك الفانوس..

طارق : أنا مارد مودرن.. مجرد التفكير فى أطلع قدام الناس

وردة : ومين يا مارد يا وحش اللي فكر فيك

طارق : ست الحسن والجمال

وردة : وعاوز إيه؟

طارق : انتى اللي عايزه.. شبىك لبيك - اطلبى واتمنى

وردة : (دون تفكير) عايزه أكله ملوكى.. سْفَره طولها عشرين متر فيها مالذ وطاب.

طارق : (منفعلا فى غضب) إيه حكايتكم يا معشر البشر.. كل ما حد من المرده يطلع من قمقمه  
يقابل ناس مفجوعة وجعانه.. دى أمنيات وأحلام دى.. تطلعيني بعد خمسين سنه عشان  
حته أكله.. اطلبى يا بنتى حاجة تليق بمارد محترم دى.

وردة : اطلب وتتفد.. أنا عايزه (حاله) مدينة جميلة.. بلد.. وطن.. أرض.

طارق : أوصفيها لى.

وردة : البلد اللى بحلم بيها.. وديان وسهول خضرة.. وناس بسيطه وطيبه.. وأطفال عايشين  
طفولتهم.. أمهات بتحب ولادها وبيتها.. وعاشين فى سلام وأمان. البلد اللى بحلم بيها يا  
عم المارد.. لعبت فيها وأنا قد كده.. وغنيت مع الولاد للطيور والفصول والحياة وجريتنا  
وقطفنا بأيدينا البرتقان وزهور الجبل.. وسمعنا صدى صوتنا.. والآذان - وصوت أجراس  
الأعياد.. حلمى الحقيقى إنى أشوف أهلى ساندين ضهورهم على كتف بكرة مطمئن .  
والعرق على جبينهم راسم خيوط الأمل لو كنت مارد الحلم الأكيد.. انطق بقى. انطق بقى  
بسر الكلام والأحلام والوعود.. حقق مرادى- حلمى مش مستحيل.

طارق : دى مش أمانى يا بنت الناس.. دى حلم.. مملكش فيه زيادة.. الإرادة صنع البشر.. المارد  
اللى زى حالاتى ما ينطلقش بحكه. ينطلق بحركه.. بفعل.. بعمل يزلزل ويهدد.. ويبنى من  
جديد.. الحلم اللى جواكى يا ست الحزن الجميل. أمانه يشيلها جيل جديد.. تصنعه  
الأزمة.. والتجربة. جيل علمه الحزن النبيل الانتظار.. يا أما يختار طريق الوعود.. يا إما  
يصنع بكرة بالايدين.

وردة : علمنى جرحى انى أقاوم.. مش أساوم.

طارق : ممكن انتصرك فى الخيال.

وردة : طلعت مارد أونطه

طارق : مارد الحواديت والحكمه

وردة : ما تملكش غير الحلم والكلام

طارق : إحنا ابتدينا.

وردة : كلام ع الورق .. والورق اللى انكتب.. يغطى محيطات لو يفرشوه على وشها تخجل..  
تصبح جسور وسدود..

طارق : أول الطريق خطوه

وردة : الدرب صعب وطويل

طارق : تعبت.. تعبت من الكلام والأحلام. عايز ارتاح بقى

وردة : انت مارد انهزامى

طارق : انت بتشكى فى كلامى

وردة : عايزاك تحقق أحلامى

طارق : مين اللى طفى النار فى قلب الصغار..؟؟

(موسيقى - الأغنية الشعبية الفلسطينية - ياما مواويل الهوى وتعبير حركى لطفل وطفله

توحى بجو الانتفاضة)

وردة : إيدك على الجرح يا طارق

طارق : أنا المارد مش طارق.. انتى بتحلمى ولا إيه؟

وردة : خرجتتى من الحلم الجميل.. حرام عليك.. كنت سبنى أحلم شويه.

طارق : انتى اللى خرجتينا عن النص يا بنت الحلال.

وردة : بس الجمهور ما خدش باله.. انت اللى قطعت عليه حبل أحلامى

طارق : مش أنا اللى قطعت دول العسس واقفين هناك محاصرين أحلامنا..

وردة : يالله تغلب فى حته ثانيه. بس بحذرك تسبنى أحلم.

(يخرجان.. وخلفهما العسس يراقب عن بعد)

إظلام



#### اللوحة الرابعة

##### (منزل موسى النحاس)

(جلسة لعائلة موسى وخلفهم جحا .. والخادم سعدون)

شمس : اسمع رزملو. انت مكتوب فى العقد راعى غنم والراعى بيكون أمين.. سليم؟  
جحا : طبعا أمين.. جدا جدا والمثل بيقول من أمنك لن تخونه حتى لو كان خوان .  
شمس : غنماتى وبهايمى عايز امنشرهم.. تعمل إيه يا سى رزملو..؟  
جحا : امنشر غنمك.. دى شغلة سهلة خالص..  
شمس : اوعى تنسى تسقيها.. وتحافظ عليها، عندك حبيبي خمس بهائم  
جحا : (يكتب فى الهواء) بهائم  
شمس : عشرين معزة حجم متوسط  
جحا : متوسط  
شمس : خمسة وعشرين خروف  
جحا : خروف  
شمس : خمستاشر نعجة  
جحا : نعجة  
شمس : تمن جمال.. يبقى المجموم كام؟  
جحا : كام؟ العدد فى الليمون .. خليها بالبركة  
شمس : بركه لا. تمانيه وأربعين راس خلى بالك رزملو.. والل يتحلب تجيب لبانها واللى تولد  
تصون عيالها.. فاهم عيني؟  
جحا : اتفقنا ياسى شمس.. واللى أوله شمس اخره ليل..  
شمس : طب امضى على العقد ده.. أمانة حبيبي  
جحا : (يوقع على العقد) رزملو كييلو.. سلام.. (ينصرف جحا وخلفه سعدون)  
موسى : (يقترّب حوله الجميع بعد خروج جحا) مضى؟  
شمس : دخل الخية برجليه  
نارى : أول ما الدنيا تليل نهجم عليه هجمة رجل واحد.. وهى ضربة على دماغه وناخذ الغنم..  
وتبقى جرسه فى السوق الصبح.  
شرارة : اسمع نارى.. خلو بالك من مكر جحا.. دا راجل شيطان.. ابن أبلسة  
كوك : يا أخويا.. اسمع شرارة أخويا.. احنا اللى زرعنا تقاوى الشيطنة.. وضحكنا على ابليس  
ذاته.

شرارة : الحرس واجب كوك.. اطلع راقية من بعيد لبعيد  
 موسى : (يخلع نظارته) اشربوا نخب انتصارنا الأولانى على جحا ا بن العبيط اللى عامل فيها  
 رزملو وحكيم زمانه.  
 شمس : فاكر حيلة هاتخيل علينا.. فى صحة ولاد ابليس.  
 شرارة : بعد الفضيحة والجرسه.. نسلمه للوالى.. ونقبض على حسه  
 كوك : فى صحة الاقبض  
 موسى : بس أنا مش هاتبرد نارى من مقلب واحد عايز اطلع حبابى عنيه.. ويطلع من البلد  
 بجرسه وفضيحة.. وترجعلى سمكه.  
 شمس : فى صحة سمكه (الجميع يرفعون كؤسهم ويغمغمون بأصوات وعبارات طقوسية غير  
 مفهومة يستمر هذا الموقف بعض الوقت إلى أن يدخل عليهم جحا وفى يده سكين ملطخة  
 بالدماء.. يفيق الجميع من نشوتهم على هذا المشهد)  
 موسى : رزملو فيه إيه.. مالك (يقترّب منهم بسكينه) أبعد أحسن السلاح يطول.  
 جحا : (يشخص لهم أنه ذبح الأغنام بالسكين ولكنهم لا يفهمون)  
 شمس : حد حاول يهجم عليك ويسرق الغنم ذبحته؟  
 جحا : (يشخص لهم كيف ذبح الحيوانات وسط غموض الموقف بالنسبة لهم)  
 موسى : دبحت الحريمه كلهم برافوا عليك تعالى خد لك كاس  
 جحا : البهايم .. البهايم.. الغنم.. المعيين  
 كوك : الحرامية كانوا كثير ذى الغنم؟  
 جحا : الغنم كله (يصدر أصواتا تحاكي عملية الذبح)  
 نارى : إيه يا عم رزملو الذبح عقد لسانك؟  
 جحا : منشرتة  
 شمس : مين منشرتة؟  
 جحا : كله منشرتة  
 شمس : رعيت وسقيت وحلبت؟  
 جحا : دبحت ونشرت؟  
 جحا : (جحا يشخص لهم مرة أخرى) البهايم والغنم. ونشرتهم على السلك الشائك.. هناك  
 شمس : يا خرب بيتك يا شمس يا ابن امك.. (وكان على رؤسهم الطير)  
 جحا : مالكم مصان.. وعهدكم أمان.. وأنا عبد المأمور.. منشّر يا رزملو.. منشرت اتحركوا بقى  
 لوا لحكمك من قبل ما ينتن. ويتلم عليه الغربان والجوارح والكلاب وأصحاب الأنثياب.  
 موسى : أنا اللى هانشرك نصين.

جحا : زهقت منى.. مش عايزنى.. (يتمسكن فى سخرية)  
موسى : يا لئيم.. يا خبيث.. هاسلمك للوالى.. يسلمك وشك  
جحا : شريط اللحم من وشك يا موسى  
شرارة : مش قولتكم.. الحرس واجب. دا.. رزاملو..  
جحا : ده نكران للجميل.. دا جزاء المفهومية.. وخفة الأيد.. وسرعة التنفيذ.. دم بدل ما  
تشكرونى.. وتدونى مكافأة. عايزين تكلوا عليه عرقى.. وأنام من غير عشا.. (صارخا فى  
عنترية) لا أنا عرقى ما يروحش أونطه (يشهر فى وجههم السكين)..  
شمس : أنا مالى إالى راح أونطه.. منشتر يعنى أرعى يا غبى..  
جحا : كنت قول لى أرعى يا زكى... كنت راعيت.. انتوا نيستوا أصلكم ولا أيه.. ما تتكلم يا أبو  
العيون الكواحل.  
موسى : فارقتا بالمعروف.  
جحا : والعقد اللى بينا؟  
نارى : خد أى شىء قصاده  
جحا : البيت ده..  
من أم ستة : البيت لأ.. إلا البيت.  
جحا : ودى مين دى أمنال غولة؟  
موسى : دى أم ستة مراتى  
جحا : مراتك يا حلاوة من امتى؟  
كوك : اسمع رزملو.. إحنا بنحبك.. رعيناك.. وأكلناك.. وهاتنام فى بيتنا.. يبقى تراعى العيش  
والمالح.  
جحا : هو فىن.. دانا على لحم بطنى من الصبح..  
موسى : أنا صاحب فضل عليك.. متنازل عن ديونك مية وتسعين دينار.. (لأهله) سيبولى رزملو..  
وأنا هاتفاهم معاه (ينصرفون فينادى جحا على شمس)  
جحا : شمس.. هات العقد اللى بينا.. والا هاروح بنفسى..  
شمس : ما تروحش خد خدك ربنا..  
موسى : اسمع حفيد ابليس.. كلامى معاك المرة دى هيكون واضح ومفهوم.. هى كلمة واحدة..  
عارف يعنى إيه أرض؟  
جحا : عارف  
موسى : ليها معنى تانى عندك؟  
جحا : عندك انت ليها معنى تانى

موسى : لا  
 جحا : اتفقنا  
 موسى : ارضى  
 جحا : مالها فينها؟  
 موسى : أرضى اللي فى الشرق.. اقلب جناها..  
 جحا : اقلب جناها؟  
 موسى : ليها معنى تانى عندك؟  
 جحا : لا اقلب جناها  
 موسى : راسا على عقب  
 جحا : يعنى اخلى عليها وطيبها صح؟  
 موسى : برافوا عليك. تعزق .. وتقلع. تخدمها  
 جحا : هاخدمها بإخلاص.  
 موسى : عارف شروطنا؟  
 جحا : عقدك فين؟ هات لما أوقع .. (ياخذ منه الصك ويوقع عليه) رزملو كييلو.. بس قبل ما امشى  
 عايز أطلب طلب؟  
 موسى : اطلب  
 جحا : هاموت من الجوع.. عايز هم مم.. عشان اقدر . ا قلع واقلب جناها..  
 من أم سته : العشا جاهز.. خليه يدخل يا موسى.. تعالى يا اخويا.. (ينهض جحا منصرف..  
 ويدخل هذه الاثناء أهالى موسى).  
 موسى : أه يانى  
 شمس : إلى حيث القت  
 أم سته : (عند دخولها يقف الجميع احتراماً.. وخوف..) اخذ أكله وخرج الملعون.  
 شمس : ومأمن له على زرعك.. مش خايف؟  
 موسى : قبل ما يفكر يوصل للأرض.. هاكون مبلغ عنه أبو زالف. يخلصنا منه  
 ناري : مستنى إيه ليه العطلة. بسرعة ياله..  
 كوك : ممكن يتهمنا إننا كنا مسترين عليه  
 شرارة : ومين هایشهد معاه؟  
 موسى : أنا هابلغ بطريقتى  
 أم سته : احنا عايزين من جحا إيه؟  
 موسى : عايزين روحه.

شمس : عايزين نخفيه من على وش الحياه والدنيا  
أم سته : طب ليه؟  
موسى : أم سته. ودى عايزه سؤال  
أم سته : بسلاحه  
نارى : إزاي؟  
أم سته : إشاعة فضيحة.. جريمة .. خيانة عظمى.. أي حاجة من الأعيينا..  
موسى : قوليلي .. ناويه على إيه.. بسرعة ما فيش وقت  
أم سته : تبعته البيت الصفر يجيب أى طلب (تفكر)  
كوك : وبعدين يا أم سته ؟  
أم سته : هاكون هناك أنا وينت من بتوعنا..  
موسى : وبعدين؟  
أم سته : براحه عليه أنا باكلم وافكر. البنت تلقح عليه جسدها فهمتوا؟  
موسى : نكون مبلغين أبو زالف..  
أم سته : يوصل جحا من هنا يطب عليه الحرس.. والباقي معروف.  
شمس : والشهود.. هو فيه حد هایشهد معانا؟  
أم سته : الفلوس.. الناس فقيرة. والفلوس تخلق الأخرس ينطق.. والأعمى يشوف  
شمس : جحا حياوقف سوقنا  
نارى : هايغطل مشروعا  
أم سته : التجار فيهم ناس شبيهة جحا.. وناس شبهنا..  
موسى : مش فاهم؟  
أم سته : نحارب اللى شبيهه جحا.. ونقوى اللى شبهنا..  
كوك : وبعد ما ينكسر جحا.. نندار على الباقي..  
شمس : اللى يقبض يبقى معانا. واللى يرفض يبقى نهايته قربت  
موسى : كده الخطة كملت  
أم سته : لسه  
نارى : لسه أية؟  
أم سته : أبو زالف  
نارى : ماله؟  
أم سته : لازم يخش اللعبة.. يخش الخية.. أم سته ما تسيبش حاجة للصدفة  
كوك : احنا عارفين عيوبه كويس.. كاس.. وونيس.. وفلوس..

أم ستة : واليومين دول هو مهزوز قصاد الوالى.  
نارى : الضرب على الحديد وهو سخن  
أم ستة : حياك الله يا أبو داوود.. ويكده نكون أمانا على المطلوب.  
موسى : معدش فيه وقت.. نبدأ فى التنفيذ.  
أم ستة : كل واحد فاهم دوره ياله.. ياله بسرعة.  
موسى : ولا يحل الظلام.. ويتفضع جحا.. الناس هاتصدقنا على طول.  
أم ستة : ولو ما صدقتناش.. احنا نشعلل النار.. وبعدين تبقى الناس فى حالة رد فعل .  
موسى : وبعدها تلهى الناس فى موضوع تانى.. والناس نسايا.  
أم ستة : توضب انت مع الوالى.. وشمس يروح لأبو زالف.. أما ندمان فده لعبتى.. وزمان دليلة جاية على هنا..  
موسى : معدش فاضل حاجة .. (يتحلقون حوله المائدة ويحتسون الخمر) فى صحة الأفكار الشيطانية.  
نارى : فى صحة المؤامرة الجهنمية .. (يضحكون فى نشوة.. وتوحش.. ويتمتمون بعبارات غير مفهومة.. ويستمر هذا الموقف فترة من الزمن إلى أن يصل جحا).  
جحا : متجميعن على شر..  
موسى : (لأم ستة) سمع حاجة؟  
أم ستة : ما ظنش.  
موسى : أهلا يا رزملو..  
جحا : راسا على عقب.  
موسى : يعنى إيه؟  
جحا : جننت جنانها.  
أم ستة : مش فاهمين؟  
جحا : خلعت الزرع من جزوره.. وزرعة من راسه. راسا على عقب.. وفركشت وجننت جنان الأرض.. (يصدر حركات هستيرية.. يشخص بيها كيف خرب الزرع)  
موسى : راسى نافوخى. عقلى  
أم ستة : الأرض لا.. الأرض!  
موسى : ده جنون عبط.  
أم ستة : (لموسى) لا ده مكر.. خبث.. (تميل على موسى وتهمس له)  
جحا : الغمز واللمز عادة مزمومة فى البلدى دى.. صح يا موسى.  
أم ستة : فداك رزملو.. موسى معرفش يفهمك

جحا : وانت اللى هاتفهمينى؟  
أم سته : أنا قاقصداك فى خدمة إنسانية.  
جحا : تحت أمرك يأم أربعة وأربعين  
أم سته : هىء.. هىء.. دمك خفيف.. دمك.. أه منك.. يا شقى.. اسمعنى رزملو عارف بيتنا الأصفر؟  
جحا : عارفه اللى جنب بيت أبو زالف.  
أم سته : برافوا عليك.. عايزاك تخطف رجلك. تخطف إيه؟  
جحا : اخطف رجلك.. أيوه رجلى..  
أم سته : وتجبلى الطلبات دى (تعطيه ورقة.. يقرأها)  
جحا : كل دى طلبات.. تحت أمرك يا جميل  
أم سته : ومكافنتك عندى عظمة أنت عارف أم سته هات ودنك (يقترب منها فى حذر..  
جحا : مش معقول.. يا بنت الأيه.. دانتي لثيمة بشكل. مش مصدقك.  
أم سته : وحياتك عندى ها يحصل بس أنت نفذ اللى قولتك عليه  
جحا : حد يرفض النعمة لما تجيله لحد عنده  
أم سته : كل دول كوم وأنا كوم.. رزملو فاهم قصدى  
جحا : انتى الكوم الكبير  
أم سته : الموضوع سر بينى وبينك.. محدش يعلم بيه غيرنا  
جحا : حتى أنا مش مهم أعرفه  
أم سته : أى ملعوب من ملاعيبك انت عارف أم سته  
جحا : هاتعملى إيه؟  
أم سته : (تتدارك الموقف) دانا غلبانة. هاصبر واصبر.. وأفوض أمرى لله.. لغاية لما أنسى.  
جحا : ليميني على المفتاح.. ويعدين. نتعشى الأول.. وأكون هناك على طول  
أم سته : يعنى ما فيش وراك ماشوير فى حته تانيه؟  
جحا : دانا مقطوع من شجرة.. من بيتكم الثانى للبيت ده.. وهلم جر.. (يخرج جحا.. وتسير وراءه أم سته كى تطمئن لبعده عن المنزل)  
موسى : (يمطئن لخروج جحا فيدخل مهرولا).. قلبى مش مطمئن.  
أم سته : طول عمرك وانت مش مطمئن.  
موسى : ده معجون بمية عفاريت مشيطة  
أم سته : أنا الميه .. وأنا العفريت.. صبرك عليه.. وهاتشوف أم سته بتعمل إيه؟  
- بلاك -

## - اللوحة الخامسة -

### ساحة السوق

طارق : اليوم السادس والعشرون من شهر رجب نفس العام..  
وردة : فى سيرة جحا والعجوزة المكارمة.. وما جرى فى ملعوب الأرض..  
ممثّل : قال جحا حكمته الشهيرة.. الأرض أرض أبونا والغرب يطردونا..  
ممثّل : وخرب زرعهم. وقدر تراب الأرض..  
ممثّل : وفى نفس الوقت كان جهاز المخابرات الجوى..  
ممثّل : اللى بيقوم بدوره سعدون .. بلغ جحا بمؤامرة أم ستة وأتباعها..  
وردة : ووضع جحا خطة هجوم مضادة وملعوب محسوب..  
طارق : قابل جحا دليله «يتقدم ممثّل جحا من ممثلة دليله»  
وردة : وهى من بنات الهوى تربية أم ستة..  
ممثّل : قال لها جحا «مشهد لتشخيص بين دليله وجحا بالذمى»  
جحا : رايحه فىن يا حلوه والوقت ليل. ماشيه لوحده ليه.. معدتش فيه أمان الأيام دى.. مش  
خايفه حد يخطفك؟  
دليله : أنت مين يا راجل أنت؟  
جحا : أنا عمك.. عمك شمس أخو عمك موسى جوز عمك أم ستة.. الدار أمان يا بنتى أى  
مساعده؟  
دليله : المغفل جحا هاتكون فضيحتة على إيدى!  
جحا : أنا جحا.. عامل فيه مقلب طالع من عينى ونفسى أشوفه وأخرم عنيه.. لو أقدر.. أساعدك..  
أنا تحت أمرك..  
دليله : وصلنى للبيت الأصفر.. انت عارفه!!  
جحا : إلا عارفه.. غالى والطلب رخيص.. تحت أمرك تعالى يا حلوة!  
(ينتهى مشهد التشخيص بالذمى)  
وردة : ووصلت دليله عندنا.. حسب خطة عمنا جحا  
طارق : وعملنا معاهم اللازم.. حسب الخطة  
سعدون : ورحت بسرعة على بيت أم ستة أبلغها رسالة هامة.. حسب الخطة..  
ممثّل : وفى ساحة السوق.. كانت هناك مفاجآت..  
ممثّل : ولعبه من الأعياب اللبيب جحا حسب الخطة..  
المتكئون : والآن فى التواللحظة نذهب إلى هناك..  
«ستار جسدى.. وينفرج منه ساحة السوق»



- نفس مشهد اللوحة الثالثة -

«فى ساحة السوق الحرس يقبض على اثنين ملثمين وقد أخفيا وجهيهما فى انتظار وصول الوالى»  
موسى : ضبطوه فى البيت المشبوه  
أبو زالف : دا جزاؤه.. من يوم ما وصل واحنا ملطشه..  
موسى : دى فيها جرسه ورجم بالحجر..  
أبو زالف : هاتشفى غليلك فيه..وتسلخ جلده  
موسى : ولا تخلص منه .. هاحصل على مالى وبنتنى  
أبو زالف : السنيوره.. الأمور.. هديه منك ليه  
موسى : أنا لا بعثها ولا عتقتها.. ربنا يسهل..  
زوالف : بس كنت عايز تديها للوالى..  
موسى : ماهو كله بحسابه يا قائدنا الهمام. سيبك انت.. أنا عندى ليك مفاجأة عظيمة.. تعدل  
مزاجك وتكمل متعتنا بعد ما تخلص من جحا..  
أبو زالف : من يوم ما عرفتك ما فيش من وراك خير.. أنا عارفك كويس.  
موسى : قلبى مش هايطمن إلا لما أشوفه راكب على الحمار بظهره.. والعيال بتزفه فى البلد..  
واسمع المنادى وهو بيجرسه..  
أبو زالف : سيدنا الوالى اتأخر مش بعاده.. عايز اتمتع بمنظر جحا واحنا كاشفينه قدام الناس.  
« فى جانب آخر من السوق يصل جحا والتاجر صفوان.. وعلى مقربة منهما يجلس طارق  
وردة»  
جحا : بعد ما يكشف الملعوب لازم نقابل الوالى.. دا راجل من ملتنا برضه ولازم ننصحه..  
التاجر : لو مش عارف اللى بيتم حوايه يبقى مذنب..  
جحا : ولو عارف ومطنش يبقى شيل ايدك كله ماركة.. ساعة لحظك!!  
التاجر : وده مذنب لا يغتفر لوالى مسئول عن رعيته..  
جحا : الناس اللى حوايه شبيهه. أكيد واكلىن مخه وهو عارف ومستريح لكده..  
التاجر : احنا مشتركين معاه فى الذنب..  
جحا : ازاي.. مشتركين ببهدلتنا وقلة حيلتنا.. واحنا يا مولاي كما خلقتنى والدنيا زى ما أنبت  
شايف..  
التاجر : لازم نقرب منه وننصحه لوجه الله.. نفهمه ونفهمه عن قرب..  
جحا : لعبة توازن مصالح..  
التاجر : مصالح الشعب..  
جحا : سيبك ده راجل شرير..

التاجر : مفيش شرير بطبيعة أكيد فيه حته خير.. والحتة دى هى المدخل اللى ممكن ندخل منها  
لدماغ الوالى..  
جحا : دماغه مهلبيه.. والطبع غلاب..  
التاجر : بس لازم نحاول..  
جحا : دا قلبه متعلق باللى انت عارفهم.. وهو ناقصه إيه.. كل نعيم الدنيا حوليه..  
التاجر : احنا بنعمل اللى علينا.. وينادى واجبنا كامل من خراج وضرايب.. رغم الكساد العام  
والسوق مضروب..  
جحا : واخوانا البعده يا صفوان. هايودوا البلد فى داهيه.. وخاصة موضوع السوق الجديد  
وتحويل التجاره للحبشه. تبور تجارتنا..  
التاجر : لازم الوالى يعرف كل ده.. لازم يا جحا.  
جحا : أنا مش جحا أنا القاضى.. عمرو البصرى. انت نسيت ولا أيه..  
التاجر : ما نستيش وربنا يسامحنا بقى.. الراجل وافق على عزوومتنا من هنا وبعد ما أكل الفته..  
طب نايم زى القتل من هنا.. عموما الغايه تيرر الوسيله.  
جحا : الغايه الشريفه يا صفوان.  
التاجر : أنا سامع خيل الوالى داخل على السوق.. أجمد يا قاضى البصره..  
جحا : ربنا يستر..  
«يدخل حرس الوالى.. وفى وسطهم الوالى ويأخذون مكانهم الطبيعى فى الساحة.. يتقدم  
قائد الشرطة ويحىي الوالى.. ويتقدم من المقبوض عليهم. يتقدم نحوهم التاجر صفوان..  
ويخاطب قائد الشرطة»  
التاجر صفوان : قبل ما تكشف عن وجههم لازم يكون فيه القاضى يحضر.. عشان الحكم يكون  
كامل النفاذ..  
الوالى : شى جوزال أفندم. عفارم عفارم.. انتى شيخ تجار تقولى كلام جميل أفندم..  
القائد : أركان الجريمة واضحه زى الشمس.. والشهود موجودين.. وسيدنا الوالى أهوه..  
التاجر : لازم قاضى العدل يكون موجود..  
إلوالى : لازم أفندم.. اسمعى كلام وهاتى قاضى عدل  
جحا : «فى زى القاضى» وأنا موجود يا جناب الوالى» يتجه نحو المنصة بثقة»  
الوالى : أنت مين أفندم؟  
جحا : أنا قاضى القضاة عمر البصرى.. أرسلنا اليوم الخليفة.. بدلا من القاضى المخلوع سعد  
ابن المقفع وهذه أوراق عليها الختم السلطانى يامولاي..  
الوالى : «ينظر فى الأوراق» تمام أفندم خاتم سلطانى تفضل.. عاين بضاعات.. جريمات..

أخلاقيات في ولاية حظرتنا.. فلد جحا خرسيس.. أدب يوك.  
موسى : «لأحد أتباعه» ده صوت القاضى ولا صوت الملعون.. «المنصه» يتجرس الأول ويعدين  
يترجم بالحجارة..  
القاضى : حد الله قائم بينى وبينهم.. وفى حالة ثبوت ذلك. يتم تجرسهم.. ولكننا لابد أن نواجههم  
بالتهم والذنب ونسمع دفاعهم..  
الوالى : خوش كلام افندم.. اعرض بضاعات واسمع كلمات.. أمام حظرتنا من شان تكون هناك  
عبرات..  
القائد : اكشف وشه يا عسكرى..  
موسى : فى عرضك يا مولائى.. قبل ما تكشف وشه ده بينى وبينى عقد.. وهو كده نقض العهد  
والشرط الجزائى.. الشرط يا مولائى أنى أسلخ وشه زى ما هو مكتوب.. شوف يا فضيلة  
القاضى..  
جحا : (ينظر جحا فى العقد) العقد سليم والشرط واجب النفاذ.. جحا يا مولائى أخل بشروط  
العقد ولزم نسلخ وشه الأول..  
التاجر : ولو كان الموجود ده مش جحا ؟  
الوالى : مستحيل أفندم اكشف وش حظرته..  
التاجر : لو مش هوه يامولانا أدام الله عمرك..  
الوالى : نسمع كلمات فلد قاضى..  
القاضى : نسلخ وش من ادعى  
التاجر : بارك الله فيك يا قاضى العدل..  
القاضى : والآن بأمر مولانا وبحضورى قائد القضاة يأمر قائد الشرطة بكشف وجهه المتهمان فى  
الحال واللحظة..  
«يكشف العسس عن وجه المرأة.. فنراها أم ستة وسط صيحات الناس ووجوم أهل  
موسى»..  
الوالى : خيبات كبيرات.. خيبك الله فلد جحا عدم ذوق.. أعمى عيون.. تسلم رقبة حظرتك لفلد  
سياف.. من شان زيزبونه مجنونه.. كركويات قبيحات..  
أبو زالف : أنت مين يا وليه يا مجنونه.. أنت..؟ أم ستة..  
أم ستة : عملها فى ابن العفايت..  
الوالى : اكشف وجهه فلد جحا.. خرفان ها ها.. عريس منحوس.. خلبوص «يكشف عسس ٣ عن  
وجه الآخر.. فنرى شمس ابن شولج.. مرتبك ومرعوب»..  
قائد الشرطة : مين شمس العطار ابن شولج.. يا ابن الخاين.. مرات أخوك.. مش انت اللى

مبلغنى.. اللهى يخرب بيوتكم...!! يا موسى.. «يحاول موسى الهرب وسط الجمهور»  
**القائد :** تعالى يا موسى.. عايز تهرب..  
**الوزير :** سبهولى يا أبو زالف.. أنا هاتصرف معاه..  
**القاضى :** يا مولانا لازم نجرسه معاهم ويعددين نسلخ وشه..  
**الوالى :** تمام.. تمام شى جوزال افندم خلصنا من حظرتهم فوراً.. عفارم عفارم فلد جحا..  
 صاحب حيالات مكرارات.. ذكيات.. لازم اقبض.. عليه فلد من شان يسلى حظرتنا..  
 «يهيىء الممثلون المكان للجرسة.. فى احتفال شعبي.. مصحوب بالغناء»  
**موسى :** «فى وسط الجرسة صارخا» القاضى جحا يا ناس..  
**القائد :** قدامى ياوش اليوم «لموسى» يا للا يا عقرب يا أم ستة وستين..  
**موسى :** «صارخا» القاضى جحا يا مولاي..  
**الوالى :** فلد موسى مهوروس يروح مورستانات فى الحال.. ها ها عقل حظرته يوك. هاها..  
**الوزير :** اسمعه يا مولانا ده بيقول كلام خطير..  
**قائد الحرس :** هاتشوف أحسن من مولانا يا ندمان..  
**موسى :** هارجعلك تانى يا جحا.. مش هاسيبك  
 «تستمر الجرسة والغناء وسط ضحك الجميع.. ويتحول المشهد تدريجيا بعد خروج المجرسين..  
 لتعليق الممثلون..» ستار جسدى  
**طارق :** «يتقدم من خلال الستار» وفى اليوم العاشر من رمضان.. تقدم جحا من ساحة العرض  
 وكان معاه الجوقة الغنائية وبعض أصدقائه،  
**وردة :** قدم جحا بعض نواذره وحكمه الفاكهه الساخرة. يعلم كل اللى حويله بما فيهم الوالى..  
**ممث :** يعلمه العدل فى الحكم.. واختيار الاتباع..  
**ممث :** والانصاف للاصدقاء والأهل والرعيه المخلصين.. وكشف لعبه الاعداء..  
**ممث :** واتمد حبل الوصال بين جحا وأتباعه وبين السلطان..  
**طارق :** طبعا الحال ده ما عجيش الوزير ندمان وحس بأن الخطر بيزحف فى اتجاهه..  
**وردة :** وسجن اتباعه شل حركته وخلاه فى رعب شديد..  
**ممث :** ساب جحا فى قصر السلطان..  
**ممث :** بعد ما أداله الأمان.. وراح على الليمان لاصدقاء الشيطان..  
**ممث :** يحل حبسهم.. ويحتفى فى وسطهم..  
**طارق :** ونقلب الصفحات.. بطوله.. وخيانته.. شجاعه وجبن..  
**وردة :** نواذر وفوازير.. ومؤامرات فى الليل..  
**الممثلون :** تعالوا معانا نشوف ونسمع تفاصيل ما كان فى أسرار الليمان..  
**«موسيقى وغناء»**

## «مشهد السجن»

«بعد الفاصل الغنائي.. يتحول معه الممثلون والمحلّقون ويصنعون بأجسادهم وبعض قطع الأكسسوار المساعدة شكل السجن.. وبعضهم يشخص الحراس.. ونرى داخل السجن الوزير ندمان وسط جماعة موسى».

الوزير ندمان : السجن للرجال.. هانت يا جماعة كلها دقايق وتكونوا فى أمان..

أم سة : اتأخرت كثير يا ندمان..

الوزير : سوء تدبيرك.. وذكاء جحا.. فتحوا لك القلعة.

موسى : مش وقت لوم وعتاب.. عايزين نخرج من هنا فى أسرع وقت.. هاموت هاتخفق..

شمس : هانواجه الناس ازاي بعد الجرسة والفضيحة..

الوزير : مواجهة القوى للضعيف.. مواجهة صاحب السلطة للتابع الذليل..

أم سة : عجل بخروجنا.. قبل ما تخرج روحنا..

الوزير : دقايق معدودة تكونوا بره.. وبعدها بساعات يكون جحا المغفل على الخازوق أو مرمى مكانكم زليل مهزوم..

موسى : ازاي..؟

الوزير : ازاي دى شغلتي.. أهم حاجة المكان اللي هاحطكم فيه.. متطلعوش منه خالص ولا تتصلوا بأى حد..

نارى : من سجن لسجن يا قلبى لا تحزن..

أم سة : احنا نختار المكان..

الوزير : انتى اختارتى خلاص.. وأنا هانفذ أوامرك..

أم سة : الضربة اللي ما تقتلش تقوى. الضربة الجاية لازم تبقى قاتلة. واحنا اللي نحدد المكان والزمان..

الوزير : مفيش خطط ولا عمليات هاتم إلا لما نقضى على الزفت جحا.. وامسحه من دماغ الناس.. شعله : الناس نسايا..

الوزير : الناس بتنسى لما محدش يفكرها.. جحا مش هايبات ليلته غير هنا..

موسى : شبعنا وعود.. طول عمرنا عايشين على الوعود.. لازم الوعد ده يتنفذ بأقصى سرعة وإلا رميتنا كده هاتطول.. فاهم يا ندمان..

الوزير : أنا مستعجل أكثر منك.. وكل دقيقة تأخير ممكن تقضى عليا قبلكم..

أم سة : مستتنى إيه.. هانخرج ازاي؟

الوزير : السجن مليان سرايب.. وأنا غيرت الحرس كله..

كوك : وأبو زالف يعرف..

موسى : يعرف ازأى يا غبى.. كمل يا ندمان..

الوزير : أبو زالف يعرف واخذت موافقته.. لكنه مش عارف هيكون أيه مصيره..

نارى : طب شهل عايزين نفك من هنا ولا ستأتى الريح بما لا تشتهى السفن.

الوزير : «ينادى على الحرس» يا حرس.. يا حرس.. «يتقدم تجاه حارسان» خدوا الجماعه دول من

السرداب البحرى وسلمهم للحرس اللى بره بسرعه ياللا..

أم سته : ندمان «محذره» ضامن خطتك ولا دى فيها إعدامات..؟

الوزير : طريق السلامه يا أم سته.. كل شىء معمول حسابه.. وهناك هاتعرفوا كل التفاصيل

«يشير الوزير بيده للحرس فيفتح الباب الجسدى للممثلين ويخرجون جميعا ويتحول

الممثلون والمعلقون إلى ستار جسدى يخفى تحركهم.. ويظهر لنا أمام الستار الجسدى..

جحا وطارق ووردة مع موسيقى مناسبة للموقف..»

## اللوحة السادسة مجلس أنس الوالى

الوالى : (وهو لا زال يضحك) اسمع فلد جحا انتى تحكى نوادر.. فكهاات تسالى لىالى.. تسعد قلب حظرتنا وتحظى برضا وهبات من يد حظرتنا.. كمل فلد.. ها.. ها.. ها

جحا : إن لمولاي الوالى فيما أعلم.. ثور أحمر

الوالى : تمام فلد.. ماله ثور حظرتنا؟

جحا : (يتظاهر بالبكاء) هجم على بقرة حظرتنا.. وفتح بطنها وقعت ماتت وأصبحت يا مولاي من غير بقرة.. تحلب وتحرت.. وتولد عجول..

الوالى : حيوانات تعمل مشاحنات.. ها ها ها ها .. بينهم خصومات.. شو.. يسوى والى.. تريدنى اتدخل فلد فى شئون حيوان.. لازم بقرة حظرتكم زعل ثور حظرتنا.. ثور حظرتنا ضربت بقرة حظرتكم.. ها ها ها ها ها

جحا : ده ظلم جناب الوالى.. بقرتنا ماتت مقهواه.. وأنا باطالب لها بالقصاص.

الوالى : ها ها ها ها ها ظريف لطيف فلد جحا أحضر قاضى حيوان.. جناب قرد وجناب ثعلب من شان عمل محكمات.. ها ها ها ها ها

جحا : أنا طالب العدل والانصاف من ثور حظرتكم

الوالى : حيوان عقل يوك.. ما فيش مفهوميات.. والى ليس له سلطان على حيوان وافنذم تريد فلد جحا والى يعاقب ثور حظرتنا.. مش معقول افنذم.. ها ها ها ها ..

الوزير : كبير دماغك يا جحا.. عايز الوالى يعاقب ثوره.. ما تعرفش أن دم الحيوان مهدر

جحا : العفو والسماح يا جناب الوالى.. أنا اللى غلطان.. من ساسى لراسى.. أنا حكيت الحكاية بالقلوب..

الوالى : ازاي فلد.. دم حظرتكم خفيف.. ايش تقول احكى جحا..

جحا : صبرك عليه يا مولاي.. لما ألم نفسى.. أنا قاصدى أن بقرتنا السوداء وتوركهم الأحمر..

الوالى : ماله ثور حظرتنا.. زعلان فلد

جحا : توركهم عاكس بقرتنا السوداء، الدم غلى فى عروقها.. انقهرت من كلامه الوحش نطت فى بطن ثور حظرتكم.. وقع ما حطش خوار.

الوالى : ثور أحمر مات.. محاكمات.. اعدامات لبقرات مجرمات.. بقرة سوداء اراهيبية مفتريات.. وكمان كل من حرّض وكل صاحب حيلة.. مفهوم فلد وزير سامع فلد قائد شرطات نفذ فرمانات.

جحا : هو ده بيت القصيد. هنا بيت العله.. لكان من أصله كان فيه ثور حظرتكم ولا كان فيه بقرتنا السمرة..

الوالى : حكايات نوادر.. مش حقيقة فلد.. طمن قلب والى يحب تورة..

الوزير : بس وراه عبر يا مولاي.. وسخرية من الذات السلطانية

الوالى : قولى فلد جحا حكاية مش حقيقة (يومىء له بالراس) فين حكايات مرححات خيالات

سعيدات.. الف ليله فلد وليله.. سنيورة شهر زاد هانم

جحا : (لطارق ووردة) مش عايز يسمع غير الكلام اللى بيسره ما فيش فايده.

القاضى : احكى لمولانا حكاية من كليله ودمنة

الوالى : مين فلد كليله وفلد دمنه

الوزير : حيوانات.. يا مولانا

الوالى : مش اريد حيوانات. اريد حريمات. بهلونات.. بهليل فلد. فاهم جحا

جحا : كان فيه والى جميل ورقيق ابيض وخدوده حمرا ١١١ على كل خد ورده وكان عنده رعية ارزقيه.

طارق : الوالى عالى.. والرعية وقعين من قعر القفه..

الوالى : شى جوزال.. والى عالى.. مثل حظرتنا ورعية.. قفه. عفارم عفارم

جحا : من ظلم الوالى والحشية المفترية.

وردة : هربت الرعية

طارق : سابك له البلد وهجت

الوالى : راعية هربت فين فلد.. طلع راعية من جراب جحا

جحا : هاجروا يا مولانا

الوالى : رعية خدم حشم.. جوارى. حرس.. فلاحين.. كله كله هرب

الوزير : خيال يا مولانا حواديت.

وردة : فضل الوالى لوحده وحنة من الرعية

جحا : اللى قاعد قاعد لغرض فى نفس يعقوب.. طمعانين فى الوالى

الوالى : كلام يوك.. حكايات مزعجات.. مش مسليات

جحا : خيال تسالى لياالى.. سيدنا الوالى

جحا : ما فضلش غير الحمير .. والبوم

الوزير : ده حل عبقرى.. يا مولانا.. كده تتحل كل مشاكل وأزمات البلد

الوالى : هو جيش وفلاحين مش راعيه فلد



جحا : رعيه يا مولانا  
الوزير : احسن يا مولاي.. احنا هانوفر كافة شىء تريده.. هانوفر لك كل سبل الرفاهيه  
الوالي: انتى مش عايز تهاجر معاهم فلد من شان طمعان فى كرسى حظرتنا  
الوزير : خدامك ما يفرقشك إلا بالموت  
الوالي : تتمنى موت حظرتنا. أنا فاهمك فلد خلبوص  
جحا : إيه يعمل الوالى الهمام؟  
الوالي : ايه يعمل فلد جحا؟ والى مسكين  
الوزير : يأجر شعب  
جحا : هى الشعوب بتأجر يا ندمان..  
الوزير : يا خد شعب سلف.. معونة.. لمدة سنة.. ويعدىن شعبه الأولانى يغير يرجع تانى..  
ق الشرطة : شعب مأجور.. ممكن يعمل ثورة ويستولى على الحكم. شعبنا طيب يا مولاي مهاود..  
ومسامح. وناسى.. وصبور.. وطويل البال.. شعب لقطة  
الوزير : الشعب اللى هانأجره.. نكتب فى العقد مفيش ثورات ولا انقلابات  
الوالي: ومين يدافع عن والى.. مين يحوش عدو لئيم على حدود ولاية حظرتنا  
جحا : الوالى يدافع عن نفسه.. والحشية أول ناس تهرب من الميدان  
الوزير : احنا يا مولانا لسه قبضين على تشكيل اراهابى.. وماحبناش نذعج جنابك  
جحا : شعبك حصنك.. شركة فى خيرة.. يدافع عنك ويفديك برقابه  
الوالي : رعية قعر قفه تشارك مولاه.. شعبى هريان يجلس على عرش حظرتنا.. يصنع فرمانات..  
فلد جحا عقل حظرتكم يروح مرستانات..  
الوزير : قاصده يا مولاي يبقى له كلمة معاك يشاركك ملكك.  
الوالي : أنا أقول.. كلمة شعب يقولها فلد جحا وخلص.. أنا اسمع كلمات مرحات.. حكايات .  
جحا : طباخ السم بيدوقه والشعب اللى ملوش.. قرار ملوش وجود يبقى شعب تايه هريان..  
الوالي : ارسل منادى فلد وزير من شان يدور على شعبى تايه هريان.. زعلان من حظرتنا..  
فرمان فلد من شان من يقبض عليه ياخذ مكافآت وهبات عظيمات. مفهوم حظرات..  
جحا : واللهم ما انت فاهم حاجه بدماغك الاسطنبولى..  
الوالي : انت فلد خرسيس تهمس تقول إيه؟  
جحا : بادعى لك.. بطول العمر يا مولاي..  
الوالي : جلسات عكنات.. فىن مسرات.. ضحكات.. قلب حظرتنا حزنان مولاك فلد جحا يريد  
قهقهات امبساطات. مزاجنا يوك فلد..

**الوزير :** سيبك يا مولاي من حكايات جحا.. وإن ادخل عليك الفرح والسرور  
**الوالى :** «صمت ثقيل» ثم يشير بيده إذاًناً لبداً فقرة ترفيحية.. فيصفق الوزير بيده لدخول جوقته الخاصة.. التى لا تدخل.. بينما تدخل جوقة جحا الغنائية مع دهشة الوزير وغضبه..  
**الوزير :** انتوا مين وجايين منين.. فين الجوقة اللى أنا جاييها..؟!  
**جحا :** اللى انت جاييها لسه ما وصلتتش.. فأتنا اتصرفت يا جناب الوزير ندمان..  
**الوالى :** «لجوقة جحا» انتوا مين فلد؟  
«يشير لوردة بالانقرب منه» أنت مين سنيوره أموره؟  
**طارق :** دى زوجتي يا مولانا.. فنانه ها تغنى أحلى الألحان  
**الوالى :** غناد سنيورات مليحات عفارم. تعرفى ترقصى سنيورة أموره؟  
**وردة :** بعد ما أغنى وتسمع فنى.. هانرقص رقصة السيف «تنظر ومعها جحا وطارق وأوتباعهم للوزير ندمان الذى يظهر عليه الغضب والقلق والارتباك»  
**جحا :** غنى يا وردة هن فن الحارة  
**الوزير :** اشمعنى الحوارى. ده فن ردىء يا مولاي..  
**جحا :** فن الشعب!!  
**الوزير :** أغانى العامة والدهما الدهماء، ما يصحش يسمعها مولانا..  
**الوالى :** شعبى الهربان يغنى.. سمعنى فلد.. غنى سنيورة أموره.. ايش يقول شعبى.. «تقدم المجموعة أغنية تقول :  
أصل الحكايه.. لراعى غنم  
دخل عيله.. الديب بالحكم  
لابس ملابس.. الوا عطينا  
وقال لولاك.. ما اهتدينا  
راغى الغنم.. صدق كلامه  
واهلا تفضل.. يا أخينا  
مرحبا وسهلا.. ادخل ودينا  
الديب دخل.. ووراهم الأمم  
اكلت يا سيدنا. الراعى والغنم  
نحكى الحكايا.. وفيها العبر  
والقصد واضح.. دليل ورايه  
للى ها يفهم. حكمه ومرايه

صلوا على أحمد... طه نبينا  
معانيها أن هناك مؤامرة تحاك للبلد للقضاء على والى.. والاستيلاء على البلد بمساعدة  
الوزير ومعاونيه موسى.. وأمير المدينة الصديقة. ومع انتهاء الغناء يتوتر الموقف ويصبح  
جحا وأعوانه وقائد الحرس فى جهة وفى جهة أخرى الوزير وبعض الحرس إلى أن يصل  
حاجب والى الذى يحمل رسالة إليه فيتسلمها والى الذى يحمل رسالة إليه فيتسلمها  
والى ولا يقرأها ويعطيها للوزير الذى يعطيها لجحا كى يقرأها.. يتسلم جحا الرسالة  
ويهمس فى أذن طارق ويعم المكان حاله من الهمس المتبادل.. مع توتر الموقف بما يوحى  
بقيمة وخطورة ما تحويه الرسالة إلى أن يأمر والى بقراءة الرسالة..

**الوالى :** اقرأ رسالات فلد جحا..

**جحا :** من موسى ابن شولج إلى والى البلاد.. نحذركم من مؤامرة دنيئة وخطيرة يدبرها..  
«صمت» جحا وأعوانه. ولو أردت تعرف التفاصيل ارسل لاهضارى بين يديك الكريمة  
لأطلعك عليها.. عبيدكم وخادمكم الأمين.. موسى ابن شولج..

**الوالى :** مؤامرات فى قصر والى.. يدبرها فلد جحا «لجحا» طلع مؤامرات فوراً  
**الوزير :** تقبض عليهم يا مولانا.. المتأمرين؟!

**الوالى :** اقبط افندم «لجحا» أنت تحرض شعبى المسكين يترك مولاه.. عدوات فلد جحا.. جحا  
حقود.. متأمر خلبوص

**قائد الشرطة :** بس يا مولاي الحقيقة مش موجوده.. دى مجرد ورقة مجهولة

**الوزير :** انت بتشك فى كلام مولاك. هو فاهم بيعمل إيه.. نفذ يا قائد الحرس

**جحا :** حاسب حاسب.. ده شغل عافيه وهبل.. فبن عقلك يا مولاي. ازاي يا مولانا تصدق كلام  
اعدائك.. وتقبط على اصدقائك

**الوالى :** الورقات تقول انتوا اعداء حظرتنا..

**الوزير :** «يميل على والى ويهمس له» خونه. يا مولاي مصيرهم إيه؟ اعدام يا مولانا..

**الوالى :** اعدام. اعدام فوراً.. أسرار خيانات.. من غير ما يعرف مولاك

**جحا :** هو اللي كاتب الورقه يا مولانا الطيب

**الوالى :** انت ندمان تعمل مؤامرات من ورا ظهر حظرتنا فلد.. قائد حرس اقبط على خونه فلد  
قائد حرس.. لكن لا تقبض على أموره سنيورة..

**قائد الحرس :** يا مولانا ازاي الورقه اللعينة دخلت قصرك لازم هنا حد من أتباع موسى وخونه  
متعاونه معاه..

**جحا :** عليك نور يا أبو زالف.. انت فهمت الفولة..

الوالى : انت فلد «لقائد الحرس» فهمتى قولة.. وأنا مش افهم فوله فلد.. فين هو فوله فلد..  
القائد : لو أذن لى مولاي نحضر موسى من السجن.. وهو يعترف بكل شىء أمامك يا مولاي..  
الوزير : يهمس فى أذن الوالى فينهره بعيدا»  
الوالى : انت فلد وزير حقير مقبوض عليك. ممنوع همسات لمذات.. قولى كل حاجات أمام  
حظرتنا.. انتن هاتكلى عقل حظرتنا.. بكلام خطير .. تهديدات فلد.  
الوزير : يا مولانا كلامى مع جنابك أسرار.. مش لازم عامة الشعب تسمعها..  
الوالى : انتى تقولى كلام بطل؟ كلام قبيح؟ كلام أدب يوك..  
الوزير : لا يا مولانا!!  
الوالى : تبقي تقولى كلمات أمام الناس  
الوزير : دى أسرار يا مولانا  
الوالى : مفيش أسرار قول فلد..  
الوزير : موسى يا مولاي بيكفر عن ذنبه وبعث لك أربعين عبد وأربعين جاريه وأربعين صندوق  
هدايا دا غير..  
الوالى : «مقاطعا» فين فلد.. من امتى فلد؟  
الوزير : من الفجر يا مولاي.. ونسيت اقوالك  
جحا : واربعين جوقه غنائية.. دى رشوة يا مولاي ما تقبلهاش..  
الوزير : اخرس يا قليل الحيا والدين. بتسمى هدايا الوالى رشوة دى إهانة لمولانا.. وبعدين دى  
قبلها الوالى خلاص..  
الوالى : «يفكر فى حيره وصمت»  
جحا : الوالى لسه بعضمة لسانه معرفش حاجه عنها يا وزير.. دى مؤامرة يا مولانا... والدليل  
ويانا بره..  
الوالى : هدايا مؤامرات حكايات مؤامرات.. ورقات مؤامرات..  
جحا : أيوه يا مولاي.. الجوقه اللى بعتها موسى.. زى هدايا على بابا والأربعين حرامى.. والأخ  
قاسم. قصدى الوزير ندمان الخاين يا مولانا..  
الوالى : أمان ربي أمان.. جوارى.. عبيد.. هدايا.. لصوص فرسان قاطع طريق وفلد موسى  
لصوص.. وصناديق هدايا فلد..  
جحا : جواها سلاح. خناجر وسيوف ويلوى مسيحه..  
الوالى : مجوهرات بلوات مسيحات. عقل حظرتنا مش قادر اتصرف افندم فين شورات قائد  
شرطات..

قائد الحرس : أنا عارف موسى ابن شولج يا مولاي.. وحكاية أنه بيعت هدايا وعبيد لوجه الله أو  
لوجه السلطان.. دى شىء مستحيل لكن فيه حقيقة غاييه..  
الوالى : فزورات. حظورات فسر كلمات بسرعة فلد..  
طارق : أنا اقولك على السر يا مولانا. والسر كان فى الأغاني .. اللي فهمنا عمنا جحا.. لكن  
عشان لغة الحوارى غير لغة القصر كان صعب عليك تفهمها..  
الوالى : انت مين فلد.. ويتقولى أيه ياربى نفسى أفهم؟  
طارق : اسأل وردة يا مولانا.. اللي رباه موسى وعرفت أسرارها  
قائد الشرطة : وردة بنت موسى اللي اتخطفت منه؟  
طارق : قصدك اللي خطفها موسى وهى طفلة..  
وردة : دى مؤامرة عليك يا مولانا وعلى بلدنا. موسى وأعوانه وديوله اللي فى القصر عايزين  
ينتقموا من شعبك ومثلك  
طارق : دبروا بكره العبيد والحوارى والجوقة الموسيقية جيش يا مولانا بينازعك ملكك..  
جحا : قبضنا على أربعين حرامى.. فرقه الجوقة الشعب حابسها عنده.. ولسه العبيد والحوارى  
والسلاح.. والبلوى أعوانه الخونه.. مستخبين  
الوالى : امان ربى امان.. كلام فلد جحا صحيح؟ فلد قائد حرس.. أقبض على عبيد وحوارى  
قاطع طريق.. وهات صناديق بلاوى فورا ..  
جحا : عفوا يا مولاي.. تسمحلى تسمع شورتى.. فكرة لوجه الله ..  
الوالى : شوره فلد جحا .. شور ..  
جحا : امنع أى حد يخرج من القصر.. حتى وزيرك ندمان.. ويقوم قائد الشرطة بالقبض على  
جيش العبيد والحوارى ويشددوا الحراسة على موسى وأعوانه فى السجن .. من غير ما  
يعرفوا أننا فهمنا ملعوبهم.. وفقسنا الفوله..  
الوالى : الفوله هى اللي قالت لك فلد جحا.. عفارم فوله هانم.. والى يعطيها هدايا عطايا ..  
الوزير : يا مولانا جحا من الشعب ..  
الوالى : شعبى فلد ..  
الوزير : وموسى من الشعب ..  
الوالى : موسى يوك خرسيس فلد ..  
الوزير : دى مؤامرة اراهيبية شعبية مدبرها جحا واعوانه ضدك.. أنا حايش الشعب عنك يا  
مولاي..  
قائد الحرس : اسمع يا ندمان .. المؤامرة انكشفت خلاص.. تسمحلى يا مولاي أقبض عليه ..

الوالى : نفذ خطات جحويات فوراً حالا .. «يتم القبض على الوزير .. وبعض الحرس من أتباعه..  
وبعد ان يستقر الموقف نسبياً .. يسمع اصوات خارجية من داخل وخارج القصر..»  
أصوات من : القصر محاصر.. سلم نفسك يا والى.. أنت والى معاك.. وأحنا نحافظ على روحك..  
صوت موسى : مفيش داعى للمقاومة جيوشنا محاصرة المكان.. وأى مقاومة هانضرب فى المياني  
بدون رحمة..(يدخل موسى وأتباعه)  
أم سته : هانهد القصر على اللى فيه.. اخرجوا رافعين الراية البيضاء .. هانضرب بدون رحمة.  
الوالى : سلم نفسك فلد جحا.. إفدى روح مولاك  
جحا : طول عمرنا بنفدى سلاطينا.. وسلاطينا بيعينا (يقربون من جحا)  
طارق : اللى هيقرب منه هاتكون نهايته على إيدينا  
موسى : جحا البداية  
الوالى : فلد موسى خرسيس.. خسيس.. إيش تريد  
جماعة أم سته : كل حاجة.  
الوالى : تريد تاج مولاى.. خد بس بلاش قتل  
جماعة أم سته : مش كفايه  
الوالى : تريد قابوطى سلطانى خذ فلد  
أم سته : مش كفايه  
الوالى : ايه أم سته تريد سروال والى.. دى جرسات . بلاش فضيحات.. استر والى مسكين. مش  
يريد ياخذ.. أه بمبه.  
جحا : فاضلك ايه غير ورقة التوت يا سبع البرمبه  
طارق : احنا معانا النبوت .. واللى هيقرب ويفوت يستقبل الموت ..  
موسى : (يخلع نظارته) العرش والصولجان والأرض اعالى التيجان  
جحا : حلمك المشؤم بعيد عن دقتك ..  
طارق : وان كنتوا وصلتوا لصاحب العرش .. مش هاتقدروا توصلوا لنا.. وان متنا هايصيح  
عضمنا متايس.  
وردة : ارداتنا . هاتغلب جبروتكم  
طارق : لوفيكوا فارس محارب يطلع لى.. سيفى أهوة..  
أم سته : العنتريه مش هاتفيد .  
شمس : انتوا يا أما أسرى.. يا اما منتحرين..  
طارق: بس هناخد قصادها رقابكم.. يا جنس خسيس يا حثالة أهل الأرض.

موسى: حنودنا هاتعدى حنودكم  
جحا: وجودنا يا وجودكم.. ها نتغدى بيكم قبل ما تتعشوا بينا.  
شمس: كل الطرق اتفتحت لينا.. اشمعنى انتوا اللى معصلجين.  
موسى: نارنا هاتحرق ما تسيبش حد.  
الوالى: انتى هاتروحي النار فلد موسى.. ومعاك حيزيونه عجوزه ام ستات.  
موسى وجماعته : انتوا خلاص انتهيتموا..  
وردة: من ورا كل حجر.. ومن قلب كل شق فى الأرض من تحت أن نبتة خضره.. مع كل ومضة  
روح هنطلع لكم ونقض عليكم.  
موسى: انتوا بقيتموا عبيد فى المزاد واحنا ادينا ع الجرس.  
جحا: يا الله يا ولاد.. طهروا المكان.  
يا الله يا ولاد.. يا الله مستننين ايه.  
(يحدثم الصراع بين جماعة جحا وجماعة ام سته ويثبت المشهد..)

تمت بحمد الله





# حكاية دعبل



#### الشخصيات :

##### أولا : عائلة دعبل

دعبل : الفنان الشعبي الشامل.. يغنى ويرقص ويرتجل

شمعلولة : زوجة دعبل.. تشخص كودية الزار ومذبة التلفزيون..

ننوسة : حبيبة دعبل

حماريوس : صديق دعبل..

الأراجوز : صديق دعبل

##### ثانيا : شخصيات السيرة :

الملك زين اليزن : حاكم بلاد اليمن

سيف بن زى يزن : بطل السيرة الشعبية

الملك سيف أرعد : ملك بلاد الحبشة..

سقرديوس : حكيم الملك أرعد..

الملك أفراح : الذى روى سيف اليزن..

الأميرة شامه : بنت الملك أفراح

خراق الشجر : مدرب أسود ومعلم - ف الرماية والخيول

ساحرة المغارة : ساحرة شريرة..

العبد سمعون : قاطع طريق وشيخ متصر..

##### ثالثا : شخصيات يستدعيها دعبل من التاريخ الفنى :

الملك تركان : قاتل الأراجوز الإنسان

الوزير عثمان : وزير الملك تركان وصانع الأراجوز الدمية..

رئيس الحرس : خيال مائة وقاطع طريق

زرقاء اليمامة : كاشفة الطالع لدعبل

المحلون : يشخصون شخصيات السيرة والشخصيات المستدعاة..

##### رابعا : السلطة الفنية :

منادى ١ : من العصر المملوكى يتحول إلى بصاص...

منادى ٢ : من العصر العثمانى يتحول إلى عباس

منادى ٣ : من عصر ما بعد محمد على يتحول إلى مخبر سرى

منادى ٤ : معاصر - يتحول إلى جاسوس..

## المقدمة :

المكان : أى حين يسمح للقاء الناس بالناس... يمكن أن تقدم هذه الفرجة الشعبية..  
الزمان : زمن نفسى - داخلى - هو زمن الذاكرة المنسالة ذات الطابع الشعبى حيث يتداخل الواقع والتاريخ والحلم بأنواعه المختلفة.. وكذا الحكايات والسير الشعبية والرؤى الخاصة و.. الخ..

الديكور : قطعة من الديكور المتلائم على هيئة ماردر خير يرتدى جلبابا شعبيا وينام متكئا على ربابته التى تتناسب وحجمه تستخدم الجلباب الشعبى كيانورا خلفية أثناء العرض.  
يخرج دعبيل من المارد عربة تشبه فانوس رمضان.. يستعدى من دا خلفها شخصيات عائلته، ولها طاقات أخرى تستخدم على مدار العرض (قصور - صندوق الدنيا- بيت المخيلة الظلية - بيت الأراجوز - حصان .. الخ)  
ملحوظة هامة : وكما يتضح فهذا الديكور ليس واقعيًا، إنه ديكور يرتبط بطبيعة الزمن النفسى من تداخلات وتخرجات زمنية.. فالديكور على المستوى الدلالى يحمل فى طياته تعبيرات مختلفة عن تلك الأزمنة ويكتنز بالعناصر التعبيرية والرموز الأسطورية.

## استهلالية

(فى فرحتنا الشعبية اللعب على المكشوف، إذ تبدأ فاعليات العرض/ الفرجة بتقديم البرادة) الارتجالية بما يلائم جمهور الفرجة وغالبا ما يقدم الفنان الشعبى (المواويل).  
مشخص (١) : (يغنى وحوله جوقة التشخيص والمعلقون)  
غناء

يا مهرتى لاتبكى ارجوكى  
وإن بيكتي.. ابكى ع اللي نسيوكى  
ابكى ع اللي بدل الفوارس بالخوانس  
ابكى ع اللي بدل عنتره بجوكى.. يا حيف  
حلقوا لك غرتك.. وقصصوا الدليل.. يا حيف  
صيرتى تتغندرى بنوادى الليل.. يا حيف  
نسوكى المزمار.. نسوكى المواويل  
نسوكى الطار.. والطبل والليل  
وع مزيكة الديسكو يا حلوة رقصوكى  
يا مهرتى.. لاتبكى ارجوكى  
.....  
شوفتك مع الزير سالم يتتعالى  
شوفتك مع ابن شداد فى العلالى

شوفتك مع أبو زيد الهلالي  
وكيف اشوفك اليوم وفارسك جوكى

.....

يا يثبت داحس والغبراء  
يا بنت الابر والعنقاء  
لا تقفى جنب الحيطه.. تتدلى. وترخرى  
ويوم ما تشوفى البرنيطة بتدوى دوب وتسفسخى  
يامهرة عيب.. كيف غيروكى

.....

كنتى تتحدى الخطر  
خطوتك تقدر شرر  
تجرى مثل هبوب الريح  
سيرتى تجرى بالابر  
وين الفحولة وين الحيل  
وين الاصاله يا دام اصيل  
ياللى ملاتى الدنيا سهيل  
كيف اصبحتى تقولى ماء

.....

كنتى فى ساح الوغى  
تسحقى كل من طغى  
كنتى فى اشرف حروب  
مش حروب المغممة

.....

الله اكبر ايه جراك  
الحال ده عمره ما كان حالك  
لا البغل عمك.. لا الجحش خالك  
كيف انسجمتى مع الغرباء

.....

يا مهرة غيب.. يا كحلة عيب.. يا شقرا عيب.. يا سمره عيب  
عيب يا بنت الصحراء  
يامهرة عودى للصحراء.. يامهرة عودى للصحراء.  
(يقطع الغناء صوت مؤثر يعلن عن هجمة بوليسية على جوقة الغناء يختفى المشخصون)

خلف جلباب المارد العملاق.. بينما جماعة/ البوليس العسس تعلن بعد التفتيش عن منشورتها وبياناتها التاريخية القديمة/ الحديثة)

#### الافتتاحية :

(تبدأ الفرجة من وسط الصالة بعد أن تسحب الإضاءة تماما.. نرى وسط الجمهور جماعة من الممثلين تضيء بطاريات صغيرة تبحث عن شخصية دعبل.. «مؤثر موسيقى مناسب».. حتى يصل أحدهم إلى مكان يصلح لمخاطبة الجمهور.. يسلم عليه الباكون بطارياتهم لتتعرف من ملابسه على أنه الشخصية المملوكية.. يدق على طبله كالسحراتي ويعلن منشوره :

**منادى ١ :** يا أهل المحروسة.. يا كل ناسنا الطيبين.. فرمان سلطانى بأمر سلطان البلاد.. تقرر القبض على الشقى المارق.. والزنديق الهارب دعبل بن شمس الدين الخزاعى.. الهريان فى وسطكم من زمان.. وذلك لأنه قد عاب فى الذات السلطانية وجعلها ملطشة لكل من هب ودب من الرعية.. واستخدم فى تمرده.. أسلوب المساخر.. وأدوات الكفر والبذع.. والحاضر يبلغ الغايب .. كفانا الله وكفاكم شر المصاييب.. يا أهل مصر المحروسة.. ياكل يا ناسنا.. إلخ....

(يخرج من بقعة الضوء مع اختفاء صوته تدريجيا إذ تنتقل بقعة الضوء لمكان آخر لنرى منادى ٢ بزيه العثمانى)

**منادى ٢ :** فرمانات سلطانيات.. من باب عالى.. بأمرنا نحن.. سلطان سلاطين.. قررنا ما هو آت.. مرسوم سلطانى.. بإعدام الجانى الشقى الخرسيس ابن جنانى.. فلد بهلول.. دعبل خزاعى.. ممسخراتى.. قرادتى.. حاوى.. قراقوز سليل لسان.. هريان وذلك بشأن .. إنه عاب فى جناب سلطان حظرتنا.. ومن يتستر عليه من حظرتكم.. أو يخفى معلومات.. يصبح معاه فى خبر كان ونقطع لحظرتة رقبات ويدخل معه لوماتنا.. وكما فرمان.. من يقبض عليه أو يسلم راسه لحظرتنا له مكافئات عظيمات.. وهبات كبيرات مفهوم حظرات؟!.. فرمانات سلطانية.. من باب عالى (يخرج من بقعة الضوء مع استمرار صوتهم.. لنرى المنادى الثالث يرتدى زى تقليدى لرجل الشرطة السرية يقرأ من جريدة مبالغ فيها..

**منادى ٣ :** تعلن نظارة الداخلية ونظارة الحقانية عن مكافأة مالية قدرها مائة مجيدى مصرية لكل من يدل أو يرشد أو يدلى بأيتها معلومات أكيدة عن المجرم الهارب من العدالة دعبل عبد الله شمس الدين عبد الله الخزاعى المشهور بابن الكودية وذلك لأنه مخايل وعمال يخيل ع البشوات والبكوات. وأصحاب المعالى والمقامات.. وأوصافه كالتالى.. مش طويل ولا قصير.. بين بين.. رب كده يعنى ومد ملك.. ولا تخين ولا رفيع.. تلت كده يعنى.. ولا أبيض ولا أسود.. أسمر على قمحى كده يعنى.. يرتدى طرطورا أحمر ساعات وعمه بيضه ساعات.. ولا يرتدى غطاء للرأس فى معظم الساعات.. من يجده أو يعلم شئ عنه من

قريب أو بعيد يبلغ السلطات في الحال وله الحالة.. تلعب نظارة الداخلية ونظارة الحاقية  
(يختفى من بقعة الاضاءة مع استمرار صوته لئلا ينادى ٤ بزيه العصري)..

**منادى ٤ :** من محطة أى آره نعلن لحضراتكم هذا النبأ الهام.. الصادر من المؤسسة الفنية  
العصرية بشأن مساعدة السلطات في القاء القبض على أفراد التنظيم الإرهابي الذي  
يتزعمه المجرم الهارب دعبيل ابن شمس الدين ابن دينال الخزاعي.. وذلك لأنه يحض  
الجماهير على التجمهر.. ويحرض الأمنين من الفنانين الشعبيين على قلب نظام معايير  
المؤسسة الفنية والثقافية العصرية.. وقد رصدت المؤسسة مبالغ عظيمة من المال نظير  
الإرشاد أو القبض على هذا التشكيل العصابي الإرهابي وتسليمه للسلطات.. هنا محطة  
تليفزيونات أى آره.. نعلن لحضراتكم.. (يتجمعون جميعا في بقعة اضاءة واحدة في  
حين الفرجة وهم يعلنون منشوراتهم متجهين نحو المارد الشعبي يتفحصونه بحثا عن دعبيل  
وجماعته ونسمع أصواتهم في إضاءة شبحية)..

**صوت منادى ١ :** أنا بادور عليه بقالي أكثر من ربعميت سنة في سلقط في ملقط مش عارف أتم  
عليه.. تقولش عامل زى الهوا تحس بيه لكن ما تقدرش تمسكه.. ده واد ابن عفاريت..  
زى ما يكون لابس طاقية الاخفا بتاعة ألف ليلة..

**صوت منادى ٢ :** أمان ربى أمان.. حطرتنا مش يقدر يرجع من تلاته ميات سنوات أفندم.. فلد  
دعبيل ابن شياطين.. حضرة أمه كودية زعيمة جنيات.. تعرف أفندم لو ارجع من غيره..  
تضيق رقبات حطرتنا.. أظن أفندم فلد دعبيل خطير اعمل مقالب حركات فلد على زييق  
مصرى!!

**صوت منادى ٣ :** مناخيرى دى تشم المجرم من دول على بعد عشرين فدان وياما ادبتنى مكافات  
على أوله.. ومن يوم ابن الهرمه ما هرب وأنا دايع وراه كعب داير.. ولو ما رجعتش بيه  
حيققطعوا مناخيرى ويجيبوا مكانى كلب هول.. واخذ بالك يا باشا.. لازم ندور عليه بعيد  
عن هنا.. الناس دلهم موالسين معاه على الطلاق موالسين معاه وتلاقيها مخيباه في  
وسطيههم!! كلامى صح يا خواجة!!

**صوت منادى ٤ :** قمرنا الصناعى عجز تماما عن التعرف عليه وتحديد مكانه.. حتى الطبيعة  
نفسها بتضللنا.. بتساعده يا بشاوات.. حاجة غريبه يا حضرات.. كل ما نقرب منه  
ونحاصره.. وخلص حط الحمام.. طار الحمام دى بلوة عصرية مسيحة بمواد نووية دولية..  
ولا شارلوك هولمز وأرسين لوپين دى حاجة غريبة.. امبيسبول جنتلمان..

**صوت منادى ٣ :** يا للا يا جماعة ندور عليه في مولد سيدى طنناش.. يمكن بركاته تهل علينا..  
ونقبض عليه.. بس قبل ما نتحرك لازم كليتنا نبقي ايد واحدة.. مش كده يا خواجه؟  
(يضاء جسم المارد فجأة فينفزعون ويولون الأدبار)

**بلاك**

(من بين الجمهور نرى جماعة المحلقين (الجوقة) يحملون فوانيس مضاءة.. ويغنون وهم في طريقهم إلى حيز التشخيص)  
المحلقين : لوما اللمة ما اجينا..

الله حى..

ولا تعبنا رجلينا..

الله حى..

ما تحلوا الكيسه وتوتونا..

الله حى..

ادونا ٢٠٠ جنيه

الله حى..

٢٠٠ جنيه ما يقضونا..

الله حى..

ولا يودونا على بر الشام..

الله احى..

ونجيب الخوخ مع الرمان

الله حى..

وكمان نجيب لبن العصفور..

الله حى..

ونقول يا ناصر يا منصور..

الله حى..

الجميع : هاتوا العادة رب خليكوا.. العسس ناموا والولاد قاموا والفانوس طلق.. هيه.. اخرج يا ااا دعبل..

(وقد انتهوا من رفع الجلباب عن المارد وظهر الفانوس الذى يخرج منه دعبل ويغنى مقدما عرائسه)

دعبل : بسم الله الرحمن الرحيم ح نبتدى الليلة..

أنا فنان ويافن قديم بس فنونى بجد أصيلة

ومعايا أراجوز من خشب اللوز..

راح يعمل هيصة وهليلة..

لبست البوصة.. خليتها عروسة..

وانضمت لحريم العيلة..

يا مساء الفل يا خيال الضل

علينا يطل مع الحيلة..



ما أنا أصلى مخاوى بلياتشو وحاوى..  
سريح بغناوى يا دى النيله..  
ح نغنى يا ليل ونقول يا عين..  
(تختفى عليه دعبل خلف الفانوس الكبير)  
المخلقون : ح نغنى يا ليل.. ونقول .. (نمرة الحاوى)  
(تهبط من أعلى لوحة يكتب عليها النمرة الأولى.. نمرة الحاوى)  
دعبل : (مقاطعا) قرب.. قرب..  
شوف واتفرج..  
فتح مخك بحلق عينك..  
سلك ودك ع اللى ح يحصل..  
بينى وبينك..  
قرب قرب..  
شوف واتفرج..  
حاوى حاوى.. حاوى توت..  
أدى البيضة والكتكوت..  
وأنا جبار م الطارة ح أفوت..  
هاللى أب.. هاللى أب.  
(يرتفع إيقاع النقرزان فى سرعة ايذانا يبدأ نمرة الحاوى)  
حاوى توت.. حاوى حاوى حاوى توت..  
(يخدع الجمهور ولا يقفز من الطارة ويعاود المحاولة)  
طب صقفة يا اللى تحب النبى..  
وكمان صقفة يا اللى تحب دعبل عاشق النبى..  
(يشعل دعبل كرة النار التى فى نهاية السبخ الحديدى)  
قالك يا بن آدم أيه اللى رماك ع المر..  
قال اللى أمر منه..  
ناس تاكل الكفيار..  
وناس تاكل النار  
(يضع فى فمه كرة النار ويخرجها وقد أطفئت)  
لا يهمنى نار ولهب وشرار..  
وأنا واد جبار م الطارة ح أفوت..  
توت توت حاوى توت..  
(يقفز من الطارة بمهارة ويدور بالرق حول المخلقين)

وأدور حوالين كل كريم يمد أيده فى جيبه وينادى يقول :

(يرصد وجود العسس والمخبرين)

(الملحقون يخرجون جيوبهم الفارغة)

معلق ١ : خد يا دعبيل عشان عشا العيال..

(يمد يده مقبوضة داخل الرق لنكتشف أن الرق بدون رقمة (جلدة) فيضحك المعلقون)

منادى ٢ : (يخرج من بين المعلقين ويمسك بدعبيل)

ظبطك يا مجرم يا متسول يابن اللثيمة..

دعبيل : دا أنا الواد الحاوى يا حضرة الصول!!

منادى ٣ : ح تلعب على يابن الحواة؟! فين الرخصة؟!

دعبيل : أنا مش بيع.. أنا فنان شعبى.. بتاع الناس!

منادى ٣ : مدام قلت بتاع تبقى بيع.. هات الرخصة..

دعبيل : أه.. (لنفسه) أما أنا حته غيبى بشكل!!

(للمنادى) حاضر يا فندم.. (ينادى) يا شملولة.. شملولة..

(تظهر شملولة زوجة دعبيل وهى امرأة دميمة)

شملولة : نعم يا خويا عاوز أية؟

دعبيل : حضرة المخبر عاوز الرخصة.. (بايماء ذات معنى) الرخصة يا شملولة..

شملولة : (تقترب من المخبر وتتفحصه وتصرخ بصوت عال) يا لهوتى. يا دهوتى. الراجل الناقص

ده مد أيده على وعلى.. وعلى..

منادى ٣ : (ينسحب فى خوف) اتحشمى يا ولية..

شملولة : (تقترب منه أكثر) يا قليل الحيا يا عدم الدين. ما عندكش ولايا يا بجم.. عيب عليك. ده

جوزى لو شافك كان دخل فىك اللمان..

منادى ٣ : حصل إيه يا ولية يا كدابة..؟

شملولة : شاهدين يا اخواتى. تتهجم على وتعمل عملك السوداء وتقول على كدابة!!!

معلق ١ : روح لحالك يا حضرة الصول.. ربنا أمر بالستر.. احنا عندنا ولايا برضه..

منادى ٣ : فين الحاوى ابن الد.. هرب!!

شملولة : عايز إيه؟ عايز تعمل فى أية يا قليل الحيا..؟! يا عديم الدين!!

المعلقون : غور بقى بلاش تلاقيح.. أما راجل كبير وناقص.. عيب على بدلتك يا راجل..

منادى ٣ : حاضر.. حاضر يا ولاد الفرطوس.. بس ح أرجع لك تانى يا حاوى.. والمره الجاية مش

لوحدى (لعلق ١) واخد بالك يا معلق!!

(يخرج مع ضحك المعلقين والتفافهم حول دعبيل فى حُب)

دعبيل : من صغر سننى وأنا واد جننى مولود باغنى.. فنان جرى شاطر وفاجر ومن قديم الأزل

صعلوك بغنى.. قادر لكنى أصيل فى طبعى.. ومعايا حصانى.. (يخرج هيكل حصان له

رأس وذيل ويمتطيه ويدور به) درجن.. درجن.. درجن.. (يضع الحصان بجوار الفانوس)  
ورقى الرقيق (يشغل بالرق) وصاحبي الرقيق قاطع طريق، ورفقتي وصحبتي أهلى  
وعزوتي.. ولم أزل حكاى هجاء.. سليلت اللسان.. لكن إنسان!! دار بى الزمان وجار.. ولا  
لى صاحب ولا جار.. سواح رحال. قسمنى الزمان نصين.. نص معايا.. ونص ضدى..  
بحترتنى الليالى فى كل المطارح وأنا قلبى طارح.. سنبله خضرا.. والدنيا تلاهى وملهى  
ويلاوى.. حارة عيد!! ما هو أنا أية؟!

المخلقون : أية؟!

دعبل : عجربى وفقرى وابن حظ.. وابن حنت.. وابن أية؟!

المخلقون : أية؟!

دعبل : شحات.. وييه!! دماغى رسمالى ده غير أية؟!

المخلقون : أية؟!

دعبل : مطلوب رقبتي للنطع وسياف الوالى وحبال عشاوى.. وده ليه؟!

المخلقون : ليه؟!

دعبل : ولا يحلى الكلام إلا بذكر النبى عليه الصلاة والسلام..

المخلقون : عليه الصلاة والسلام..

دعبل : وافضل حلزون صاحب ورايا القوقعة.. وحلمى الجميل طريد الديار.. أهلى عرايس من  
خيش وقماش.. لكن قلوبهم عصافير تطير.. تنقر م الجنة الخيال وتشرب من أفكارى خمر  
الوصال.. أصحابى وأهلى كتار.. كتار.. والعسس ورايا فى المشوار..  
(يظهر من خلف الفانوس.. شخصية حماريوس الدمية)  
حمار يوس : مساء الفل يا واد يا دعبل..

دعبل : ده الأستاذ حماريوس.. رهينه عندي أمانة.. وخادم الفانوس..

(يظهر الأراجوز من الفانوس ثم تظهر دمية العروسة من شبك الفانوس)

دمية العروسة : ياسى دعبل.. خش على نمرة السيرة يابن الناس.. يمكن ربنا يفرجها عليك من  
ولاد الحلال..

دعبل : الآسة نوسة الننوسة.. عروسة حضرتى..

(تظهر دمية الزوجة مفاجأة لدعبل)

دمية الزوجة : عروسة مين يا الدلعدي؟!

دعبل : أنتى صحيتى!! شملولة مراتى.. حرمتنا المصون. عيالى.. أم سبع ترواح..

الزوجة : (تظهر بجوار الدمية) خش ع النمرة أحسن لك يا شمولول خلصنا يا فالح.

دعبل : على عينى يا حبة عينى.. (يسمع نهيق حماريوس، ويظهر)

الأراجوز : (دوميته) مساء الخير يا واد يا دعبل يابن الآيه؟!

دعبل : الأستاذ أراجوز صاحبي الوفى وشريكى فى الهم والغم.. ومُحدث نعمة

**الزوجة :** شد حيلك يا دعبل.. الزباين عايزة تتفرج بلاش لت وعجن.. يجعل كلامنا خفيف عليهم  
(موجهة حديثها للعسس)  
**دعبل :** حاضر!!.. حاضر يا عجر على حجر!! (للعسس).  
(يرتدى دعبل والمحلقيين الزى المناسب لراوى السيرة الشعبية وجوقته)  
(نزول لوحة يكتب عليها النمرة الثانية - نمرة السيرة)  
أول ما نبدى القول.. نصلى على طه الرسول.. نبى عربى سيد ولد عدنان وشفاعته قصدى  
ومطلبى يا سادة يا كرام باللى تصلوا على خير الأنام.. أحلى سيرة سيرة الحبايب..  
صلوا على رسول الله.. وما اجتمعنا إلا لنصلى عليه.. (موسيقى الرماية والآلات-  
الشعبية- ويغنى)  
كان يا ما كان.. كان يا ما كان  
كان يا ما كان.. ده كان زمان  
فى سالف العصر والأوان..  
ملك متين ذو تمكين..  
قلبه ياصحبه فدان نور..  
حاكم وسلطان اليمن.  
حامى حمى أرض العرب..  
اسمه الملك زين اليزن..  
أسمر نحيل وجبينه عالى..  
(يتقدم أحد المحلقين ويرتدى بعض الملابس بما يوحي أنه الملك زين اليزن ويختفى خلف  
الفانوس)  
وكل جبار كان يهابه..  
والصقر يقف فوق شنابه..  
وكان ياسادة يا كرام.. يالى توحيدوا الواحد القهار..  
(يقف أحد المحلقين فى غرور ويرتدى بعض الملابس التي توحى بشخصية الملك أرعد)  
ع البر التانى سلطانى شيطانى..  
أرعد ده أسمه حبشى وأنانى..  
عابد نجوم من حجر..  
وقلبه أسود كالحجر..  
تخاف الناس من جبروته..  
وتفزع الملوك من كهنوته..  
(يختال أرعد فى غرور ثم يختفى)  
واتفرج يا سلام. اتفرج يا جدع

على فن الخيال.. ولعبة البدع  
(ينتهي الفناء).. وقصة الباطل والحق المبين.. وبين حيملى فوق ضهر مين؟! وتفرج يا  
سلا!!!!!!م!!

(يختفى الجميع خلف الفانوس عدا العسس)

منادى ١ : أيه؟ ح نفضل نتفرج كده من غير ما نعمل حاجة؟!

منادى ٢ : فلد دعبل رايح عند سلطان أرعد صديق مولى حظرتنا..

منادى ٣ : ياريت أرعد يخلص ع الملك زين اليزن ويريحنا من دعبل..

منادى ٤ : المسألة محتاجة تكتيك وتنكيك وتخطيط استراتيجى عالى يا حضرات..

منادى ٣ : ما نجيب الآخر ونقبض ع الملك زين.. أيه ر أيك يا خواجه؟

«بلاك»

(إيقاعات أفريقية يظهر على أثرها قناع ضخم يتحدث من خلفه الملك أرعد)

أرعد : أنا الرهيب.. أنا المهيب.. أنا.. أنا.. أنا أرعد الحبشى.. حاكم بلاد الحبش.. أحلم بملك الأرض وما عليها.. أحلم بخزائن جدنا سليمان.. بكتاب النيل نبع الحياة.. الدم سلطاني.. والعرش أمامى.. ومن يقف أمامى.. بحق النجوم التى لا تغيب.. أسحقه كبيضة تحت أقدامى.. فسحقا لملك اليمن اللعين.. سأجعل البحر بيتنا دمه.. والجسور جماجم جنده.. سأقتلهم كلهم سأسحقهم جميعهم.. هاهنا.. هاهنا.. هاهنا..

(يظهر له قناع آخر ويقترب منه بصوت الحكيم سقرديوس)

سقرديوس : تمهل أيها الملك العظيم أرعد يا صاحب القوة.. لا تشتبك معه فى عراك أو صدام.. تمهل يا مولاي.. فإنه ملك ذو تمكين ولا تستطيع جيوشنا أن تقهره..

أرعد : ماذا نفعل يا حكيمى ووزيرى سقرديوس يا صاحب الحيلة والدهاء؟

سقرديوس : مولاي.. اسمع نصيحة خادمك ووزيرك الأمين..

أرعد ك هيه!!.. هات م الآخر..

سقرديوس : بالحيلة والتدبير نبعت له هدايا كثير..

أرعد : هدايا كثير!! جرى لعقلك حاجة يا وزير حكمتى المصون!!

سقرديوس : يا مولانا صبرك على.. ابعت له يا مولانا هدايا.. ومعها هديه من أحسن جواريك..

قمرية الخمرية يا مولاي..

أرعد : الجارية قمرية!!

سقرديوس : الخمرية يا مولاي.. زوق رفيع ح يجن الملك زين اليزن..

أرعد : قمرية الخمرية..

(تظهر شملولة بشكل مفاجئ من بين المحلقين وتندفع نحو أرعد)

شملولة : شبيك لييك.. قمرية بين أيديك يا ملك الملوك..

(يظهر دعبل صارخا ومحتجا)

دعبل : ستوب.. (يثبت المشهد بين أرعد وسقرديوس) انتى يا شملولة يا وش البومة تشخصى قمرية الخمرية يا عرة النسوان!!؟

شملولة : أنا خيال الماتة؟! هو فيه هنا حد أجمل منى؟.. ده عيونى عيون الغزلان.. وبقي خاتم سليمان.. ومناخيرى نبق الرحمن.. ووسطى ولا غصن البان..

دعبل : يا وليه يا مستقوية يا اللى وشك يقطع الخميرة م البيت.. حرام عليكى.. أنتى صحيح شبيهها فى أخلاقها البطالة.. لكن هى جميلة بحق وحقيقى.. غورى يا وليه ده لو شافك الملك زين كان قطع رقبتك على باب القصر ورمى جتتك للكلاب.. بلاش وقف حال ربنا

يوقف نموك.. خلى قمرية تركب الدور الناس بتتفرج علينا (يطردنها ويدفع بها خارج حلقة  
التشخيص) أكشن!! (يختفى) بينما تظهر دمية العروسة التي تشخص قمرية الخمرية من  
داخل الصندوق)

قمرية : (تظهر) قمرية الخمرية جاريتك وعبدتك بين ايديك..  
سقريديوس : نعطيهها يا مولاي حق صغير من السم السموم ماركة عبدة النجوم.. ياخذ منه يطب  
نايم ما يقوم..

«بلاك»

الأراجوز : (يظهر) قامت قيامتك يا دعبل يابن الكودية.. أنت روحك فين يا ولد؟!!

(العسس يظهرون باحثين عن دعبل)

العسس : مش هنا.. ولا هنا.. ولا هنا.. ولا هنا.. (يخرجون بحثا عن دعبل)

الأراجوز : (أثناء خروجهم) ما تحكى يا بنى باقى الحكاية!!

دعبل : (يظهر) أحكى حكايتى حياتى.. شعرى كتيبة سيوف تهز كراسى الحكام الظلمة وتحش رقاب كل الخونة. أغنياتى شموع تنور ليكوا الضلمة.. أبياتى قنابل على العدا.. سنابل فى حجر الغلابة.. بلابل على غصن الأحبة.. حكايتى يا سادة ياللى تحبوا المصطفى.. مطرود من جنة عمنا رضوان. م الموصل ينفونى لخراسان.. عشاس سليط اللسان.. ومن خراسان وإلى أسوان وهناك يصبح لى علوشان. صلوا ع النبى العدنان. ولادى أدواتى.. سلسال أصيل. دعبل خزاعى وشمس على دراعى.. شالله يا رفاعى يا مكلم الأفاعى.. ورب نازلة يضيق بها الفتى ذرعا.. ضاقت ولما ضاقت ضاقت.. وبقت زى خرم الأبرة.. وقالوللى مر منها يا فيل!! وأنا ريح تمر من عين اللى يسمع ذكر النبى ولا يصلى عليه..

المحلقين : عليه الصلاة والسلام..

دعبل : ماهو أنا أيه؟!

المحلقين : أيه؟

الأراجوز : (مقاطعا) يا دعبل يا بن قلمبوحة.. خش فى الحكاية ما تنساش روحك.. طلعت روحك.. خش فى السيرة يا ولد..

دعبل : يرجع مرجوعنا لمين؟!

المحلقين : الملك زين اليزن..

دعبل : عليكوا نور. الملك زين اليزن.. صحصحوا.. فتحوا. تتجحوا.. وتلفحوا.. قولنا أيه وعاشق المصطفى يصلى عليه..

المحلقين : عليه الصلاة والسلام

«بلاك»



### (قصر الملك زين اليزن)

الملك زين اليزن : اسمعيني جيداً يا..  
قمريّة الخمرية : قمريّة الخمرية يا مولاي..  
الملك زين : ليس من عادة الملوك رفض الهدايا.. ولكني أعرف تماماً ماذا يدبر مولاك أرعد..  
قمريّة : يبحك يا مولاي..  
الملك زين : أرعد!!  
قمريّة : عايز يتقى بطشك وجبروتك..  
الملك زين : أرعد لا يتصرف بهذه الحكمة.. أحذرك من تنفيذ مخططة اللعين..  
قمريّة ك والله يا مولاي أنا ما أملك من أمر نفسي شيء..  
الملك زين : لقد قبلتك كهديّة لكك أفعى شيطانة!!  
قمريّة : دا أنا غلبانه يا مولانا..  
الملك زين : أنظري إلى يدي.. ماذا ترين فيها؟  
قمريّة : مولاي.. ايدك فاضية يا مولاي..  
الملك زين : خسني وأخطأتني يا جارية السوء.. إن بيدي ملك الأرضين.. وسيف فضاء يقطع رقاب الخونة. وماذا بيد مولاكي؟  
قمريّة : أنت مولاي وتاج راسي.. واللّهي ما أعرف حاجة يا مولاي..  
الملك زين : أرعد بيده حيات يتلاعب بها.. (يمسك بقمريّة وكأنها حية)  
قمريّة : مولاي.. (في فزع ورعب)  
الملك زين : صارحيني بكل شيء ان كنتي تريدين أن أبقى على حياتك..  
قمريّة : أديني الأمان يا سلطان..  
الملك زين : أمنتك على حياتك..  
قمريّة : أراد الملك أرعد أن..  
الملك زين : تدسي لي السم في أول ليلة..  
قمريّة : وعرفت ازاي يا مولاي...!!  
الملك زين : لا أمان لمن لا إيمان له.. احكي لي تفاصيل حكايتك ولا تنسى أنني أعرف كل شيء بفراستي العربية..  
(يجلس الملك زين اليزن متكياً على سرير/ عرشه مع سماع موسيقى موحية بالموقف إلى أن تقترب من أذن الملك وتهمس له. فيبتسم منشراحاً)  
الملك زين : شيطانة في صورة إنسانة

قمرية الخمرية : أنا طوع أمك يا مولانا

الملك زين : (يدور حولها متفحصا) هاتى ما عندك من فنون الغناء والرقص يارب الجمال  
(ترقص خمرية القمرية مع استمرار الموسيقى. وأثناء استغراق الملك فى الشرب  
والاستمتاع بالرقص والغناء تدس له السم فى كأسه دون أن يدرى من حق صغير آخر  
كانت تخفيه فى صدرها.. فيشرب منه الملك.. مع استمرار الرقص فيصرف الملك الخدم  
والحشم. عدا قمرية)

«غناء قمرية»

مولاي يا عظيم الشأن..  
هاعزف لك أحدى الألحان  
وهاغننى واسعد معاليك  
دانا عمرى مرهون بأيديك

..

مولاي يا عترة يازين  
يا منور زهر البساتين  
دويت أهاتى فى كاساتى  
اشرب منى يانور العين

...

اسمع وترى.. واقطف زهرى  
بعد الليلة.. ها يظهر زهرى  
اشرب.. اشرب.. اشرب كاسى..

(يتمايل الملك زين.. وقبل أن يسقط على الأرض تكون قمرية قد التقطت تاج الملك ووضعت  
فوق رأتها)

(بلاك)

(يدخل هذه الاثناء العسس/ المنادين في نشوة عارمة)  
منادى ١ : ولية شيطانة اتخلصت من أول واحد. عقبال الباقي  
منادى ٢ : سقرديوس مكار.. صاحب أفكار.. حيلات عظيمة.. شى جوزال.. عفارم افندم  
منادى ٣ : هايخلص عليهم نفر نفر.. وهيبقى لى مكافأة كبيرة من سيدنا الباشا.  
منادى ٤ : أنا هاعمل معاها انترفيو وأبلغه امتنان السلطات قبل ما تروح تبارك لمدام قمرية  
منادى ٢ : عداك العيب يا خواجه

#### «بلاك»

(يظهر دعبل وأدواته عقب اختفاء العسس..وقد بدى عليه الأسى)  
دعبل : ومر الزمان يا سادة يا كرام.. واللى جاى شايل بلاوى  
(تدخل قمرية الخمرية وعلى رأسها تابع الملك)  
قمرية : ويجمالى وحيلتى ودهانى بقيت من أفضل جواريه.. وبقيت على عرش قلبه لوحدى .  
دعبل : وعليت بطنها..  
الأرجوز : والملك فى النزاع الأخير..  
صوت بكاء الوايد ك واء.. واء.. واء..  
صوت الملك : أه.. أه.. أه..  
قمرية : جرى السم من ايدي لعروقه مللى.. مللى  
صوت الملك : أه.. أه.. أه..  
(يسقط الملك ميتاً)  
قمرية : بس والنبي صعب عليه  
دعبل : ما يصعبش عليك ملك يا اختى  
قمرية : خلاصة الكلام ملكت العرش وولدت الغلام إنما أية دكر.. ذى البدر التمام  
(عند ظهور سقرديوس يختفى دعبل وأدواته)  
سقرديوس : ولد جميل  
قمرية : عيونه مليانه نكاء.. بيبص لى بصة غريبة  
سقرديوس : العرق دساس يا مولاتى الملكة.. مبارك عند الرب زحل  
قمرية : عنده أربعين يوم بس مالى العرش  
سقرديوس : الخوف لما يكبر يرث عرش أبوه.. يملك الأرض.. ياه.. ملكة...!!  
قمرية : مين؟  
سقرديوس : المولود الموعود فى كتاب النار.. هاتيه.. يا مولاتى  
(محاولا خطف الطفل من قمرية)

سقرديوس : هاتى.. هاتيه نخفيه..  
 قمرية : (وقد استولى عليها الفزع) لاء.. ده ابنى حياتى  
 سقرديوس : دوسى على قلبك.. دوسيه.. انسيه لازم تضحى بيه.. ويأى شيء انت نسيته مهمتك  
 ولا أليه؟  
 قمرية : مانستش.. بس ده ابنى وحيدى.  
 سقرديوس : لو عاش هايهد عرش عبد النجوم. ويشتتهم فى البلاد.. عشان كده لازم يموت لازم  
 يموت.. لازم يموت.  
 قمرية : مقدرش.. مقدرش..  
 سقرديوس : والعرش يا ملكة؟  
 قمرية : يموت بايدي؟ ما اقدرش..  
 سقرديوس : والأرض ؟ لازم يموت..  
 قمرية : طب والوزرا؟  
 سقرديوس : مالهم بيه؟  
 قمرية : لو عرفوا؟  
 سقرديوس : نرميه؟!!  
 سقرديوس : أرميه فى الصحرا.. ده قدره ومصيره.. أرميه. ضحى بيه لاجل العرش.. هاتيه.  
 هاتى..  
 (يخطف الطفل ويخرج تتبعها الملكة)  
 (يدخل العسس متلصصين)  
 منادى ١ : وليه قادرة وجبارة.. ريحتنا من سيف.. عقبال من تريحننا من دعبل..  
 منادى ٢ : قمرية خمرية سلطنة قوية. عفارم.. عفارم.. معجونة بمية شياطين.. هى تقتل قلد  
 سيف وتقتل كمان قلد دعبل وتعطى لى راسه هديات لسلطان حظرتنا.. شى جوزال..  
 هاها ها ها..  
 منادى ٣ : أنا كنت شامم ريحة الحكاية دى.. والله يا جماعة الحكاية قربت وح نرجع سالمين  
 غانمين بإذن الله..  
 منادى ٤ : فى الواقع أنا مش مطمئن.. جهاز الاستخبار راصد تحركات مريبة فى المنطقة..  
 منادى ٤ : ما تيجوا نهجم عليه بريطة المعلم ونستفرد بيه وهوب خلاص.. نخلص عليه.. ولا أليه  
 رأيك يا خواجه؟  
 (يختفون فى ستار الإظلام)

«يلاك»

(نرى دعبل في بقعه ضوئية شاحبة.. يجلس حزينا)

(دعبل يتذكر ما حدث له من أمه الكودية في تماس مع قصة سيف وحوله الملقين)

دعبل : ورميته في الصحرا وأصبح غريب وحيد وهو لسه طفل رضيع. ولية مفترية زى أمى الكودية وش الأذية..

(تبدأ إيقاعات الزار خافته)

يوم ما شيلتيني كان يوم ندامة.. زعابيب ورعد وبرق ولا يوم القيامة.. من يوم ما وعيت لقيت نفسى وحيد وانتي رمياني في حلقة الزار (نرى علي شاشة المخيلة بروفيل لوجه امرأة تدق على الطار)

صوت الكودية : يا يورى بيه يورى بيه..(\*)

البت يا غالى يورى بيه.

(تدخل المعزورة في ستار الظلام)

وعندنا الليلة يا ليلي..

والجن الأحمر شمهورش

والليلة عندنا يحضر..

دعبل : أم قاسية مكان قلبها حنة حجر.. قبضة من جهنم.. جمرة من نار.. واه م النار وشر النار..

(تدخل الكودية تغنى فيتضح أنه سقرديوس متخفى في زى الكودية)

صوت الكودية : ميمى يا كوشة يا كوشة..

سقرديوس : الله عليكى بيبى يا كوشة..

(تدور حول المعزورة)

خشى يا بنيه بالرجل اليمين..

عاهدى يا بيضة عهد ويمين

(الملقين يقدمون صينية نحاس وفي وسطها شموع)

سمرة وجميلة يا عروسة..

ميمى يا كوشة يا كوشة..

قادوا شموعك ع العدا..

---

(\*) طنوس الزار جمع الباحث «محمد سعيد».. في دراسة بكتاب المسرح المتجول ج ١ - ص ٢٧.

(مع استمرار ايقاع الزار تذبج حمامتان فوق المعزورة وينقش وجهها بالدم ويتضح أن

المعزورة هي قمرية وكأن الطقس هو تتويج قمرية تاج العرش الدموي)

نصبوا الميدان علي بابا.

يا زيدان يا زيدان..

يا ناصب الميزان..

يا منور الميدان

(يوضع على رأس المعزورة عقال عربي)

سلام سلام عافيه وبرهان..

افرحي بالدم يا منظورة

العبى بالدم يا معزورة

(يتغير الايقاع إلى دقة صاحبة الديوان)

المحلقين : يا سيدة يا سيدة..

يام الشموع القائدة..

يا أخت الحسن وأخوكى الحسين.

يا بنت أشرف والدة

الكوبية : صاحبة ديوانا

المحلقين : السيدة..

الكوبية : كحل العين..

المحلقين : السيدة..

الكوبية : مرهم قلوبنا..

المحلقين : السيدة..

الكوبية : ياسيدة يا سيدة..

يا أم الشموع القائدة

يا أسيادى .. يا أسيادى..

كانت ملاح .. كانت ملاح..

دعيل : نار ودم وأصوات مسحورة.. وعيون أمدى جمرة حمرا تحرقنى. تلى الدفوف والمعزورة

تدوخ والقلب الصغير م الرعب مشروخ.. أصرخ بعزم ما بى.. أه.. أه.. أه..

(ترتفع الزغاريد مع استمرار الآهات)

أه.. أه.. أه..

(يظهر من الفانوس رأس حماريوس)

حماريوس : يعنى الواحد ما يعرفش ينام شوية (يخرج) كل شوية صويت وعياط وآهات!! مين اللي بيهاتى وقالها ميلودراما؟

دعبل : أنا يا حمار يوس.. وقع عكازي.. ورميتني فى الصجرا وأنا مقهور يا أستاذ حمار يوس.. والفراق نار..

حمار يوس : ويعدين يا واد يا دعبل!! مش حتبطل خروج عن النص.. ما كلنا تبفارق.. ما أنا لسه مودع صاحبي المواوى..

دعبل : مش كان خدك معاه!! أهو كنت تسليه ويتونس بيك..

حمار يوس : فيه البركه.. رهني عندك وسجنى فى ذاكرتك على خمسين مجيدى.. على بال ما يرجع من الحج.. وانت كل ما تصرخ تلاقينى جنب!

دعبل : بتخبه يا أستاذ حمار يوس؟

حمار يوس : أهو شبك تمام حلو العشرة طيب اللسان.. راوى الاخبار .. فنان بصحيح..و لسانه فصيح..

دعبل : كل هذا العشق!

حمار يوس ك ده أستاذى ومعلمى.. من طول رحلتى معاه.. اتأثرت بيه جدا .. حفظته عن ظهر قلب.. وأوعى تقول لى حكاية الحمار والأسفار!!

دعبل : دى وجهة نظرك النقدية فى نفسك وصاحبك؟

حمار يوس : صاحبي معلم.. فنان كشكول.. واتحدى لو فيه حد يقدر يقوم بشغله الأيام دى!! ده يا سيد دعبل مؤسسة إعلامية ثقافية متحركة .. أسطول حكايات ونواد..

دعبل : تقدر تثبت ده يا أستاذ حمار يوس؟

حمار يوس : السيناريو مكتوب هنا (يشير إلى رأسه) ده من يوم من حياة أستاذى.. ياللا.. ياللا

نشخصه يا دعبل.. ياللا يا أستاذ..

(يصبح دعبل أمام حماريوس.. يحرك الحمار يديه وينطق دعبل حكاية المواوى إلى أن يفلت دعبل من أيدي الحمار ويتحول الحمار إلى لاعب عرائس يحرك دعبل إلى نهاية الحوارية)

دعبل : (الحمار يشخص بالحركة) أنا دعبل المواوى.. مساء الفل على الحلوين.. مساء التجلى والهنا (يتقدم دعبل إلى مقدمة المسرح) قشطة على الحلوين الكل كل..

حماريوس : والنص نص..

دعبل : أوعى يفشك مظهرى.. أسمع يا سهران مزهرى.. يا حكمة قديمة اظهري.. أنا فنجرى الكلام راوى الاخبار..

حمار يوس : شخص كويس يا همام..

دعبل : ألف النجوع والكفور (يركب الحمار) أشقى وأتعذب وأجوع وأنقل الاخبار.. أسرار.. مين

حتى سعيد ومن مات.. يرتاح..

هماريوس : يلف بى شاييل أسرار الكون.. ويفنى.. يشجيني بصوته..

دعبل : أهني المظاهر والسبوع (يفنى أغنية السبوع- برجالاتك) والخطوبة والخصومة والتحية والسلام واللى حج واللى زار (يعزف لحن احتفالية والتحية والسلام واللى حج واللى زار (يعزف لحن احتفالية الحجاج بأسلوب المداح الشعبي) واللى اتولد واللى ضاع (نسمع بعض نداء المنادى - يا ولاد الحلال) واللى شارى واللى باع والبتاع والبتاع.. (ينزل دعبل إلى جمهور)

هماريوس : ويملا مخطتي..

دعبل : بسر غنوتي.. من أيد كل كريم ينده ويقول :

هماريوس : خد يا دعبل يابن المواوى..

دعبل : حبة شعير..

هماريوس : قمح.. رز.. فطير..

دعبل : كوز دره..

هماريوس : بيضه.. خصاية طرية.. ويشوف الكف ويقرى الطالع.. والنازل..

دعبل : همدد الأخبار.. أخلى الصخر يتكلم والبغل يتعلم (الصار يحتج ويلقى به من فوق ظهره)..

آه.. اصحى يا مبلم. وحد الواحد.. وأول حكاياتي.. تاريخ العرب.. أه يا واد يابو عرب..

فكهانى الأغاني.. الاصفهاني

هماريوس : والسيرة يا عنتره ياسيف يابوزيد الهلالي..

دعبل : يا زناتى خليفة وحكاية طريفة حلوة وخفيفة (يستخرجان شاشة تتحول لخريطة مجسمة

للعالم العربى تضاء الأماكن التى يشير إليها دعبل وكأنه مذيعة لنشرة الأحوال الجوية مع

سماع الموسيقى المميزة لنشرة الأخبار).. نحيكم ونقدم لحضراتكم من وكالة الأنباء

الدعبلية المواوية نشرة الأحوال العربية.. الأحوال المناخية العربية الجوية.. حيث أن الطقس

فنس والجو نو والجبل أن والبحر زن.. ويحكى أن الكون مجنون.. لأن زعايب عون بن

عق الملعون حين ينفخ من منخاره الغوار التيارات الهوائية الباردة التى أدت إلى سقوط

بيت لحم وغيظ غضم وكوارث بالجملة عند ولاد العم.. (ونرى فى خريطة الأحوال هيئة

الانقاذ الدولية الموالية للولية تقدم مساعدات للمنكوبين ومن المنتظر أن يعم الجو خريف

الغضب بسبب تحريك عون أيده الطويلة الرعدية لتحجب الرؤية فى أعالي الجبال وتصب

الملاحة فى المياه الإقليمية بسبب الضباب الكثيف وقد حدثت فى البحر الميت هزات أرضية

جوية بحرية من الطلعات التى هى للسحب المنخفضة على ساحل البحر المتوسط فى مدينة

تونس وما أدراك ما تونس.. وتوصى هيئة الأرصاد الدعبلية المواوية أن يرتدى أهل

الخريطة العربية معاطف الشجب المبين. والرفض المستكين لحن تمر هذه العواصف الغبية

التي هدمت وقتلت الكثيرين من الأبرياء.. وعلى السادة المشاهدين اتخاذ الحيطة والحذر



من هذه الرياح الخماسينية والسداسينية لأنها تحمل جراثيم وميكروبات وحشرات ومبيدات دولية..

هماريوس : دعيل.. يا دعيل.. احنا ع الهوا الله يخرب بيتك.. أنت ح تخرف؟.. دى سكة المهالك!!  
دعيل : سكة أبو زيد كلها مسالك.. سيبني أفن أحسن أتجن!!  
هماريوس : ولما كان عون بن عنق فى الحكاية الجغرافية التى انحرف بها دعيل شوية عن سياق السيرة..

دعيل : بس صبرك على  
هماريوس : التزم بالنص ما تيقاش حمار ما بتفهمش حاجة وتضيع فى الكاكولا بنت الغولة..  
خش بقى فى صلب الحكاية!

دعيل : خاضر يا فيلسوف.. ولأن حالة الطقس تقول أن الشمس مبالغة للكسوف والقمر عاشق الخسوف.. ح نتفرج ونشوف عون بن عنق..

هماريوس : ودراعه اليمين اللي لما يحطه فى قاع البحر الأحمر يرفع كفه مليون درافيل وحيثان..  
دعيل : يرفعها إلى عنان السماء.. يشوى ويقلى ويحمر ويقمر ويتأمر.. و..

هماريوس : بعد ما ياكل التصبيره يسند راسه يأبل حبة فى أرض الفيروز..  
دعيل : ودراعه الثانى متايرس وحدود.. قال الراوى يا سادة يا كرام.. مرت عليه قوافل العرب والشوام.. وبعد أن ألقوا التحية والسلام واتعهدوا بالوفاء والاحترام..

هماريوس : طلبوا منه الأمان والسلام..

دعيل : طلب الحملان التعهد من الذئاب!

هماريوس : قال التجار..

(دعيل والحمار وبعض الدمي يشخصون هذا المشهد)

التجاز : الدنيا مصالح بو مصالح.. هيا نتصافى ونتصالح.. يا بخته كتير إلى يسامح.. نتعهد ونتعاهد انك ما تيقاش معاند..

هماريوس : أمرهم عون الملعون يهشوا الدبان من على صبعه الصغير فى رجله الشمال..

دعيل : قالى منامه وهادد حيله!!

هماريوس : وبعد شهور وسنين والعهد ع الراوى..

دعيل : وصلوا لرجله الشمال.. شافوا ما لايخطر على بال عرب.. شافوا أسود وسباع وضباع بتنهش فيه.. حته حته.. حته حته..

#### أغنية أطفال الحجارة

«يامه موايل الهوى

يامه مواليا

ضرب الخناجر ولا

حكم الندل فيا

يامه ولاد العرب  
تركوا البندقية  
ماعاد باده نحارب  
وباعوا القضية  
وانا حارب بالحجر  
ويتفرجوا عليا  
يامه موايل الهوى  
يامه مواليا  
ضرب الجناجر ولا  
حكم الندل فيه

حماميوس : وبعدين يا واد يا دعبل.. مش هاتبطل سرحان..

دعبل : لو شفت اللي شوقته يا أستاذ حماميوس.

حماميوس : شايك وعارف وفاهم.. وبراقب الموقف.. أعدائك واقفين لك بالمرصاد فى كل حته..

دعبل : قتلت أبويا .. يا صاحبي..

حماميوس : مين قمرية؟

دعبل : لا أمى.. وهو بيلعب لعبة الفتونة..

حماميوس : مين الملك زين؟

دعبل : أبويا يا حمام.. عايز خمسه رجاله شداد.. كل راجل يكون شارب من بز أمه.. يكتفونى..

حماميوس : مالك يا دعبل سلامة عقلك؟!

(تظهر شملولة - وتشير لحمار يوس يايماء تدل على أن دعبل قد جن)

شملولة : «لحمار يوس» جاتله الحالة.. (لدعبل) مش حتتسى حكاية أمك يا دعبل؟

دعبل : عايز خمس رجاله عتوله.. صنايعيه . عمال .. فتوات يكتفونى بكل قوتهم!! (يؤدى مايم)

شملولة : ..ومن وراه راحت أم دعبل) وافقت مع خمس فتوات من المديح.. وربطوه وكتفوه زى

الديبحة.. طلعت روحه قبل ما يفك نفسه

دعبل : واتخلصت منى ورمتنى حته لحمه فى المولد.. طعم سهل للكلاب والديابه .. وولاد ... الـ

(يشاهد العسس فيهرب خارجاً)

(بلاك)

منادى ٤ : حالة السيكولوجية منخفضة.. وده توقيت مناسب لتوجيه هجمه ناجحه.. مزيد من الضغط النفسى عليه.. ممكن يروح فيها..  
منادى ٢ : فلذ دعبل نونو.. لحظرتة سبعة زوج .. زى فلذ سيف مش ياتر فى حظرتة حاجات ولا محتاجات.. حظرتة هاخلى عقل حظرتنا يروح مورستانات ..  
منادى ٣ : طول العمر يبلغ المراد يا أفندم .. صبرك عليه كده وأنا هاخطف روحه من بين ضلوعه ولا من شاف ولا من درى ..  
منادى ١ : شوف الحكمة . الملك أفراح يتلقيه وينفذ من الموت.. ويريبه مع مين.. مع بنته الأميرة شامه ..  
منادى ٤ : دى علاقة تشأم .. لو اجتمع الشامئين ..  
منادى ٣ : والعمل يا خواجه ؟  
منادى ٤ : هى مسألة وقت .. لازم نعمل حاجة قبل ما يروح يخطبها من الملك افراح وتحقق النبؤة..

(بلاك)

أرعد : اسمع يا سقرديوس .. أنا مش مطمئن لحكاية رميه فى الصحرا .. دوود الأرض دول موتهم مش بسهولة.. شاعر السيرة العربى بيقول أنه مش هيموت ..  
سقرديوس : ازاي يا مولاي دا كلام شعرا.. نسج الخيال .. الصحرا مليانة وحوش .. دا غير الجوع والعطش والشمس الحارقة ..  
أرعد : أنا مش مطمئن أبدا .. نور على كل البيوت واجمع كل طفل مولود.. وارميه فى مدينة النسيان..  
سقرديوس : حلم مولانا على .. دا حنة لحمه طرية.. لقمة هنية للضباع والجوع كافر..  
أرعد : شاعر الرماية بيقول ان آله العرب بيرزق الدودة فى الحجر ودا دودة وهاتعيش يا سقرديوس..  
سقرديوس : بحق زحل يا مولاي.. ليكون ولا يبقى له أثر ..  
أرعد : اضرب الرمل يا حكيم .. وقولى فى الحال .. أنا عايز دليل حى.. فاهم عايز جثته .. دمه أى علامة منه ..  
سقرديوس : زمانه يا مولاي أصبح نقطة دم بتجرى فى جسم وحش من الوحوش..  
أرعد : قولتك عايز دليل.. ستيبك من كلامك المزوق ..  
سقرديوس : أمرك يا مولاي (يخرج من المكان كوره بللوريه .. ويعزم عليه فتضيق)  
بحق زحل المتين.. سيد كواكب الأرضين ..  
ويروح أجوح وهجوج.. وسرسون وماسون ..  
بحق الكردان المدفون ... والنهر السابح ..

الا له أله .. أله أله يا نهار أسود شاييف يا مولاي ..  
(بلاك)

(مشهد حركى لسيف بن اليزن يدرجه خراق الشجر بالرمح والسيف)  
**بعلبل :** ومرت السنين واشتد عودى.. قصدى عوده.. وفى حضن الملك أفرأح.. رباه أحسن ربايه..  
 وعلمه فن الرمايه.. على ايدين فرسانه.. وأصبح الفارس المنتظر .. الذى يتحدى  
 الخطر(يظهر من بين المحلقين محلق يشخص خراق الشجر)  
 واللى حصل يا سادة يا كرام يا اللى تصلوا على خير الأنام بين الفتى سيف (يظهر من بين  
 المحلقين الفتى سيف بكامل هيئته) وخراق الشجر .. لا يخطر على بال بشر (يفنى)  
 واتفرج يا سلام اتفرج يا وله ..  
 على فن القتال وصراع المرحله ..  
 بين سيد الابطال ومصارع الاسود ..  
 ومواقف الرجال والقصد والموعود ..  
 اتفرج يا سلام اتفرج يا وله ..

خراق الشجر : أيام خراق الشجر .. الشهير بعططم .. سلاحى يقطع أتخنها شجرة ويجزها جز .. احترت يا سادة فى أمر هذا الفتى .. وحيرتنى فتوته .. يضربه واحده طغى وفجر .. وما أريو فتى .. انى أعرفك .. أنت الذى على يده هلاك عبيد النجوم .. يا غلام انتبه .. ما هذه أرضك ولا أرض أبىك .. انها أرضنا نحن .. وفى أى مكان ح نشوفك فيه ح نقتلك ..

دعبل : ثار وزمجر ثم أصفى .. ثم أرغى .. ثم أزيد .. ورمى تاجه من على رأسه ولطم خديه ببنيه .. حتى برز الدم من عينيه ..

خراق الشجر : (صارخا) يا دايم لا معلاه ..  
سيف : استعناع الشقا بالله ..

(يفر خراق الشجر أمام سيف الذي يطارده - دعبل يعلق)

**دعبل : فار وثار وولى الأبار.. بالبلدى فلسع ..**

(يخرج بينما العسس يدخلون من جهة أخرى)

**منادی ۱: یا خسارة يا اولاد كل ما نقرب يزوغ زى الزيق !**

أه لو كان اتقتل كانت الحدوته توته توته.. وراح فى سنين موته

**منادی ۲ :** رقبات حضرتنا ح تضييع أفندم.. حاسس أنى بقرب من سياف.. حضرتكم مش اقدر  
اعمل حاجة منشان حضرتنا !

منادی ۳ : طول ما بیحکمی والناس بتسمع مش حنعرف نتمكن منه ومش ح نقدر نقضی علیه ..

**منادی ٤ :** أنا شايف أنه ممكن نفرکش له الناس.. ميلقاش جمهور يسمع له.. نرسل على الهوا

ونيث ٢٤ ساعة.. مصارعة على كورة على أفلام هندی على لوندی على كوارث على مصاييب..  
منادی ٣: أهی دی الأفكار العال علولة.. یسلم خشمك یا خواجه !!

(یلاك)

(قصر الملك أفراح)

الملك أفراح : نحن یا بنی لا نطلب منك مالا ولا جاها.. ولكن نطلب منك مهرا یلیق بفارس.. ومهر ابنتی أن تاتیني برأس العبد سعدون قاطع الطريق وشيخ المنصر ..  
سیف : السمع والطاعة یا مولای الملك.. ستجدنی بإذن الله عند حسن ظنك ..  
(یخرج سیف بینما تدخل شامة)  
شامة : العبد سعدون یا أبی!! المحصن فی قلعة الجبل!! ان جيش الملك أرعد بكامل فرسانه الأشداء لم یستطع أن یصل الیه!!  
الملك أفراح : بنیتی.. أن أراد له زحل أن یعود.. فیسعود!  
شامة : أنت وعدت ووعد الحر دین .. (تخرج)

(یلاك)

دعبل : (ساخرا) رأس العبد سعدون !! دأنا لما جوزونی غصب عنی لشمولة.. كان المهر قبقاب خشب ولیفة وصابونة!! آه یا سبع الفلا.. رجعت تانی غریب مطارد أسیر الفیافی والضیاع .. والطریق صعب وطویل.. وآه م الطريق وشر الطريق .. (یتقمص شخصية سیف ویرتدی بعض ملابسه) وأنا فی طریقی للعبد سعدون كنت ح أموت ویقطعوا أیدی قبل ما تجیب رأسه مهر شامة هبیبتی.. كانوا العسس بتوع الملك ورایا متبعین الأثر ..  
(یتحول المطلقین إلى مجموعة من العسس - یفنون)

المطلقین ١ : مین یفادینا مین مین ؟

فی أراضینا ها ها !

نسرق الكحلة من العین ..

مین یعادینا مین مین ؟

فی أراضینا ها ها !

(تتحول مجموعة أخرى من المطلقین إلى قافلة تجارة)

المطلقین ٢ : جینا بالجمال جینا بالفنی .. هی هیه والرزق الحلال والعیش الهنی.. یا سلام بعنا فی السهول بعنا فی الحضر .. عدینا الجبال ما خرقنا الخطر ..  
دعبل : ماشیة الجبال معملة الاجمال والفنا شغال ..  
( مع استمرار الأغنية )

(العسس يهاجمون القافلة التي تفر مزعورة أن تحصل العسس على الغنائم حتي يهاجمهم سيف - دعبل) درجن .. درجن .. درجن .. أرى رؤوسا قد أينعت وقد حان قطفها وأنى لقاطفها .. زو .. زو .. (مشهد حركى) .. ورجعت معايا أموال وسبايا .. وده مكسب عال .. مهوش بطل .. دهب .. ياقوت .. مرجان .. بترول .. دولارات !! أحمدك يارب .. (يظهر له خيال الماتة وأتباعه)

خيال الماتة : أيه اللي جابك هنا ؟ .. عدو ولا شريك ؟! ادبنى جسم الجريه يا بن اللثيمه .. دعبل : (وقد خرج من شخصية سيف) مين؟! سيدى ومولاي صاحب الشرطة !! أعتقنى لوجه الله والنبي يا عم .. عشان ربنا .. (للمحلقين) ولا عبرنى واتهز له جفن .. لازم أساومه وأعطى لأمه .. (للماتة) آه .. آه (للمحلقين) أناام على جنبى وأنفخ بطنى .. مت خلاص .. آه يانى يا ميت .. مفيش فايدة!! (للماتة) أيه؟ بتقول أيه ؟!

خيال الماتة : (يحاوره بالاشاره)

دعبل : آه .. نقسم يا سيدى؟! .. وماله .. مش أحسن من السجن وتقطع أيدى ..

خيال الماتة : (بالاشارة)

دعبل : أيه!! تلت وتلين .. وماله يا زين ..

(للمحلقين) أتمسكن لغاية ما أتمكن .. ماشى

خيال الماتة : (بالاشارة) ..

دعبل : التمن !! خلاص يا عم آخر حاجة ..

خيال الماتة : (بالاشارة) ..

دعبل : لأحرام .. طب سيب لى دى .. طب دى .. ولا دى ولا دى ولا دى!!! طب أكل منين يا سيدى فى هذا الزمان البليدى؟! (خيال الماتة يهاجم دعبل)

آه .. آه .. أى أى .. حرام عليك .. فى عرضك يا صول .. فى طولك يا بيه .. طب أعمل أيه؟ لهف الكورة .. وفقدت الثروة .. وعدمنى العافية ابن الحافية .. وجلدنى يا خلق الله ٤٧ جلدة .. وعلقة تفوف ولا حد يموت .. هجيت يا خلق الله .. وبقيت بعكوك سارق مارق .. مملوك وأنا مالك!! مطلوبة رقبتي للنطع سياف الوالى! .. هجيت كل ظالم مفترى .. ومليت حياتى غنا وعبيت م النكت فناطيس .. صبحت همومى قتب .. لكنى واد جنى .. صعلوك هلفوت .. عبقرى وعبيط فنجرى وحويط والعمر ضاع طنطيط!! ده أنا فيه من تحت تب .. مش ح يوصلوا لى طول ما أنا وسطكم ..

الأراجوز : جاك حل وسطك .. واد يا دعبل .. فيه هنا زياتين .. خش ع المفيد ..

دعبل : أيوه صحيح ده فيه هنا ناس السلام السلام .. ولا يحلى الكلام الا بذكر النبي عليه السلاة والسلام ..

المحلقين : عليه الصلاة والسلام .. أيه يا عم دعبل؟ لخبطت دماغنا .. حبة سيترك وحية سيف .. طلعت روحنا!!

دعبل : أعمل أيه ؟ أنا ما صدقت لقيت ناس بتحب فنى.. قلت أفضفض عن روجى..  
 محلق : طب خش ع السيرة يا حدق بلا شغل حواه..  
 دعبل : قلت أقلب عيشى وأبعد عنها.. لقيتها زى ضلى! ورايا فى كل المطارح.. سيرة سيف..  
 عشان كده لما بموت بغنى وأرقص وأحكى وأشخص.. أرفه عنى.. أعيش من تانى.. وأنده  
 على أهلى.. مدد.. يا مدركين المدد ..  
 الزوجة : هو اللى انت فيه شوية يابن الفقيرة.. يا مقطوع من شجرة دوم.. يا محروم م اللحوم. يا  
 محشى هدوم.. خش ع النمرة الثانية يابن الثانية ..  
 ننوسة : هو كده.. بينسى نفسه ويدل ما يحكى على سيف يحكى على نفسه!  
 دعبل: (يغنى) سبع الفلا بعد الضنا وصل يا ناس..  
 وصل يا ناس لكان سعدون بعد العنا ..  
 والقلعة فى أعلى الجبل متحصنة ..  
 وسيف وحيد بدراع شديد طاح وانفرد ..  
 دبح رجال زى البغال ملهاش عدد ..  
 المحلقين : أى يى يى (تسقط رؤوس من أعلى..  
 يا سادة يا حاضرين يا اللى تصلوا على أحمد كحيل العين..  
 سعدون علم.. طلب التزال (يظهر سعدون)  
 سعدون : (مخاطبا سيف) أنت يا ولد تقتل رجالى وتخش قلعتى.. أنت يا فاجر يا قادر.. سمى  
 على روحك واطلب النجاة.. وتعالى عبد عندى ..  
 سيف : أنا جيت لك قلعتك.. أفصل راسكم عن جنتك.. أيه رأى حضرتك؟!  
 سعدون : (مزجرا) أنا فى الحرب الغوانى غير مجهول المكان (١) ..  
 أينما نادى المنادى فى دجى النقع يران ..  
 وحسامى مع قناتى لفعالى شاهدان ..  
 خلق الرمح لكفى والحسام الهندوان ..  
 ومعنى فى المهدي كانا فوق صدرى يؤنسان ..  
 فأسمعانى نغمة الأسياف حتى تطربان ..  
 (تتبارزا ويختفيا خلف الفانوس - دعبل يتقمص شخصية سيف كأنها فى حله مصارعة  
 معاصرة..  
 دعبل : مسكته من رقبته.. قلت منى.. مسكته من راسه.. من وسطه.. شالنى وهيدنى نزلت واقف  
 (أصوات تشجيع) وبحركة سريعة زى البرق خطفت رقبته..

(١) من شعر الحماسة لعنترة العيسى..

**الأراجوز :** (يظهر مقاطعا) دعبل اتجنن وفاكر نفسه الواد سيف!  
**دعبل :** سيبوني أكمل يا ولاد الـ ... خطفت رقبتك وسحبت الخنجر ولسه ح أقطع راسه قال :  
 (قطع - على -)  
**سعدون :** ارفع يدك حتى لا تتدم ..  
**سيف :** أندم !  
**الأراجوز :** وصالا وجالا وتشابكا وتعاركا وتلاكما وكرا وفرا ويهزمه سيف لتانى مرة..  
**سيف :** التاة تابتة يا سعدون ..  
**الأراجوز:** عادا للقتال ..  
**سيف :** ايدى علي رقبتك يا سعدون ودى آخر مرة.. وأدى خنجرى المسموم ..  
**سعدون :** (فى خضوع) أتريد ذبحى كالبقر يا فارس الفرسان ؟!  
**الأراجوز :** ثم جلس سعدون راكعا وقدم يديه فوق ظهره ومال برأسه وقال  
**سعدون :** اضرب رأسى هكذا وأحكم ضربتك ولكنك ستندم كثيرا.. أنت البطل الموعود الذى جاء  
 فى كتاب النار.. أنت الفارس المغوار الذى ينتظره أهل الوادى والجبال ..  
**سيف :** أفصح عما فى صدرك يا رجل ..  
**سعدون :** أنا سعدون الحارس ..  
**سيف :** شيخ منصر وحارس !!  
**سعدون :** اسمعنى جيدا أيها الفتى النبيل.. عندى هديتك وغايتك لو قتلتنى ستفقد كل شئ..  
 ويضيع منك ملك الأرض الخضرا ذات المآذن والأجراس.. ستندم وتضيع هديتك..  
**سيف :** أندم . وهديتى!!! ماذا ورائك يا رجل ؟  
**سعدون :** أنا حارس كتاب النيل.. سر الخلود وكيونة الكون.. أنا ابن حابى الخير ولو قتلقتنى  
 سيموت معنى سر الكتاب... ويا كلوك الديابة.. وتجف الأرض.. ويموت الزرع.. ويبيكى  
 النخيل دم..  
**سيف :** وماذا تريد أيها الفارس ؟  
**سعدون :** خذنى معك أيها البطل الهمام.. أسير فى ركابك أنا ورجالى.. وأهديك إلى كتاب النيل  
 المرصود.. وتحصل على المقصود بأذن الواحد المعبود ..  
**سيف :** ليس مثلك من يموت أيها الفارس النبيل (يختفيا)  
**الأراجوز :** وهب سعدون من ركوعه وهو لا يصدق أذنيه.. وحضن سبع الفلا وقبله بين عينيه.. وفى  
 ساحة القصر عند الملك أفراح وصل البطلان ..  
 (يختفى الأراجوز مع دخول العسس)  
**منادى ٢ :** المشكلة كده بتزيد يا رجاله .. ودعبل بقى له عزوة بسيف وسعدون.. وسيف ح يلطف  
 شامة بنت أفراح وتروح فيها مناخيرى علولة ..  
**منادى ٢ :** أنا مش أسكت أفندم.. أنا راح أجيب حجابات.. أعمل عملات.. عكوسات.. منشان



فركش تحالفات.. أصنع عداوات أعمل مؤامرات ..  
منادى ٣ : عليك نور يا فتدبم.. أهو كده شعللها شعللها .. ولعها ولعها . أمل.. ح نفضل كده تلف  
وراه فى ساقية زى البقره العاميه!!!  
منادى ٤ : أنا ح أعمل صفقة مع الملك أفراح .. أحط فى رصيده مبلغ كبير فى أحد بنوك  
سويسرا .. وأخليه يغير رأيه فى الولد سيف اللى عامللى فيها ثورجى..  
منادى ٣ : ندرن على يا أم العواجز لو اتحقق المراد لا جيب لك جوزين حصير ودسته شمع ..  
منادى ٤ : خليه اتنين ..  
منادى ٣ : الله ينور عليك يا خواجه ..

(بلاك)

(قصر الملك أفراح)

سيف : هذا مهر ابنتك شامة.. سعدون بشحمه ولحمه وراسه..  
الملك أفراح : يا بطل الأبطال.. طلبنا منك المهر وأتيتنا به ويبقى الحلوان .. والحلوان يا بنى أن  
تأتنى بكتب النيل..  
العسس : (مشدوهون) كتب النيل !!!

(بلاك)

دعبل : يادى النيلة .. يادوختك يا دعبل .. قصدى يا سيف يابن قمرية.. (يفنى دعبل هذا الموالى  
متأثراً حزناً)

سبع الفلا دخل الغاب وشال الهم..  
والفار بنى له جنيته وردها يتشم ..  
الله يلعنك يا زمن بقين جبال م الهم..  
تأخر ولاد السبوعة وتقدم ولاد الكلب ..  
والكلب لما حكم السبع قاله يا عم..  
وأنت يا دعبل وسط الخلايق حالك يغم ..  
(يظهر له من العربه الارجوز)

الارجوز : متشلهاش هم يا دعبل.. مسيرها تفرج ..  
دعبل : يعنى هايطلع م الناس دى سيف يا أراجوز ؟؟  
الارجوز : ممكن مفيش حاجة مستحيلة.. (يخرج له من العربه)  
دعبل : بس سيف لوحده مش كفايه !  
الارجوز : أنت عايز سيف ولا مش كفايه ؟  
دعبل : الناس نسايا يا صاحبي.. ملهيه فى الرغبة والجري وراء بالمشوار .. محدش بيبص لوراه  
ولا لقدامه ..

الأراجوز : ولا حتى تحت رجله !!..  
دعبل : فى كل شبر مخبر.. وفى كل ملى قهر وفقر ووجع قلب ..  
الأراجوز : يمكن السيرة تصحى عقلوهم.. تنور طريقهم.. تسبب فانوس على باب عقل كل واحد..  
دعبل : أنا عايز قلوبهم الأول تنور .. يقدروا يشوفوا ..  
الأراجوز : ما هم شايفين الذل.. يعنى ها يعملوا أية ؟!  
دعبل : كثير.. كثير.. الكرسي هزاز.. هبه ريح قويه تدلقه.. واحنا بننفخ فى الكور ..  
الأراجوز : بس الفحم بارد ..  
دعبل : هى شرارة .. والنار تحمى ويعلو الدخان ..  
الأراجوز : الدخان بيعمى العيون ..  
دعبل : بس النار بتسيح الحديد.. لازم نغسل عيونهم.. عشان يشوفوا صح..  
الأراجوز : بس الكرسي قلعة ..  
دعبل : الكرسي قش ..  
الأراجوز : قش الصقور ..  
دعبل : القش هش.. والنار بتحصد مابتسيبش حد ..  
الأراجوز : (فى أسي) اه .. طول عمرنا مطايرد من أصحاب الكراسي.. دايما يحطوا قدامنا المستحيل!!  
دعبل : نعمل أية ؟ قدرنا وكارنا.. لازم نحاول عشانه وعشان الغير ...  
الأراجوز : ونحب الخير لكل الناس ..  
دعبل : الخير يا عمك الأراجوز بيبجي لغاية عتبة الفقير ويعمل للخلف دور..  
الأراجوز : ويطلع فوق .. فوق .. فوق ..  
دعبل : ويقولوا .. الميه ما تطلعش فى العالى !!  
الأراجوز : الخير بس اللى يطلع فى العالى ..  
دعبل : والسلطين يا صاحبي تفضل فى العالى ..  
الأراجوز : والباب العالى.. عالى..  
دعبل : والعين ما تغلاش ع الحاجب ..!  
الأراجوز : والحاجب عبد المأمور ..  
دعبل : والمأمور راخر مأمور !!  
الأراجوز : والسلطان عايز بهاليل !!..  
دعبل : الأراجوز عايش فى الناس.. فاكرك لما فى يوم عدومك؟  
الأراجوز : فاكرك .. فاكرك ..  
دعبل : ياللا نفكر كل الناس.. ولاخر مرة.. يمكن يلقوا فى كلامنا العبرة..  
الأراجوز : ياللا يا صاحبي يابن الأمرا .

(تهبط من أهلى لوحة يكتب عليها نمرة الأراجوز والسلطان)

الأراجوز ودعيل : زمان زمان زمان كان فيه سلطان ..

الأراجوز : بيجب بينى قصور سور ورا سور ورا سور ..

دعيل : قصر صيفى وقصر شتوى وقصر ربيعى وقصر بمبى وقصر عيى ..

الأراجوز : ولقيت نفسى فى القصر البمبى بأبنى وأغنى ..

(يتحول الفانوس إلى مكان للبناء والمحلقي إلى عمال بناء يغنون)

الجميع : هيل هوب هيل.. هيل هوب هيل ..

عافيتنا يا يعينها.. ما بيدناش حيله ..

الأراجوز : يارب هون علينا ..

الجميع : هيل هو هيل .. هيل هوب هيل .. اللقمة وأكلينها مغموسه غربة ذليلة..

الأراجوز : شيلنا على كتافنا وعلينا ..

الجميع : هيل هوب هيل .. هيل هوب هيل .. يارب هونها أيامنا لسه طويلة ..

الأراجوز : واللقمة يا ودب بتكفيننا ..

الجميع : هيل هوب هيل .. هيل هوب هيل ..

(يستمر الغنا خافتنا)

الزوجة : يخر بيتك أكثر ما هو مخروب. واد يا دعيل.. فىن السيرة يا بجم؟!

دعيل: يا سادة يا كرام يا اللى تحبوا حلو الكلام.. رجع البطل الهمام من رحلة الأهوال اللى

بيان فيها الرجال (موسيقى أغنية شعبية يشترك فيها المحلقين).

اتفرج يا سلام اتفرج يا وله..

ع الصورة والكلام وفيها المسألة..

عن رحلة الخيال وعذاب الأسئلة..

وهات لنا الكتاب واتجدعن يا وله..

اتفرج يا سلام على فن المرجله..

اتفرج يا سلام اتفرج يا وله..

دعيل: (وقد تحول إلى صاحب صندوق الدنيا)

صندوق العجب..

الجميع: عجب..

دعيل: دنيا فى صندوق..

الجميع: ذوق..

دعيل: قرب يا ذوق..

الجميع: ذوق..

دعيل: فرفش تروق..

الجميع: روق..  
دعبل: ومعانا فى الصندوق (يستعرض دعبل بعض الصور الخاصة بهذا المشهد ويتحول إلى المداح الشعبى) سيرة الأبطال..

الجميع: طال..  
دعبل: سيف اليزن فى رحلة الأهوال..  
الجميع: وال..  
دعبل: بين الصحارى والفيافي والجبال..  
الجميع: بال..  
دعبل: (يغنى بزي المداح)

يا سادة يا أخيار .. صلوا على المختار..  
أحمد نبينا الزين .. شافعنا يوم الدين..  
واللى جرى وصار .. لسيد الأبطال..  
وهو فى طريقه .. قاصد كتاب النيل..  
وإلى غبار فرسان .. يا سكة الشجعان..  
يا مقربة المشاوير..  
وحد!

وأدى صورة الحراية  
الساحرة الشيطانية  
تتفخ فى كم الريح  
الساحرة المكاره..  
على باب المغارة..  
واقفه تفح فحيح  
ولأن المولى أذن وقرب المسافات والسر جوه البير.. مغطياه بحصير والهاتف الربانى.. كبر  
وقال:

صوت الأذان: الله أكبر الله أكبر.. لا إله إلا الله..

دعبل: صوت الأذان نجاه..

سيف: السلام عليكم ورحمة الله.. السلام عليكم ورحمة الله.. (يتقدم أمام باب المغارة).. بسم الله  
الرحمن الرحيم.. افتح باذن الله (يفتح الباب ويدخل المغارة).. يا مدور الصناديق يا  
كاشف الأسرار يا مكسر الإقفال.. أفرجها بعد الضيق..  
(يعثر على كتاب النيل)

الحمد لله.. (يحتضن الكتاب ويخرج مناديا).. يا صاحبي يا سعدون..

دعبل: لما يريد الله يقول كون فيكون.. أدى الحصار طاير\*.. وسيف معاه سعدون واللى انكتب ع

الجبين لازم تشوفه العين (يغنى)

أفراح فى حرب وضيم..

وهموم وكرب عظيم..

نزل البطل ومعه..

صاحبه وقصد موله..

الأصل ليه ناسه..

راجع لمن رياه..

أفراح فرح بلفاه..

سيف انحنى وحياه.. وحد..

«بلاك»

(خيمة الملك أفراح

يحدث هذا المشهد من خلال خيال الظل)

سيف: جئت وأمرى رهن إشارتك..

الملك أفراح: حمدا لله على سلامتك..

(أحد المحلقين يشخص حارس)

الحارس: يا سبع الفلا بالخلا امرأة تريد أن تلقاك..

سيف: أدخلها فى الحال.. (تدخل) مرحبا يا سيدتى.. أنتى؟

قمريه: ملكة بلاد اليمن..

سيف: مرحبا بك.. ماذا تريدين؟

قمريه: أريد قبل أن يلتقى الجيشان أن أحقن دم الجنود.. وأن أعود بالقصد والموعود..

سيف: أفصحى يا سيدتى..

قمريه: أريد أن ألعب معك لعبة الفرسان.. سيف وحصان.. سهم ونشان..

سيف: أوجزى..

قمريه: أريد أن أصارعك وتصارعنى.. ومن يقهر صاحبه.. يتحكم فيه زى ما هو عايز..

دعبل: وأخذت تخلع ثيابها حته حته.. وقد عزمت أن تقهره بسلاح الجسد.. ووقفت أمامه فى غلالة

رفيقة ما تسترش حاجة.

قمريه: أيها الفارس.. هيا للصراع..

سيف: أنا لا أصارع النساء..

قمريه: أتجين يا فتى..؟

سيف: بل أخاف الله يا امرأة..

قمريه: انظر إلى ذراعى وفتنته.. أنظر إلى ساقى وفتوته..

دعبل: يا واقعه سوده!!  
قمرية: دونك اذن والصراع..  
دعبل: وعرفت أنه طوع أمرها.. وخاتم في ابهامها.. وما كادت تقترب من جسده حتى وقفت ذاهلة  
وكان ثعبان لدغها فقالت:  
قمرية: ما هذا العقد الذى فى رقبتك؟ ومن أين حصلت عليه؟  
سيف: انه فى رقبتي منذ ولادتي.. وأمرنى أبى الملك أفراح ألا أخلعه..  
قمرية: أفراح ليس أبوك.. أبوك الملك زين اليزن زوجى.. وهذه علامتك.  
سيف: زين اليزن!! وأى علامة؟  
قمرية: الشامة.. الشامة الخضراء.. ابنى.. ابنى..  
«بلاك»

(يخرج دعبل من خلف الستار لوجه الشاشة صارخاً فى حزن)  
دعبل: أه.. حاسب يا سيف.. الحيه شايه سمها.. ح تقتلك يا أخويا.. زى ما قتلت أبوك وتخطف  
كتاب النيل.. حاسب يا صاحبي.. خلى بالك كلهم شبه واحد.. قمرية.. شملولة.. الغولة..  
الماتة.. سقرديوس (لحظة صمت) فين العروسة؟ انتى فين يا شامة (يتقمص شخصية  
سيف) أنا جاي لك ومعيا مهرك وحلوانك.. يا شامة يا عروستى.. يا شامة.. يا شامة.. يا  
شامة..  
(يخرج باحثاً عن شامة)

«بلاك»

(يدخل المنادون يتقدمهم منادى ٣ يتشمم المكان)  
منادى ٣: كان هنا.. وخرج من هنا هويت.. هو هو..  
منادى ١: عليه النعمة من نعمة ربنا ده واد مخاوى.. ومش بعيد يكون متجاوز جنية من تحت  
الأرض!! أمال أيه.. طب تصدق بالله يا خواجه أنا..  
منادى ٤: (مقاطعا) أنا ما أحبش أسمع الكلام الميتافيزيقى ده.. اذا كانت الجماهير دى بتدافع  
عنه وغايزاه نقرب احنا منه..  
منادى ١: يعنى أيه يا خواجه؟  
منادى ٤: يعنى نقرب ونبعد..  
منادى ٣: أطس فى نودرى لو فاهم حاجة!!  
منادى ٤: نقرب لأهله.. نبعد.. نفرق نسود.. فرق تسد..  
منادى ٢: ازاي أفندم نور عقل حظرتنا.. بأفكار جناب حظرتكم.. مش قادر أفهم حاجة أفندم..  
منادى ٤: مين أقرب الناس ليه؟  
منادى ٣: مين يا خواجه؟

منادى٤: أنا اللى باسأل يا بجم.. مين أقرب الناس لدعبل؟  
 منادى٣: أبوه مين أقرب يا خواجه؟  
 منادى٤: أوه أمبيسويل..  
 منادى١: أهو قالك أهو يا نور ابقى أصبر.. فهمت!  
 منادى٤: أنا بقصد مين أهله.. عزوته ناسه..  
 منادى١: (يخرج ورقه كبيره مبالغ فيها ويقرأ منها)  
 الواد الأراجوز والبث العروسة والأستاذ حما يوس ومراته شملولة القولة.  
 منادى٤: مدام شملولة..  
 منادى١: دا حسب تقاريرى الأمنيه يا جناب الخواجه..  
 منادى٤: شملولة مدام دعبل.. هي دى.. كده ممكن..  
 (يخاطب جهاز ارسال فى همس غير واضح)  
 منادى١: دى سهلة خالص يا خواجه.. حالا هتكون عند جنابك.. سيبك من الردون وأنا أجيبها لك  
 علولة (يخرج مسرعا)  
 منادى٢: حظورات.. فزورات أفندم.. أنا مش أفهم حاجات.. أمان ربى أمان...!!  
 (يدخل منادى٣ ومعه شملولة)  
 شملولة: خير يا اخويا...!!  
 منادى٤: خير يا مدام.. أهلا بيك.. احنا يا مدام من عشاق فنك الجميل..  
 منادى٢: بنحبه موت يا مودام..  
 منادى٤: وعشان عيون الفن الشعبى احنا فكرنا نظوره..  
 شملولة: يعنى أيه يا بيه؟  
 منادى٣: اسمعى كلام الباشا يا ست أم كودية.. يا مدام هو هيفهمك كل حاجه..  
 (يتحدث مايم مع شملولة - منادى٤- ويبس عليها الموافقة السريعة)  
 منادى٢: اسمعى كودية هانم.. أنت بس وافق على طلب حظرتهم.. واحنا نهديك محظيه طرف  
 جناب والى.. شى جوزال هانم؟  
 منادى٣: لا يا سيد جناب الأفندم.. البيه هيشغلها معاه فى التلفزيون.. ولا أيه يا خواجه..؟

«بلاك»

(شملولة وسط العرائس)

الزوجة: اسمعوا يا ولاد.. لازم نفكر جد فى حالنا.. أنا خدت قرارى خلاص.. الدور عليكم أنتم.  
دمية عجوز: الواد دعبيل خرف خلاص.. معدش عارف يحكى سيرة سيف!!  
الأراجوز: فقد حسه الشعبى ومات معاه الحكى الفنى.. معدش قادر يطور نفسه.. زى التلفزيون والسينما والكاسيت..

دمية عجوز: ح يخلص علينا بدرى!.. والعمر يضيع معاه سرسبه!!  
الزوجة: اسمعوا الكلام وتعالوا معايا.. عندي لكم شغلانه هائلة..  
الأراجوز: والله لو علم دعبيل باللى عملتيه كان طق مات..  
الزوجة: وده بيعس؟! تعالوا معايا وسيبوه فى جنانه يمثل حواديته مونودراما..  
الأراجوز: نهرب منه بطريقة فنية.. بحيث لا تأثر عليه ولا يتحكم فينا..  
دمية عجوز: نخرج من دماغه بلا رجعه..  
الأراجوز: بس لما نخلص معاه آخر نمرة.. ما قدرش اخونه نويه واحدة..

الزوجة: من غير تفكير لازم نهرب.. لازم يا ولاد..  
الأراجوز: عرائس.. اختفاء.. أنا شامم ريحته!!  
الجميع: آاااف.. وصل (تختفى العرائس وتسمع موسيقى أغنية هنا مقص.. مع دخول دعبيل).  
دعبيل: هنا مقص وهنا مقص.. هنا عرايس بتترص..

هنا البت المصرية.. شعرها أسود يانى..  
لفيته على حصانى.. وحصانى جوه البرواز..  
والبرواز يعنى التلفاز.. والتلفاز عند التجار..  
والتجار شاطر قادر.. عاوز يلطش محاسيبى..  
محاسيبى نونو نونو.. ضى القلب وعيونه..  
فيها البنت الننوسة.. ننوسة لوسه عروسه..  
مزنوقه جوه الصندوق.. والصندوق قلبى المدلوق..  
يفتح لى لما أغنى.. يا عروسة يا عروسة..  
فى الصندوق ليه محبوسه.. محبوسه.. محبوسه..  
محبوسه.. محبوسه..

الجميع: (يظهرون فجأة ويصرخون) أفتح يا صندوق.. (يفتح صندوق كبير وتخرج منه العروسة..)  
دعبيل: مين؟ العروسة!! أحمك يا رب..  
العروسة: شبيك لييك.. عروستك بين أيديك.. تطلب أيه؟



دعي: أطلبك..  
 العروسة: أنا!!  
 دعي: أنا لى مين غيرك؟ أنا تعبت قوى على بال ما وصلت لك..  
 يا حبيبتي يا شامة يا بنت أفراح..  
 العروسة: طب وشملوله مراتك؟  
 دعي: مراتى.. ما هى طفشت.. راحت تشتغل فى مسرح قطاع خاص!!!  
 العروسة: دى قلة أصل!  
 دعي: لا.. دى قلة نوق..  
 العروسة: يعنى خلاص راحت من دماغك؟  
 دعي: أنا ما صدقت جيت كتاب النيل وحمدت ربنا..  
 العروسة: بس القديم يحلى حتى لو كان..  
 دعي: وحلة وطن وهم وغم.. خليها تغور.. يجعل كلامنا خفيف عليها.. خليهم يا كلوها.. بلا  
 شملولة بلا زفت..  
 الزوجة: (ظهور مفاجئ) بتنده على ليه؟ بينى وبينك أيه؟ يا معدوم يا مهزوم يا مديون يا مجنون..  
 يادعبل يابن الكودية.. يا حاوى يا مغاوى يابتاع البلاوى..  
 دعي: جينا فى سيرة القط جالنا يردح..  
 الزوجة: أردح يا مهموم يا مهزوم يا مريوم يا بتاع العرايس والتلات وركات..  
 دعي: عيب يا شملولة الناس عاوزة تتفرج ع السيرة.. بلاش فضايح.. أيه اللي جرى لعقلك؟  
 الزوجة: فضايح!! يا سنكوح يا مفضوح يا جربوع..  
 العروسة: عيب يا مدام.. ما يصحش..  
 الزوجة: أنتى مين يا الدلعدى؟  
 دعي: اتهدى يا ولية وغورى بقى خلىنا نشوف شغلنا.. يا حثالة المسارح يا بنت الدلالة..  
 الزوجة: بنت مين يا اخويا؟ ده قصر ديل يا أزعر.. ح تفضل تدور فى ساقية تلمها ملاليم يا عديم  
 الفرجة المرسحيه هى هى.. عامللى فيها سيف اليزل يا جربوع!!  
 العروسة: أنتى مالك بيه يا ست أنتى؟ ما تسيبيه فى حاله..  
 الزوجة: يا نفه أنتى.. خوفتيني يا حلوة.. أنتى بقى حاله؟  
 ولا تكوينيش فاكرا نفسك شامة بنت الملوك!!  
 العروسة: أنا بتاعته.. حبيبته.. وهو صاحبي حبيبى..  
 الزوجة: اتلم متعوس على مفلوس جاتكم نيله.. يابت يا هبله عاجبك فيه أيه؟ عيشته القرديحى..

اسمعينى يا شابه.. واحده بجمالك ده تكسب كثير.. تعالى معايا.. ح أعيشك فى سرايا  
قزاز فى قزاز كل حاجه فيها بتمشى بزاير مش الصندوق المخنوق.. ح تخشى الفن من  
أوسع أبوابه.. ح أفتح لك أجدع باب ولا باب زويله.. آه.. حاجه كده أورجيناال.. قلتى أيه؟  
العروسة: لا بلاش.. اللي نعرفه أحسن من اللي ما نعرفوش..  
الزوجة: يا عبيطة الوسط الفنى كله هن.. تهزى.. النحل ينزل فى حجر رطب استرلينى (طقس  
تنويم).. تعالى ورايا.. عندي هناكى.. ح أكون معاكى.. انا باستناكى.. شوفى السكه..  
تعالى (تتحرك العروسة قليلا فى اتجاه الزوجة).  
دعبل: حاسبى يا عروسة النذاهة.. حاسبى يا شامة الزن ع الودان زى السحر تمام..  
الزوجة: تعالى يا عروسة.. تعالى..  
دعبل: أصح يا عروسة.. فوقى.. ح تدخل فى عبيها وترضعك لبن عكر ح تسمم فنك وتعكر دمك..  
تعالى أنا أبوكى وأمك..  
العروسة: (تنتبه) دعبل.. حبيبى..  
الزوجة: حبيبى !! بلا خيبة.. أهى شبيهك.. ح أضيع وقتى مع شوية مساخيط.. د أنا عندي  
عروض ما تينيه.. وسواريه وأبصر أيه (ترقص) هى هى.. ده أنا بطة الموسم  
المسرحى.. باى باى يا دعبل.. يا سياف خشب (تخرج).  
العروسة: (تقترب من دعبل فى حب) مالك يا دعبلتى؟!  
دعبل: أبدا.. مفيش..  
العروسة: صوتك واطى ليه؟  
دعبل: من زمان اندبح صوتى وقل قوتى وخايف لأصبح مجرد خرابيش على حيطان الزمن  
الفنى..  
العروسة: أنت أصيل ومتأصل يا دعبل..  
دعبل: ده كان زمان.. قبل الراديو والتلفزيون.. كان لى جبروتى.. النهاردة يا حسرة.. لا بهش ولا  
بنش..  
العروسة: بكره تتعدل وتتجوز وتبقى عريس الأميرة يا أمير..  
دعبل: حواديت فى دماغى بس.. أنا خلاص دماغى تعبت.. زورى زمارة.. وحركاتى مستعارة..  
العروسة: ما أنا زيك عمرى معلق فى صوابك.. وأنت اللي بتوهبنى حياتى.. بتحركنى وتنطقنى  
وتسمنى وتهنئى وتغنى لى أطلع لك..  
دعبل: بس بتاخدى الأجرة كلام وتنأى فى حضن الفستان.. ومعاكى أراجيز عواجيز ونايات  
وحاجات.. والقصر يا غالية صندوق الفلبان

(صوت خارجي)

صوت الزوجة: شامه.. يا شامه.. شامه..

العروسة: أبوه يا شملولة.. صوتك بيذن في وداني..

دعبل: لا يا شامه ما تصدقيش ودانك..

العروسة: شامه شامه.. أنا العروسة الننوسة بتاعتك يا دعبل.. خلصني من شامة أرجوك..

دعبل: لا.. أنا سيف وانتى شامه..

العروسة: شامه في حكاياتك وحواديتك بس.. أنا العروسة الننوسة..

دعبل: لا.. أنا سيف وانتى شامة..

العروسة: لا بقي.. (ترتمى بجوار الفانوس)

دعبل: شامه.. أوعي تنامي.. أوعي تروحي من دماغى.. أنا بحلم ولا أيه؟ فين الحلم وفين الحقيقة؟

دى خيانة فنية.. نيمتك الندهة الخاينة شملولة.. سرقوكى منى.. اصحى يا شامه كلمينى..

كلمينى حرام عليكى.. زى اليزن كشف سم قمرية وأنا ح أبطل سحرك وسمك يا شملولة

يا بنت المجنونة.. يا عروستى.. ردى على عشان خاطرى.. عشان خاطر دعبل حبيبك..

أنتى انسحرتى ولا انسخطى ولا أيه؟

(طقس الرقية يقوم به دعبل بمساعدة المحلقين)

الأوله بسم الله..

والثانية بسم الله..

والثالثة بسم الله..

بركة محمد بن عبد الله..

رقيتك من عين المرة..

أحد م الشرشرة.. ومن عين الراجل.. أحد م المناجل..

ومن عين الفقى..

أحد م البندقى..

(ياخذ شهقة كبيرة ويستخرج عروسة ورقية لها رأس الزوجة شملولة بعد أن يثقبها يمر

بها على جسم العروسة النائمة ثم يقوم بحرقها)

قيدى يا نار يا نار قيدي..

واحرقى لى هرايبدي..

المحلقين: يا دعبل يا بن قلمبوحة..

ومراتك عرة وشرشوحة..

دعبل: يا طرية يا أم بابين.. وديتي شملولة فين؟  
(ينفخ رماد الورقة ويعزم على العروسة وهي نائمة توها منه أنها قد تسممت من فعل  
حديث شملولة)  
أقسمت عليك أيها السم السموم..  
أن كنت في الدم تخرج اللحم..  
وان كنت ف يالحم تخرج للجلد..  
وان كنت في الجلد تخرج للشعر..  
وان كنت في الشعر تخرج للهوا..  
وان كنت في العقل أه م العقل أه.. أه..  
(عندما يحاول دعبل حمل العروسة يكتشف أنها الدمية فيصرخ فزعاً)  
أه..... أأأأأأه..

(يخرج على أثر ذلك الأراجوز)  
الأراجوز: مين فين أيه؟ ليه؟ مين بيصرخ.. (يرى دعبل) دعبل!! واد يا دعبل.. مالك يابن  
قلمبوحة.. مالك يا صاحبي.. دعبل..  
دعبل: الغولة.. الغولة..  
الأراجوز: غولة أيه؟ وغولة أيه؟ أنت بتخرف ولا إيه؟  
دعبل: الدنيا ضلعت على يا أراجوز.. قلبي انكسر وانهد حيلي..  
الأراجوز: خلص السيرة وبعيدن يحلها ربنا..  
دعبل: دايم أقم وأبدأ من جديد وأقم وأبدأ من الصفر تاني.. ح أتجن يا أراجوز..  
الأراجوز: كمل الحكاية يا عم خيلنا نروح..  
دعبل: بعد ما عرف سيف أن قمرية أمه.. مادامش بينهم الوصال.. اتأمرت عليه بعد ما قتلت  
الوزرا وقالت له:  
(قمرية تحاور سيف)  
قمرية: أبوك سايب لك كنز عظيم وفيه سر خطير ما ينفتحشى إلا على اديك.. وده دليلي على  
اخلاص وحبى ليك يا بنى يا سيف يا حبيبي..  
دعبل: ومشت معاه في الرحلة ليالى طوال.. الحية شايلة سمها وناصبة لابنها الخية.. وعند النهر..  
(قمرية وسيف بجوار النهر)  
قمرية: تعبنا يا سيف نرتاح شوية..  
سيف: نكمل الرحلة ونوصل لكنزنا المرصود..

قمرية: الصبر جميل يا سيف.. ح نوصل بعد شوية.. أصله مال كثير ولا مال قارون.. والسر الخطير أول ما توصل ح تعرفه لوحدك..

سيف: أهم حاجة نوصل بالسلامة.. وأبقى جنبك أدمع ملكك وأبقى ذراعك اليمين على كل معتدى وخاين..

قمرية: طيب خد.. أملأ الزمزمة عشان نكمل الرحلة..

(ينزل سيف إلى النهر - قمرية تتبعه - نسمع صوت صرخة عالية)

دعبل: أه.. أى يانى..

الأراجوز: (يظهر على صرخة دعبل) مالك يا دعبل؟

دعبل: (يتوهم نفسه سيف) ضربتني وخذعتني.. خانتني.. طلعت سيفها وضربتني على راسي وسرقت مني كتاب النيل..

الأراجوز: كل ده من تدبير سرقدبوس ابن المنجوس.. هو اللي قال لها تقتلك وتأخذ الكتاب..

دعبل: (فى نوبة جنون) كلكم على.. يا خينين العيش والفن.. (يهجم على الأراجوز ويحاول خنقه).

الأراجوز: الحقونى.. ح يموتنى ابن المجنونه!.. أنا أراجوزك يا دعبل.. اعقل يا صاحبي حرام عليك..

دعبل: ح أقتلك وأخلص الناس من شرك يا سرقدبوس الخاين.. يا بتاع قمرية.. كلكم شبه واحد.. خلصت عليك يا مجرم.. (يتركه)

الأراجوز: الواد دعبل اتجنن يا ناس.. فاكرو نفسك سيف وأنا سرقدبوس!! يا بن المهووس!! سايبهاك مخضرة ورايح أشتغل مع شملولة مع السلامة يا سيف.. خشب!!

دعبل: (يخرج من حالة الجنون) وبقيت يابن العرب وحيد.. بعث الفرس والسيف.. لا صاحب ولا جار.. انخرم الطار فى الكار البطال.. يا عروسة.. يا عروسة.. يا شامة.. يا أراجوز.. يا صاحبي.. يا حبابيى.. روحتم فين؟؟

#### «بلاك»

منادى ١: فاضل ع الحلو زقه ويقع فى ايدينا.. تسلم أفكارك يا خواجه.. هاتجن جنانه.. وأنا آخذ المكافأة وأبقى شهيندر التجار.. وتحكى عنى المحروسة.. وأنت يا باش أغا.. تأخذ راسه وترجع للباب العالى..

منادى ٢: شى جوزال أفندم.. جنابنا يرجع ممنون كثير ننفذ برقيات حظرتنا.. ونحصل على رضا سلطان.. وانت أفندم (لمنادى ٣) مناخير حظرتكم مش يطير..

منادى٢: شوف يا أفندم باشا.. أنا ها لهف المكافأة من هنا واشترى طين.. وابقى من عين أعيان

كفر الهندوه.. ولا أيه يا خواجه؟

منادى٤: أهم حاجة عندى أمسحه من ذاكرة الناس دول تماما. وأعمله فضيحة أخلاقيه.. لحسن

الناس تعمل منه شهيد أو بطل شعبى.. ويرجع لنا تانى فى صورة بطل قومى شرس.. أنا

هامسحه وبعدها المؤسسة ها تكافئنى وتدينى محطة تليفزيون خاصة.. أقدم فيها تراث

شعبى على كفى..

منادى٣: تراث شعبى.. دى جنبه قديمه يا خواجه..

«بلاك»

(الأراجوز فى التليفزيون)

المنذبة: سيداتى أنساتى سادتى.. مساء الخير.. مفاجأة سهرتنا الليلة اللقاء الصريح جدا مع

الأستاذ الفنان قراقوز (للأراجوز) أيه رأى سيادتك فى رحلة دعبل المخاوى؟

الأراجوز: فى الواقع.. والحقيقة وحيث أننى من أنصار الـ..

المنذبة: (مقاطعة) واضح من كلام سيادتك انك غير راضى عن هذا التراث البدائى السوقى اللى

بيقدمه ابن مدام كودية..

الأراجوز: أنا بصراحة مع دعبل فى رأى اللى بيقول أ...

المنذبة: (مقاطعة) تمام.. تمام سيادتك يا فندم.. أنت مع رأى اللى بيقول ان ده فن شعبى

مسلطح.. ويودى لا مؤاخذه فى داهية..

الأراجوز: أنا شايف ان من خلال هذه الشاشة بيتصا...

المنذبة: (مقاطعة) بيتصا ووجود مشاكل فى الرؤية..

الأراجوز: (فى تحد واضح) بيتصا.. بيتصا (يضر بها بعصاه فتسقط الباروكه فيصرخ) مين

شملولة!!!

المنذبة: كلام جميل.. بيتصا للخارج.. وفى نهاية العلة.. قصدى الحلقة.. بنشكر ضيفنا الكبير

على حوار.. آه.. مع السلامة..

يا غجرى.. (إختفاء مفاجئ للجميع)

«بلاك»

(يظهر دعبل من مقدمة الحيز وهو يعدد)

دعبل: (يعدد)

كنت فين يا وعد جارى..

كنت فى خزنة بابها متدارى..

راحوا الحبايب ما ودعوني..

ما خلوا ولا دمعه فى عيوني..

أه.. أه.. أه.. أه..

هيم هيم.. هيم هيم..

(يظهر الحمار يضع نظارة على عينيه ويأبسون فى رقبتة)

حمار يوس: (ينهته) ها ها ها.. قطعت قلبى يا دعبل.. مالك يا خويا؟

دعبل: الدنيا من حوالى.. مراتى والعروسة والأراجوز.. دماغى بينسرق منى!!

حمار يوس: طب ليه وانت حمال الأسية.. د أنت شغال معاهم حمار شغل.. واللى فى قلبك على

لسانك!

دعبل: أعمل أيه يا أستاذ حما يوس؟

حمار يوس: خايف عليك يا دعبل لاحسن يتلحس عقلك زى ما بيقولوا..

دعبل: أنا اللي خايف عليك يا صاحبي.. لا تخرج من دماغى أنت كمان..

حمار يوس: ما تخافش على.. أنا حمار أصيل من ضهر حمار.. ومفيش حاجة تغيرنى وتبعدنى

عنتك..

دعبل: الزن ع الودان أقوى من السحر.. خايف لا يغفوك وتروح معاهم.

حمار يوس: ح يغيرونى بأيه؟ برسيم مستورد ولا علف معلب؟ احنا لا يقين لبعض قوى يا أستاذ..

دعبل: اللاحاح.. يفضلوا يلحوا لغاية ما يغسلوا المخ ويعبوه م اللي هما عاوزينه..

حمار يوس: قال يا حمار لو يسخطوك (يضحك بصوت منغم) ها ها.. هى.. هى.. ها ها..

دعبل: أنا سمعت الصوت ده قبل كده على شريط!

حمار يوس: هو أنت ما عرفتش؟

دعبل: حتى أنت يا حمار يوس!؟

حمار يوس: أسمع لى يا أستاذ أنا طورت نفسى لكن لسه باقى ع العشرة..

دعبل: ازاي؟!

حمار يوس: أنا أسست شركة فنية للغناء الشعبى باسم حمار فون للأغاني الشبابية الملهية.

دعبل: لا.. أنت بتهزر..!

حمام يوس: طب اسمع آخر شريط.. أغنية الهد..

(يغنى)

اهاء اهاء أهى أهى..

يا هبى يا هبى.. يا هبى يا هبى..

دعيل: أه يانى.. أه.. الحقونى.. دماغى ح ينفجر يا ناس.. (يختفى الحمام) الحقوونى.. يا

عفاريت السما والأرض الحقونى.. (بيكى) .. بيكت لكم ساعدونى.. ان حذفتهم بتلات

تمرات أحذفيهم بتلات جمرات.. (طقس الشيشبة)

جمرة تيجى على عيونهم ما يشوفوا حد غيرى..

جمرة تيجى على لسانهم ما يكلموا حد غيرى..

جمرة تيجى على ودانهم ما يسمعوا حد غيرى..

هاتوهم وقديوهم..

وعلى بابى واطلقوهم..

يا حابى يا حابى..

يا مانع وجابى..

ما ترد لى جوابى..

ما ترد لى جوابى..

(فى اضاءة سحرية تظهر ذات الرداء الأبيض)

أنت مين؟.. ماما!!

ذات الرداء: أنا زرقاء اليمامة..

دعيل: ساعدينى يا ماما.. ورينى بر السلامة.. الحقينى.. العفاريت ركبت ولادى.. فاتونى

وهجرونى.. باعونى.. ادينى عنيكى وخدى عمرى.. أنا تايه ساعدينى يا ماما..

زرقاء اليمامة: القيامة ليها علامة.. قدامك شكة ندامة.. جواك بر السلامة.. يونس فى بطن الحوت

طهر نفسه بالبكا..

دعيل: وأنا طهرت روحى بالغنا والحكى والزار..

زرقاء اليمامة: نواياك البريئة ح تدخلك فى مؤامرة دنيئة.. جايلك جيش عرمرم جبار ومش

حيرهم.. أهو قدامك على بعد مشهد واحد.. دامى وحامى.. لا تكون لا تزول.. اتغدى بيهم

قبل ما يتعشوا بيك.. فتح عينك.. الغدر حواليك.. أنا راجعة لك تانى.. لا تكون سيف

وترفع راسك.. لا تكون كسسير وتضيع.. خلى بالك لك لك لك.. بكره هايجى عليك

الدور.. دور.. دور.. دور



(تختفى وسط الدخان والايقاع وصدى الصوت)

دعبل: وفضلت ألف وألف وألف وتلف بي الدنيا.. تلف.. أفع وأقوم وأغرق في الخيال وزقب تاني على وش الدنيا.. فين العقل وفين الوهم.. دماغى مفلوق وصدرى مخنوق.. أيه اللى جوالى؟ الظاهران النوشة دى فى دماغى بس!! أه يا دماغى يا صندوق أسرارى.. ح أنتجن يا ناس.. جسمى مش قادر يشيل راسى.. حد يوقف لسانى.. مش قادر أسكت.. حد يسكتنى يا ناس.. معدتش قادر؟!

(تخرج العرائس جميعها وتحاصر دعبل)

العرائس: احنا عמש ارفين نكافئك ازاي ي ي ي.. ح نقدم لك أحلى ما عندنا!!!! تاج الجزيرة العربية ية ية ية..

دعبل: السلطان!!؟

العرائس: ارفع الراية البيضاء..

دعبل: يا لطيف اللطف يا رب.. طب أجيب لكوا الصليب الأحمر.. طب الهلال الأخضر.. طب الهباب الأسود؟

العرائس عازين النوان للفصل بين القوات..

دعبل: خيانة عظمى.. تأمرية دولية.. امبريالية شيوعية.. همجية ارامية..

العرائس: عازين نتحاور..

دعبل: حبة حبة على.. ده نظام جديد بقى.. بلاش الهرج والمرج والفوضوية.. عاوز حبة نظام في المجال.. ح أكون معاكم ديمقراطى وأقفل عليكم الصندوق وأنفيكم لجزيرة الطوارئ الاستثنائية في بحر النسيان.. ولا من شاف ولا من درى..

الأراجوز: خرسيس فلد.. رخيص ابن الفلد.. مهرج أى كلام.. اعدام.. وبعدين انجلد.. فاهم فلد.. أنتى تقلق منام سلطان الأراجوز؟! مش عارف أنام على كرسى ريش نعام!! اعدام..

دعبل: نام نام.. انشالله اجيلك فى المنام..

الأراجوز: أوامر حظرتنا تكسير!! دعبل حقير عربى فاقد قدرة.. فاقد حيل.. ولد مشخصاتى.. قرداتى.. اعدام فوراً.. مفهوم حاوى معدوم؟!

دعبل: لا بقى.. ده عصيان فنى مسلط.. شرذمة حقيرة.. زوينة فى فنجان.. حبة بتتجان..

العروسة: هنا مقص وهنا مقص.. يقص لسان كل جبان مغرور.. ملحوس ديكتاتور طور طور..

دعبل: مش بقولك متخابرين مع فرقة أجنبية.. عاوزين يموتونى لصالح العدو الكلاسيكى؟!

حمام يوس: واد يا حاوى يا بتاع البلاوى.. ليلتك كحل وما انتاش خالص مننا (تهاجمه العرائس بشكل وحشى ومعها خيال الماتة وأرعد وخراق الشجر وسقرديوس والمنايون)

منادى٣: أنت فاكِر نفسك واد أرتست!! فوق يا بن الكودية.. دورك خلص خلاص.. تعالى اليس  
 الشبكه يا نور عيني..  
 دعبيل: صبرك على.. دى الشبكه.. لسه المهر والحلوان.  
 منادى٣: ح تروج مننا فين وراك وراك عللوه!! ونهايتك على ايدى يا حدق.. المرة دى ح أمسك  
 بأديه واسناني..  
 منادى٢: خرسيس أدب سيس.. من فضلك فلد دعبيل هات راس حظرتكم فى شوال حظرتنا  
 منشان حظرة جناب سلطان باب عالى..  
 منادى٤: (فى مايكروفون) سلم نفسك يا دعبيل.. المكان محاصر.. مفيش داعى للمقاومة..  
 منادى٣: أيه رأيك.. أنط عليه يا خواجه..  
 دعبيل: واغوثة.. وا بوليس نجده.. أى ونت.. هلب  
 (مطاردة من الجميع لدعبيل)  
 وا أراجوزاه.. وا عروستاه..  
 - خلصنا من سيرتك..  
 - أحسن حاجة تسلم نمرك يا نمرة..  
 - عايزين نقب على وش الدنيا يا بتاع الكلام والأوهام..  
 - خلصونا منه.. ولا أنتوزينا لا ليكوا فى الطور ولا فى الطحين.  
 الجميع: ارفع الراية البيضاء.. سلم النمر يا سيف.  
 دعبيل: (للجمهور)  
 ما حدش قادر يحوش عنى؟  
 الجميع: ما حدش قادر يحوش عن نفسه.  
 دعبيل: دا تمرد مدنى مسلح.  
 العسس (٣.٢.١) :  
 (يقبضون على دعبيل ويقيدهونه بالحبال.. مثل الحاوى)  
 دعبيل: هزموك يا دعبيل بايد ولادك.. انكسرت خلاص.. حطيت حمولى هنا ووقعت.. كترت على  
 شكاكين الأحبة قبل العدا!  
 (للعرائس)  
 هايدخلوكم ملجأ التاريخ.  
 (للجمهور)  
 مد ايدك شدنى.. فك الخيوط.. اوهبنى الحياة قبل ما اموت.

(العسس يشدون الحبال على دعبل بإحكام)

مد ايديك حركتي.. صحنيني عشان أنام.

(يتظاهر دعبل بالاستسلام.. بينما يتسرب إلى مسمعه الغناء الشعبي.. «موال يا

مهرتي».. يتحرك في تماسك. ويصلب من عودة مع استمرار الغناء المتصاعد يصرخ في

قوة وانطلاقة عجيبة)

يا عدوووووي

(ينزع الحبال عن جسمه وينطلق هاربا من العسس الآخرين ويندس بين الجمهور.. بينما

ينزل العسس وسط الجمهور في رحلة بحث جديدة.. ويقرأون بعضا من ما جاء في أول

المقدمة في تشابك مع أغنية (يا مهرتي) حتى يتلاشى الجميع وسط الجمهور.

تمت بحمد الله

رقم الإيداع : ٨٦٨١ / ٩٩

شركة الأمك للطباعة والنشر  
ن : ٣٩٠٤٠٩٦